

**NATIONAL ASSEMBLY OF
SEYCHELLES**

*Wednesday 04th February
2026*

The Assembly met at 0901am

National Anthem

Moment of Reflection

Madam Speaker in the Chair

MADAM SPEAKER

Bonzour. Bonzour tou bann Manm, tou dimoun ki pe ekout nou dan lakour, e lo nou bann rezo sosyal e medya. Avan nou re pran sesyon ozordi mon vwar li enportan pou *issue* en *ruling*.

Yer, pandan son lentervansyon lo deba i annan en Manm ki'n servi sa mo "galan". Sa mo i pa enn ki Parلمانter ouswa parey nou pou dir an angle, *this is unparliamentary language*.

Mon pa'n reakte lo sa mo yer, senpleman, aköz mon ti anvi reasir mon lekor ki sete sanmenm sa mo ki'n ganny servi. E la ki mon'n satisfere mon lekor atraver tyek *Verbatim*, mon deklarasyon i senp.

Galan, i pa en mo ki mon pou konsider koman enn ki apropiye pou ganny servi dan nou *Chamber*. Si nou fran e

onnet avek nou lekor, sa i pa en mo ki ganny servi dan en fason respektab ouswa pozitiv koman en madanm, e koman premye madanm ki pe servi dan sa pos Speaker, i mon devwar pou osi adres bann term ki ganny servi dan en fason derogatwar anver, espesyalman nou bann madanm, e zenn fiy.

E se alors, ki mon pe fer en *ruling* kler lo sa size. Nou langaz kreol i enn ki ase konpreansiv, e kot nou kapab rod lezot parol pou dekrir bann sityasyon ki nou anvi adrese, annou fer li dan en fason ki respektab, onorab i osi prezerv dinyite nou Lasanble an menm tan ki nou apel nou devwar osi anver piblik.

I nou devwar pou konport nou a tou moman ki nou anndan Lasanble dan en fason onorab, apre tou. Mon vwar li osi enportan pou fer bann Manm rapel ankor enn fwa nou *Standing Orders* ki annan bann gidans ase kler lo fason ki bann Manm i devret konport zot dan Lasanble, e osi dan kwa ki sipoze dan zot diskour letan zot pe adres en topik ki devan nou Lasanble.

Topik deba pour le moman i ladres Prezidan lo Leta Lanasyon, e non pa Bidze ki tre byento pou ganny adrese par sa Lasanble. Tou Manm pou annan loportinite pou

adres bidze letan i devan Lasanble.

Annou alors rapel ki *Standing Orders* i donn gidans ki nou pa antisip deba lo en *Bill* ki'n ganny pibliye, tre byento sa deba pou vin devan Lasanble an plenn form.

Ankor en lot gidans, e ed memwar kot i konsern kondwit ouswa *the conduct of the President*, e manm son fanmir. Prezidan, Vis Prezidan, osi byen ki nou bann *Leaders* dan Lasanble, bann Ziz, bann Manm dan Lasanble, e zot fanmir tou zot fanmir, i pa en size en deba *unless* en Mosyon in ganny table ekspreseman pour sa.

Annou alors mazin byen lo fason ki nou adres topik dizour, ki kouraman i Ladres Prezidan lo Leta Lanasyon. Mon remersye zot pour zot pasyans, e osi pour zot bonn konprenezon. Nou ava aprezan kontinyen ek bann lentervansyon, e lo lalis i Onorab Conrad Gabriel.

HON CONRAD GABRIEL

Mersi Madanm Speaker. Mon a dir bonzour toulmonn a lekout. Bonzour mon bann koleg MNAs, espesyalman, bonzour spesyal bann dimoun Pointe Larue.

Dabor Madanm Speaker, avan mon komanse mon ti a kontan zis partaz kondoleans avek lafanmir Laporte, Pointe

Larue apre lanmor Madanm Miss Nellie Laporte, byen koni koman Miss Nellie, kot bokou zanfan in pas dan son lanmen pandan sa bann dernyen lannen ki'n pase.

Mon a profit lokazyon osi pou senpatiz ek bann lezot dimoun ki'n perdi en manm pros zot fanmir, e la mon mazin Trevor Bijoux, lafanmir Bijoux byen koni koman *Smash Kid*, ki ti en zanmi ase pros.

Madanm Speaker, mon'n ekout ou gidans. Me selman par ler nou pou bezwen anmas serten keksoz ki'n pase lo *floor*. I annan Manm ki ti koze yer avan nou fini deba Onorab Clarisse, ennler mon ti krwar li ki Onorab Perseverance. Mon ti a zis enform Madanm Clarisse, ki i ti deza kot Gouvernman Lokal koman en *DG* ti apel li *DG* Clarisse, kot i konn byen ki mannyer keksoz i marse.

Ti dan *SPPF*, *SPUP*, Lepep, e *US*, e in benefisyen enormeman dan sa sistenm. Sa menm Onorab, ti pe koz fortman lo Perseverance. Mon ti a zis enform Onorab Clarisse, ki *masterplan* Perseverance in egziste depi 2009, 2010, e lo la ti deza annan konstriksyon kordgard, e lezot fasilite.

Lot Onorab, ki mon panse li i en paster Onorab Labonte, in dir ki konblaz ti dan plan

LDS. Be Onorab, plan *LDS* Minis Devika, ti dir ki kirmol pou antre Sesel an Desanm 2024, e travay pou komanse *by Zen 2025*.

Ki mannyer la an 2026 en kontra konble, fek sinyen e zot pe dir sa i zot plan? Konmsi plan *LDS*, Kirmol ti po arive 2024 Sesel e kontra ti pou siny an 2026? *Sorry Onorab, wrong number, try again. You can fool some people sometime, you can fool all the people all the time.*

(APPLAUSE)

HON CONRAD GABRIEL

Lot Onorab Met Georges, (*“ah,” welcome in the House*) - ti fer son 20enm fwa i reponn SONA. I dir ki, “apre 100 zour i vwar en pep dan lafreyer e konfize e Dr Herminie, pe met dout dan sa pep.”

Be Onorab, ou menm ki pe met dout dan sa pep. Letan ou dir ki an 2027 zot pe retournen, sa pa en dout ki ou pe met dan sa pep? Mon zis rapel ou ki sa lagrenn bat latet ki zot ti vann Oktob 2020, in fini *expire*. *SNP* pa ti zanmen les tonbe. Me *LDS* pa pou zanmen aret plenmyen!

(APPLAUSE)

HON CONRAD GABRIEL

Madanm Speaker, dabor mon ti a kontan remersi nou

Prezidan Dr Herminie, pour sa diskour lo Leta Lanasyon.

A mon avi in en diskour ki'n demontre en vre leta nou nasyon e osi byen montre nou en vre dirizan nou pei. An tou ka Madanm Speaker, sa lopinyon in ganny partaze par tou dimoun ki mon'n koz avek lo semen, e en pe partou dan Sesel.

Mon dir sa Madanm Speaker, aköz napa personn ki'n ganny maltrete, denigre pli ba ki later parey ti le ka dan bann SONA oparavan.

Prezidan, in tous bann keksoz tanzib pour ed Seselwa epanouir dan direksyon ki i ti ava anvi e swete. Byensir nou tou nou bezwen travay pli dir, e vin pli determinen pou akonpli nou bann rev, lanbisyon, e proze personnel.

Nou bezwen absoliman met lide ansanm e re anmenn sa zwa de viv ki ti egziste Sesel. Byensir bann ki pli vye ki mwan pou konpran egzaktaman ki mon pe koz lo la, e ki mon pe sey dir.

Pour nou arive fer sa nou bezwen en parti parey *United Seychelles*. Nou'n demontre pandan sa dernyen 5an ki'n pase ki nou sel opsyon pour Sesel.

Nou *manifesto* in enn ki'n koz fortman lo nou bann progre, e vizyon ki nou Prezidan in annan pour Sesel e tou Sesela san kit personn

deryer. Mon repete, san kit personn deryer!

Pou komansman personn pa ti krwar nou, zot ti riy nou, denigre nou, donn nou tou sort kalite non. Nou ti ganny dir ki nou bann kriminel, e nou annan disan lo nou lanmen. Zot rapel? Nou ti pou disparet, e al dan bin listwar. Zot rapel?

Me la gete ki nou pe trouve Madanm Speaker, labous in fermen esperon pou de bon, aköz sa karavann *US* ki'n kit stasyon an Oktob 2025, personn pa pou kapab aret li dan milye semen. Nou a tann zis lisyen pe aboye deryer, setou!

Nou Prezidan in fer kler ki i pa la devan nou zis koman en *leader* politik, me koman en konpatriyot Seselwa ki'n mars dan bann semen vibran nou bann zil, ki'n ekout zot konsern e ki'n re santi zot laspirasyon.

In ganny elekte koman Prezidan pour tou Seselwa, non pa zis pour sa ki'n vot pour li. Se sa diferans ki egziste ozordi dan nou pei.

Ler dimoun i santi zot ganny valorize, zot leve zot menm e zot bouze, ler laport i ouver lide i sirkile, e ler en nasyon i krwar dan son prop pep napa limit lo sa ki i kapab akonplir.

Nou Prezidan i rekonnet ki nou pei i en paradi pa selman

dan lanatir, me osi dan lespri. Mon asir li ki i pa tousel dan refleksyon ek son bann defi ki pou vin avek.

Me ozordi nou pa zis la pou selebre sikse lepase, me pou asir nou souvrennte, e garanti en lavenir prosper pour nou tou pa zis pour serten. An zeneral, nou dir zot e nou repete, *just trust the process*.

(APPLAUSE)

HON CONRAD GABRIEL

Madanm Speaker, pandan mon dernyen manda mon'n esey mon mye pou travay pour tou zabitan mon distrik. I pa ti en latas fasil, prenon kont klima politik.

Rikord sanzman *DA* kot in fer ki nou bann proze distrik in ganny enormeman retar, e bokou difikilte Onorab Clarisse, i konn sa tre byen aköz i ti *DG*, e form parti *decision making*.

Madanm Speaker, nou distrik in soufer tro bokou avek sa ta sanzman ki'n arive pandan sa dernyen 5an. Ler mon konte i annan sis diferan *DA* dan Pointe Larue depi mon *MNA*. Sa rikord i vremen tris.

Mon swete ki Minis pour Gouvernman Lokal i a seryezman get dan sa sityasyon travay ant *DA* ek *MNA*. Lo sa note mon ti ganny sans asiste sa *High-Level Inter-Agency Forum* i ti deroule le 29

Zanvye 2026 organize par *Ministry of Local Government and Inner Island*.

Deba ti santre otour *good governance* la bonn gouvernans, *transparency* latransparans, e *accountability*. Byen enteresan, me i reste pour nou met li an pratik.

Mon lans en lapel lo sa not ki mon'n arive la avek tou dimoun dan nou bann kominote pou azir konsyansye. Si semen in ariv kot ou, donn sa permisyon e la mon pe koz lo *wayleave* pou lezot zabitan benefisye.

Annou diskite, e sey antre dan negosyasyon kot a lafen dizour tou dimoun a benefisye. Annou met de kote sa lespri egois. Annou mazine ki ler ou ed ou vwazen ouswa ou prosen, demen i vin kapab vin sekour ou dan ou maler oubyen difikilte ki ou kapab pas atraver.

I enportan fer remarke ki nou Gouvernman in fer en promes 100 zour, e mon pou dir fortman ki nou'n reisir e menm desot lekspektasyon.

Tou sa ki'n ganny promet pe arive i pou arive! Nou en Gouvernman ki ekout soufrans son pep. Lala rezon akoz ki Seselwa in swazir sa lekip for e solid pour diriz sa pei. E andotmo en vre Lasanble.

Nou pa zis vize ver sanzman, nou angaze pour en vre transformasyon. En Sesel kot bann sistenm i la pou deservi lepep pe enport ou krwayans politik.

Mon la pou fer sir ki nou Gouvernman i mentenir son parol e kontinyen ede pour ki zabitan Pointe Larue, e tou Seselwa an zeneral i benefisye.

Lo sa not mon ti a kontan remersye nou VP Onorab Sebastien Pillay, ki pe *lead by example*. Onorab Pillay, byen koni koman LOTO pa pou zanmen ganny ranplase isi dan sa Lasanble. Sa wi en VP, ou deza nou'n fini idantifye landrwa e teren pour komans konstri nouvo proze lakaz, e bokou lezot lenfrastruktir ki manke dan distrik tel parey semen, e drenaz.

Weekend pase depi son SS son PS, e lezot teknisyen pour Departman Lakaz ek Later akonpanyen par SIAH, ti kontinyen sa bann vizit ki ti'n komanse.

Dan 100 zour nou'n fer bokou. Kot i byen nou pou dir i byen, e admet i byen. *Chapeau VP* ek ou lekip, zot pe fer tou byen.

Sa dan li menm montre nou sa nivo lenkonpetans Gouvernman avan, zot pa'n kapab delivre zot bann promes, e pas letan koz manti ek sa pep.

I byen fer resorti ki ozordi Lopozisyon i lib pou dir sa ki zot oule, konpare avek 5an pase kot nou dan Lopozisyon nou ti ganny oprese, denigre, maltrete. Pa vre Onorab Georges?

Madanm Speaker, la ki roten in sanz lanmen zot pe kriy, “ayoyo, i fermal.” Letan i pas sitan vit, e parfwa nou bliy sitan vit.

Ser frer, pep Seselwa sa kalite dezord ki'n arive dan sa 5an i pran letan pou met lord, me avek en Gouvernman dan kalib *United Seychelles* napa nanryen ki enposib mon senpleman dir zot, e repete zis *trust the process*.

(APPLAUSE)

HON CONRAD GABRIEL

Madanm Speaker, nou ti dir nou pou retourn laz retret 63an, e nou'n fer li. Byento bann viktim *TRNUC* pou vwar en laklerte dan zot demars pou konpansasyon,

Pri bis pe al ganny revize, *internet* pou vin pli abordab, rediksyon lo taks pour fer ki pri lavi pou amelyore, epanouisman bann pti biznes kot plis ki 50milyon pou ganny mete pou ede soulaz bann frer e ser Seselwa in pas dan bokou difikilte, e difikilte enorm ki'n ganny afekte dan en fason ou en lot; *long service allowance* finalman i retourn

lo programm apre ki ansyen Gouvernman ti'n koupe.

Byento bann *teachers* pou ganny zot *laptop* pou ede edik nou bann zenn an servan plis teknolozi. Lozman nou'n fini garanti ki Gouvernman pou konstri mil lakaz pandan sa lannen.

Kote, e dan ki pei ou pou tann tousala arive dan 100 zour? I enportan fer remarke ki *LDS* ti konstrir 250 a 300 lakaz pandan 5an. Laplipar ladan ti nou bann proze kot zot ti'n zis koup riban. Lepep in note sa ta plak ek premye pyer ki'n ganny mete partou, partou.

Senkyenm Prezidan parey i apel son lekor, in sey tou pou *compete* ek Dokter. Me Dokter in montre li mannyer i lev en marto 14 liv byen fasil, donn lape senkyenm Prezidan, relas trankil parey Prezidan Faure ti fer. Aret donn lokipasyon ou prosen, ou pe fer ou parti plis ditor. *One advice to you, take a backseat.* Les *United Seychelles* travay pour sa pep. Mon repete *just trust the process*.

(APPLAUSE)

HON CONRAD GABRIEL

Madanm Speaker, bann Proze *Landbank*, e Proze Konblaz, e Devlopman Lakaz i Ile Aurore tousala i dan *pipeline*. Mon asire ki avek sa lekip ki nou

Gouvernman i annan mon plis ki krwar ki nou pou reisir.

Malgre serten pe sey tou pou destabiliz nou bann pla, sa i fer nou pli for e pli determinen ki zanmen pou reste o pouvwar 2030, e montre sa pep Seselwa aköz zot in met nou la.

En keksoz enportan ser, frer ek Seselwa travay dir i pa vedir fer tapaz, si nou travay ek leker nou pou reisir. Pou tro bokou letan politik in diviz sa pep, fanmir in kase e divize pour bann senp keksoz ensinifyan e lenbesil, e sa in retard bokou progre.

Nou'n vwar ki dan plas met larzan dan pos Seselwa, ansyen Gouvernman in pas son letan depans larzan dan bann antite, e enn ladan se pa lot ki sa fame ACCS. Kantite larzan in ganny depanse pou pey avoka etranze? E nou bann avoka Seselwa in ganny kit ater. I annan avoka etranze ki'n menm ganny peye ziska R800mil par mwan zis pou sey pini serten endividi. Sa i montre ou klerman ki nou ti en- sa i montre ou klerman ki nou ti annan en Gouvernman enkonpetan ranpli ek lesprivanzans ek laenn pour son prosen.

Madanm Speaker, atraver ou oli sa 66 *case file* ki Madanm Komisyoner ACCS ti dir i pe anmenn Ankour depi 2021? Mon demande ki

tousala i ganny revwar tre vit, parey Prezidan in dir, i pou revwar travay ek misyon ANB ek FIU, e tou bann lezot antite ek lazans ki annan pou fer ek koripsyon dan Sesel.

Nou Prezidan Patrick Herminie, pe montre ek sa pep ki i pa vin zis fer promes, me pou delivre lo son bann promes. Madanm Speaker, koman en dimoun ki'n toultan atase ek sport pli prezizeman *basketball* mon santi ki sport in ganny neglize. Nou'n annan en Gouvernman ki'n mal performen, e byensir atlet pou otomatikman mal performen. I nepli letan pou zis koze, aksyon ki demande. Avek sa transformasyon ki pe al arive, mon plis ki asire ki nou pou fer byen dan bann lannen ki pe vini.

Nou pe met plis lanfaz lo bann zenn pour donn zot tou kot finalman, sport i a vin en keksoz ki zot a kapab depan lo la pou ganny serten benefis finansyel. Mon rekonnet ki annan atlet ki pe fer zot mye, e bann ankadrer pe donn tou, i reste Gouvernman pou kontinyen sa zefor pou rekonpans atlet byen sirtou bann ki'n byen performen.

Dan mon distrik i annan bokou atlet potansyel dan tou disiplin sportif, me parfwa zot ganny dekouraze avek lafason fer. An se moman nou annan trwa tim *handball* de tim

basketball kot parfwa i vremen difisil ler i konsern *training*.

Lo sa not mon ti a kontan remersi *SLTA* kot finalman nou *multipurpose court* in ganny en nou sirfas. Mon pe kontinyelman rod solisyon, e mon kontan, e vremen apresye ki *Police Academy* in pare pou ed nou avek zot *court* pou fer lantrennman pli entansif. Sa i a tir bokou presyon lo distrik e osi lo bann zwer osi bann *coach, manager*, paran, e tou dimoun ki afilye ek sport an zeneral. Nou annan de tim foutbol, e nou laplenn i demann *upgrade* son sirfas pou zwenn serten standar, mon rol se pou kontinyen travay dir e fer rev bann zabitan Pointe Larue vin vre.

Bokou paran ti a kontan son zanfann i fer byen dan spor, e al reprezant Sesel lo nivo enternasyonal. Me pour sa arive i demann en nivo disiplin serye parmi nou bann zenn. Dan mon parkour dan *basketball* mon'n ganny sans vizit plizyer pei. Mon profit lokazyon pou remersye en dimoun an partikilye, e sa se pa lot ko Anbasader Nicole Gabriel, ki ti pilye nou lekip *basketball Falcons*.

I annan bokou lezot zwer ki nou'n zwe ansanm, e pour sa mon dir zot tou mersi. I pa'n fasil, i pa fasil pou nonm zot tou, me bann ki pe ekout man zot konnen lekel zot. I pa'n

fasil, me nou'n reisir fer nou bout pou devlop bokou zenn fiy e garson, pa zis Pointe Larue, me sorti dan lezot distrik aköz nou ti en klìb byen organize sa letan.

Madanm Speaker, ledikasyon dan en pei i primordyal mon santi ki dan sa dernyen 5an nou lekol Segonder Pointe Larue in ganny bokou neglize. Mon remersi Minis David Pierre, e son lekip kot Minister Ledikasyon pou reakte vitman apre sa dernyen vizit ki ti osi son premye vizit ki i ti fer.

Keksoz pe dousman, dousman ganny fer e mon apresye ki finalman sa lekol i a retourn lo en nivo standar respektab zis parey Onorab Anse Aux Pins Onorab Sultan, ti fer resorti yer. Koman mon lo la, mon remersi Onorab Sultan, son travay ki i pe fer i osi. Onorab Au Cap, e mon demann Onorab Cascade Monthy, pou *join on board*, aköz Pointe Larue i pran kat distrik ki lekol.

I pa zis en lager Minister Ledikasyon ek *MNA* tousel. Mon demann bann paran pou zwe zot rol paran silvouple. Partisip dan laprantisaz ou zanfann, mon santi mon tre konsernen avek nivo disiplin serten zanfann, e serten paran in fini perdi kontrol.

I annan ki sey zot mye, me i pa fasil. Nou bezwen

rekonnet ki i annan bokou presyon lo paran pandan sa dernyen 5an, bokou lasistans sosyal pa ti pe arive pou ed sa *single parent* e bann ki mwen fortinen, aköz nou ti annan en Gouvernman *ultralibéral* kapitalis ki pa i *care* pour sa pep.

Avek sa nouvo ladministrasyon dirize par Prezidan Patrick Herminie, Sesel pou fyer ankor. Mon repete *just trust the process*.

(APPLAUSE)

HON CONRAD GABRIEL

In annan plizyer lenstans kot nou'n vwar *US* in propoz bann bon solisyon pour pei, me *LDS* ek son *super majority* ti tap kalot dan tou sa ki nou ti anmenn dan sa Lasanble, zot rapel?

Madanm Speaker, nou bezwen a tou pri konsantre nou zefor lo ledikasyon, bokou travay lo sa Minister, e si tou dimoun i met zefor, e nide ansanm nou pou ariv lwen, e nou pou fer li.

Sa 100zour in montre pep Seselwa en keksoz, ki *United Seychelles* i la pou reste, e gard sa pei dan lape, e linite kot lape in rennyen dan nou pti pei. Nou pe montre zot ki Sesel i vreman pour tou son zanfan, e tou dimoun i benefisye atraver sa bann

program ki Gouvernman pe met an plas.

Se pour sa rezon ki mon fyer mon'n debout pou kontinyen ed sa pep, e zabitan mon zoli distrik Pointe Larue. Mon'n aspire avek sa diskour Leta nou nasyon par nou Prezidan kot in fer son mye pou ankadre tou Seselwa pe enport ki ou ti siporte. Ek nou, pa ek nou i deryer nou. Lesansyel se ki tou dimoun i travay dir e kontribye pou fer pei avans pli devan.

Si nou senser dan sa travay ki nou'n komanse, mon asire ki 2030, *United Seychelles* pou ankor sa pli gro lafors politik dan Sesel, napa dout lo la.

Anvi ki nou distrik napa gran, gran teren pou fer bann gran proze lagrikiltir, mon apresye ki nou bann fermye Sesel pe al benefisye apre bann deklarasyon ki nou Prezidan in fer, kot R76milyon in ganny met de kote pou ed bann dimoun dan sa sekter.

Sa i en sekter kle nou lekonomi kot si plis lanfaz i ganny mete nou pou vwar rezilta. I annan plizyer zabitan ki'n fer laplikasyon pou ganny en bout later lagrikiltir pou komans prodwi, e ziska prezan i pa ankor materyalize.

Mon espere ki Gouvernman pe kontinyen sa travay ek sa bann dimoun ki'n ganny en morso later

lagrikiltir, me ki pa pe devlope. Nou bezwen a tou pri koman en nasyon rod fason pou diversifye nou lekonomi. Keksoz pou absoliman bezwen ganny fer diferaman.

Sesel in ariv kot en krwaze semen desiziv, en moman kot demann vizyon, kouraz, ek linite. Sa semen ki nou'n swazir ozordi pou determin desten nou pep, e leritaz ki nou pou kit pour nou bann zenerasyon fitir. Semen progre pa zis en slogan politik, i nou langazman nasyonal pou azir avek determinasyon, mazin gran, e gouvern avek sazes.

Ansanm nou pou tras en plan pou krwasans ekonomik, lazistis sosyal, e proteksyon nou lanvironnman, e sel parti ki kapab fer tousala arive Sesel se pa lot ki *United Seychelles*.

Progre pa zis en plan, i legzekisyon, i rezilta konkret, i sa volonte pou bouze sorti dan teori pou al dan aksyon, sorti dan deba pou ariv kot bann vre realizasyon. Sesel se pa mank nide ki en problemn Madanm Speaker, me plito en mank volonte politik swivi, e kordinen.

Pandan sa bann dernyen semenn nou bann zofisye sirtou dan Departman Later ek Lozman in fer ankor vizit pou byen ganny en konpran ki'n arive pandan sa dernyen 5an? Zot be *LDS* in fer dega,

zot in donn bal mon bann frer en? Ladan menm zot ti ou le Seselwa i kit zot lanmenm, Seselwa in dir klerman plito Dokter.

Pandan 100zour selman Seselwa pe komans ganny sa bon latizann ki nou ti merite. Byensir travay fek komanse, nou demann zot pou silvouple *trust the process*.

(APPLAUSE)

HON CONRAD GABRIEL

En *leadership* avek en bi i pa zis reakte, i vizyoner, i vwar odela kriz ozordi e i prepar pour loportinite demen. Se pour sa rezon ki nou pou investir dan bann bon stratezi a lonterm, e nou pa pou diriz tousel. Nou krwar dan en *leadership* kolektiv kot lasosyete sivil, sekter prive, lazenes, ek labaz dan kominote zot tou zot form parti sa progre.

Nou Gouvernman pou touzour fer letan pour nou pep, e tou bann parti konsernen. Pou napa sa sistenm *micromanage* parey ti le ka oparavan.

Madanm Speaker, lafors en nasyon pa depan zis lo son lekonomi oubyen son lenfrastriktir, me osi lo sekirite ek lape dan son kominote. Ler dimoun i santi zot pa an sekirite dan zot prop vilaz, ler nou nepli annan konfyans dan

lapolis, ler koripsyon ek dezord i kontinyen san ki person i fer nanryen, se la ki sosyete i komans flettri, e kot i annan lafreyer, lespwar i disparet.

Madanm Speaker, nou bezwen re etabli sekirite pa zis par enpoz Lalwa, me par re ganny sa konfyans nou sitwayen dan bann lenstitisyon ki la pou deservi zot.

Sesel i merit bann kominote kot zanfann i zwe partou sa per, kot nou bann granmoun i mars trankilman, e sak sitwayen i konnen ki son drwa son lakaz ek dinyite i ganny proteze toulant.

Tousala mon bann frer ek ser i trouve dan nou fame manifesto ki, "Sel opsyon pour Sesel. Pour nou tou pa zis en serten." An zeneral nou parti i krwar dan met zonm ek fanm o sant devlopman.

Nou la pou koman en nouvo sapit enn kot nasyon ki servi Lepep e pa le kontrè, nou pa la zis pou asiz anler e donn lord. Nou, nou la pou mentenir sa koneksyon e nou pou la, e nou pou ankor la parmi lepep.

En Gouvernman par lepep, e pour lepep. Sitan senp. Madanm Speaker, mon ti a kontan dir de pti mo lo lasante, vizyon nou parti se batir en sistenm lasante ki

pran konpasyon ki enklisiv, e ki pare pour lavenir.

En sistenm ki met lepep an premye, ki garanti akse pour tou dimoun ki priyoritiz prevansyon e mentenir byennet sak Seselwa. Mon apresye ki Gouvernman pe al moderniz nou sistenm lasante an servan plis teknolozi, e byento en nouvo lopital pe al ganny konstrir.

Sesel i kapab pti an term later, me nou vizyon i gran. Nou pa zis en leta zil, nou en pon ant bann kontinan, en gardyen losean, e en legzanp vivan ki montre ki lavwa menm sa ki pli pti i kapab rezonnen byen for lo lasenn enternasyonal.

Dan sa lepok kot nou tou nou konekte, napa okenn nasyon ki kapab progresse dan son prop kwen, nou lavenir i depan lo lafason ki nou angaz nou avek lemondn avek kouraz, sazes ek stratezi. Pa koman en mandyan, me koman partner, pa koman en senp spektater, me koman bann akter ki annan en bi dan progresse mondyal.

Tousala i montre ou ki nou en Gouvernman ki serye, i annan zorey pou ekout vizyon e laspirasyon son pep. Apre tou lepep ki'n met nou la i annan en rezon aköz zot in pran en tel desizyon.

Mon bann frer ek ser Seselwa nou pou tann bokou

sorti kot Lopozisyon. Zot pa ankor kapab dizer sa defet Oktob 2025, mon demann tou siporter *United Seychelles* pou silvouple reste *focus*, ansyen Prezidan i dir ki Seselwa pe pas mizer e sa ki ris pe vin pli ris, sa ki pov pe vin pli pov. Be lekel ki ti o pouvwar pandan sa dernyen 5an?

MADAM SPEAKER

Onorab si ou kapab fer en konklizyon, i reste ou en minit.

HON CONRAB GABRIEL

Ou a krwar- Mersi Madanm Speaker, ou a krwar 5enm Prezidan in bliye ki li ki ti Prezidan, kot i pa'n met en sou larzan dan pos malere. Anba son watch, anba son *watch* ki sa ki ris in vin pli ris, e sa ki pov in vin pli pov. E i konn sa tre byen.

Be zot, selman 100zour dan lofis i ou le Prezidan Herminie, i fer desann pri lavi. Be les pase 1,000zour apre ou a kapab dir en parol koumsa. Ase rabase, e sey bat nou latet, aköz Seselwa nepli dormi boner.

An tou le ka Prezidan Patrick Herminie, in fini adres sa pwen kot i annan en gro problem lasante mantal dan sa pei ki bezwen ganny adrese o pli vit posib. Zis pandan 100zour mon santi ki Seselwa i de fwa pli *happy* ki pandan sa dernyen 5an anba

Gouvernman *LDS*, mon demann pou *trust the process* e pa les sa pti group bandi ki anvi pran pei an 2027 sey vin bat nou latet.

Madanm Speaker, an termin an mon ti a kontan ankor enn fwa Pointe Larue - zabitan Pointe Larue ki'n met sa konfyans dan mwan pour en 2enm fwa. Mon pou fer sir ki mon pa dezapwent zot e delivre mon manda, mon demann Bondye lagras, e kouraz pou ed mwan dan sa travay nob ki devan mwan. Annou ansanm batir en Sesel kot sak sitwayen pa zis ganny siporte, me i ganny ankouraze.

Koman en parti e en Gouvernman responsab nou anvi en Sesel kot en manman pa pe trakase si pou kapab aste manze, latizann pour son zanfän. Kot en dimoun aze i santi ki'n ganny respekté. E kot en zenn ki pe soufer avek depresyon pa bezwen santi li tousel dan en kwen.

Finalman, mon swet sa nou Legzekitiv bonn sans e kouraz dan sa travay nob ki devan zot, ki Bondye i beni nou pti pei Sesel e tou zabitan Pointe Larue. Mersi.

(APPLAUSE)

MADAM SPEAKER

Onorab Roucou.

HON MICHEL ROUCOU

Mersi- Mersi Madanm Speaker. Bonzour tou bann koleg Onorab. Bonzour tou Lepep Seselwa i pe ekout nou en bonzour spesyal i pour zabitan Mont Fleuri.

Madanm Speaker, annefe Onorab ki'n koz avan mwan mon'n santi pou dir li menm li i en pti pe konfize, akòz i pe dir avek son bann siporter swa pou *trust the process*, ouswa i pe- mon pa ni ganny en konpran li menm li ki i pe dir.

Madanm Speaker, annefe Onorab ki'n koz avan mwan i menm li Onorab, ki'n mars pli pre avek Prezidan Wavel, ler ti annan problemm Pointe Larue. Ozordi problemm overflow Pointe Larue in ganny rezourd, problemm lakaz i annan nouvo *housing estate* dan Pointe Larue Madanm Speaker.

E ozordi komansman ou war lagrandisman semen Pointe Larue pou sey *sort out* sa problemm trafik. Lekel ki ti al avek Prezidan Wavel pou al tyek tousala, avek Minis Derjacques? Se Onorab, laba ki pe dir avek siporter US "*trust the process*."

Ozordi i pe dir ki nou sa pti group ki nou isi nou en group bandi. Be nou'n pa'n zanmen fer koudeta nou. Ozordi nou pa'n pran bann ki'n touy dimoun nou'n rann zot fizi nou'n dir zot retourn ankor

dan ban piblik nou'n pa'n fer, zot ki'n fer.

Ozordi zot war pou dir nou- Onorab, i war pou dir nou, nou bandi? Madanm Speaker, zonm dan lopilans parfwa i bliy son nesans. Yer sa boug ti en bon boug, ozordi ou pe tret sa boug. Onorab, pa bliye poudir demen latab i kapab vire, e demen ou kapab bezwen sa Prezidan ankor.

Madanm Speaker, nou'n tann bokou koze annefe lo kote ki *LDS* ler ti la pa'n fer nanryen, *LDS* pa'n get sa pep. Be zis ou pas dan distrik ozordi dan plizyer distrik ozordi, ou war plizyer devlopman. Dan distrik Port Glaud, i annan nouvo *housing estate*, redevlopman dan bann lakaz Foret Noire.

Ti annan konplent ki bann motoris ler i pase dan semen ler avek lanmer mont ki bann transpor ti ganny afekte. Tousala travay ki *LDS* in fer. Ler ou desann Grand Anse Mahe Madanm Speaker, Grand Anse Mahe dan Bidze Gouvernman ti pe al fer pli gro proze lakaz ankor la parey Perseverance la ti pou ganny fer.

Ou desann Madanm Speaker, pli ba ankor ki an kit Anse Boileau ou war lagrandisman semen dan pou dan distrik Onorab Adelaide, pou desann pou al dan distrik Onorab Takamaka, ou war

lagrandisman ozordi de bis Tata i kapab pas obor kanmarad konmela, lontan ou pa ti war sa, e sa tousala i bann travay ki *LDS* in fer.

E nou bezwen rekonnet e Lepep Seselwa i war sa travay ki *LDS* in fer. E ozordi Madanm Speaker, apre 100zour apre 100zour ti annan en ta komitman ki *US* ti fer.

Ti dir pou donn bann trwazyenm-az R10mil. Be oli nou'n war? I pe komans donn ou par pti kwiye pe dir ou, "2029 sepa 2030 la zot ava donn ou." E *triple lock*, be ler nou pe gete travay ki *LDS* i fer i vo sa 43an ki zot, zot ti'n la, Sa travay ki *LDS* in fer. War? E ozordi Madanm Speaker, ler *LDS* ti pran labar an 2020, ki ti pe arive? Minis Finans sa letan ki ti'n Minis dan Gouvènmman *US*, ti'n fini dir avek bann travayer poudir, "Saler pe al koupe, pe al revwar saler." Ti annan en bann koze ki nou ti al komans al dan rezerv li menm li.

E ler *LDS* anba Prezidan Wavel Ramkalawan, ki nou'n war? In vini in remet sa pei lo son lipye, sa pei ti lo son zenou. Akoz? Ti annan tro bokou labi. Labi ki ti'n ganny fer dan kof, dan kof Leta.

E osi ler *COVID* in vini, nou'n kapab vaksen nou pep li menm li, fer nou pep retourn ankò ouver pei, malgre ki ti

annan ki ti dir pa ouver, pa envestir dan lenfrastriktir.

Nou war pou dir sa travay ki Gouvènmman *LDS* in fer i pa'n anven. E ozordi si ozordi zot kapab pe donn bal dan larzan gras a *LDS* ki'n ranpli kof, gras a travay ki *LDS* in fer.

Yer Onorab Lemiel, in dir, nou'n byen zer lekonmi sa pei. Ozordi kantmenm zot pe dir, poudir nou pa'n get Seselwa Madanm Speaker, mon a dir zot.

Bann *scheme* ASP apre pour plizyer lannen, apre ki *LDS* in vin o pouvwar nou'n kapab revwar bann *scheme*. Plizyer bann *scheme* ki ti annan.

Ou war re anbelir li ki sa i benefisye bann nou bann orfelen, bann paran tousel. Be pa i apel nou pe get Lepep Seselwa? 17poursan ogmantasyon saler. Larzan dan pos Seselwa tousala. Revwar serten bann komodite kot *STC*, tousala i benefis Lepep Seselwa Madanm Speaker.

E ozordi Madanm Speaker, dan sa travay ki *LDS* in fer li menm li, nou war kot Sesel in ganny sorti lo bokou bann *backlist* dan plizyer pei Madanm Speaker, e mwan mon tir mon sapo avek Gouvènmman *LDS* bann Minis ki ti la, Prezidan li menm li, e mwan mon pa krwar pou dir

se ki *LDS* i pa'n travay e laprev i la.

Ozordi ou pas anvil ou get nou zoli *Library*, ou get bokou bann lenfrastriktir ki travay ki'n ganny fer lo la, be i fer ou *proud* Madanm Speaker. E ler nou pe koz lo Leta nou nasyon ozordi, nou pei i dan problem ozordi anba *US*.

Larzan pe ganny depanse plizyer pozisyon pe ganny kree pou donn bann dalon, e mon pe mazine ankor dan detrwa letan si gouverner Labank Santral pa pou bezwen vin lo medya pou kapab donn bann bilan pou dir ek Gouvernman, "Be nou bezwen pran en pe prekosyon, akòz sansan nou pou war poudir pei byento pou bezwen revwar en fason pour li kapab ganny larzan ankor."

Madanm Speaker, dan bann travay ozordi ki *LDS* in fer, mon santi pou dir, i annan bokou, e ler mon'n tann Prezidan in koz en pti pe lo kote nou lekol li menm li, in dir poudir lekol Mont Fleuri ek plizyer bann larestan lekol in ganny neglize, travay ti'n deza komanse. Mont Fleuri nou'n war i annan nouvo lenfrastriktir kot nou de lekol ki'n ganny fer, plizyer renovasyon li menm li. E ozordi mon kontan pou dir *PS* ki la, akòz li i ti enn *PS* Arnephy, i ti enn bann zofisye ki nou, nou ti *liaise* avek pour

nou kapab fer serten renovasyon.

Mon swete pou dir aprezan la serten travay ki ti pe ganny tarde parey lo kote primer, plizyer fwa ansanm *headteacher* nou ti fer vizit pour nou revwar ki mannyer pou aranz bann *toilet*. Mon swete ki la aprezan anvi ki Mr Arnephy, i *PS* pour Ledikasyon travay ava kapab ganny fer, serten larzan ki ti'n ganny mete pou fer serten travay kot Mont Fleuri Segonder. Mon swete ki aprezan la bann trenn lipye i ava arete, ki ozordi aprezan ki nou pa war ki Gouvernman *LDS*, i ganny blanmen kan saler nou ti annan bann siporter Parti Lepep, ki ti dan bann serten pozisyon ki ti pe anpese kot bann travay i ganny deroule.

E ozordi Madanm Speaker, ler ou pe get lo kote bann komitman ki Gouvernman *US* in fer, e dezabilite ozordi pe kriy lasasen, pe demande akòz ki zot, zot pa'n ganny gete dan sa R800.

E ler nou pe koz dan sa R800 pa tou trwazyenm-az ki'n gannye sa, zis en serten pousan ki'n gannye. E i annan serten trwazyenm-az ki'n ganny pli ba, i annan ki pa'n ganny ditou.

E ozordi lasistans bann *childminding* bann *daycare* pe al ganny revwar. Avan laplipar bann paran ti gannye sa

lasistans e tousala Madanm Speaker, pa i pou afekte sa pep. Sanmenm sa ki nou dir "*for the many, not the few?*"

E ler nou koz lo kote trezyenm mwan saler ki Gouvernman US ti dir in met en larzan pour zot asiste bann pti biznes, mazorite bann pti biznes pa'n gannyen sa lasistans, zot pa'n gannyen.

E mwan mon'n zwenn detrwa ki mwan mon'n koz avek i dir zot in ale, zot in fer laplikasyon, be selman *still* zot pa'n gannyen, ouswa i annan ki'n ganny dir zot, zot pou bezwen met lanmwatye, kan sa ler Gouvernman ti dir i pou asiste zot an antye pour zot pey trezyenm mwan saler zot bann travayer.

Madanm Speaker, *TRNUC* ozordi Gouvernman i dir, poudir in met en larzan a kote pour li pey bann viktim. Be eski sa letan, eski nou ki ti la? Akoz ki Parti US ozordi avek mazorite bann bout later ki zot in vann, zot pa pran sa larzan zot met dan sanmenm sa kont la pour zot pey sa bann viktim? Akoz zot ki ti la, e ler mon'n ekout *Chairman* Mr Danny Faure, i dir, poudir prezidan ansanm avek son *VP* zot, zot pa ti la.

Be Lepep Seselwa ki ozordi bann *taxpayers money*, eski zot, zot pou *accountable* pour sa ki sa parti ti fer, sa ban atosite? Non, Madanm

Speaker, mwan mon krwar pou dir Parti Lepep avek tou zot larzan ki zot in anmase - bann bout later, zot kapab pran en larzan pran met dan en fon pour zot pey bann viktim.

E la kankan pou komans leve la, aköz? Avek sa ta milyon ki diferan ti pe demande, eski zot pou kapab pey tousala? Eski nou Lepep Seselwa annefe ki pou bezwen vini nou *taxpayers money* pour nou kapab pey sa bann atosite ki'n arive?

Madanm Speaker, mwan parey Onorab *LOTO*, in dir, mon pa krwar, pou dir tousala i devret tonm lo ledo mon bann frer ek mon bann ser. E mon panse pou dir, avek travay ki Gouvernman i bezwen fer la, pour zot kapab anmas sa kantite larzan ki zot, zot in vann bann bout later, ki zot ava kapab pey ban viktim. E ler nou pe get bann lekol ozordi Madanm Speaker, degre ki US zot pa dakor avek sa msye ki ti la, zot dir zot ki pe donn *laptop* bann *teachers*.

Laptop ti deza la, Gouvernman *LDS* ti'n fini prononse pou dir i pe al asiste bann *teachers* avek sakenn en *laptop*. E ozordi zot vin fer krwar pou dir zot ki pe al donner.

E la i annan en diskisyon, gran posibilite *breakfast* dan bomaten bann zanfan pou

arete gannye Madanm Speaker. Akoz zot pe sey koup tou sa ki Gouvernman *LDS* in fer pandan sa letan, tou sa bann travay, e akoz zot lakoler e zalouzi ki zot annan kont sa Prezidan ki ti la, zot pe sey tou fason pour zot kapab tir tousala.

Madanm Speaker, ozordi dan *speech* ki Prezidan in fer in koz en pti pe lo *Starlink*. Be Prezidan i bezwen dir ek nou, eski sa i pou napa en lenpak lo pei li menm li? Eski anba deviz etranzer, eski sa i pa pou anmenn serten- ki mannyer mon kapab dir sa - kot pei li menm li i pou war li pe perdi, e sa kantite travayer ki pe travay kot bann lakonpannyen kominikasyon? Tousala nou bezwen mazine.

E ki benefis demen ki ler sa pou ganny anmenn Sesel Madanm Speaker, ki benefis sa pou anmenn pour pei? Akoz kontrè tou larzan pou sorti pou al laba deor. Tou larzan pou ale Madanm Speaker.

E Prezidan i bezwen fer sir pou dir ki si i arive demen kot sa i ganny fer Madanm Speaker, kot nou, nou pa war nou dan en sityasyon ki pou afekte lekonmi pei.

Madanm Speaker, dan sa 100zour la bokou keksoz ti'n ganny dir. Larzan palto li menm li. Be ziska ozordi nou war bann Minis - anefe la i

annan plizyer Minis ki'n ale la ansanm ek Prezidan. Be larzan palto pa i ankor la, ti dir poudir pou annan bokou komodite dan sa 100zour ki pou desann. Nou pa war dan sa 100zour la.

E pri lavi pli ale pe vin pli ser, en kilo zonnyon dan laboutik in ariv sepa konbyen, R113.

(laughter)

HON MICHEL ROUCOU

Madanm Speaker, be eski sanmenm sa ki zot pe get Lepep Seselwa? Pri *fuel* lo laponp, tousala ti ganny dir pou fer desann. Ozordi pri *fuel* in vin pli o ankor Madanm Speaker, lo laponp.

E Gouvernman in zis bat latet sa pep ozordi pour zot ariv o pouvwar. E ozordi zot ferkwa poudir zot, zot pe tir plis kare later. Be dan letan *LDS* bokou fanmir in ganny asiste avek later. Travay in kontinyen, bokou bann nouvo *housing estate* in ganny fer Madanm Speaker.

E mwan mon panse pou dir Gouvernman dan sa 100zour ki zot in pronons zot lekor lo bokou keksoz ki pou ganny fer, zot in *fail* sa pep.

E Seselwa la deor Madanm Speaker, i fristre. E pa bliye, i annan sa bann sekirite ki zot ti promete pou vin *bodyguard* la, bannla pe espere kan zot

pou vini. Zot pa ankor war, e bokou lezot ankor bann aktivis ki'n ganny serten komitman, mon'n zwenn enn de mwan i annan ki'n koz ek mwan, ki'n dir mon pou dir zot in ganny promet plizyer keksoz, ozordi zot in ganny bliye.

E dan Lasanble ozordi Madanm Speaker, ou war bokou pozisyon ki ti kapab ganny met bann kandida ki'n debout dan eleksyon. Me ozordi oli zot? Mwan mon annan enn ki ti debout dan distrik kont mwan i ti dir li menm li, poudir *still* i pe vin dan Lasanble kantmenm pa'n ganny elekte.

Be malerezman Madanm Speaker, nou pa war li, i pa'n ganny mete in ganny ranplase. E ozordi Seselwa la deor pe viv dan fristrasyon, e ler nou get bann zournalis Madanm Speaker, ozordi napa personn. Lontan ou ti war diferan kalite program. E mon konnen pou dir se ki sa msye ki ti fer sa program lot fwa mon'n demann li ki'n arive. I dir, ek mwan koumsa poudir i ankor *still* pe esper *SBC*.

E mon konnen pou dir *SBC* la, aköz presyon ki annan avek bann serten lagresivite ki annan la deor, mon konnen poudir i annan lenterferans kot *SBC*. Aköz nou nepli war bann zournalis vin demann kestyon, nou nepli war zot Madanm Speaker.

E ozordi ler ou pe get Leta nou Nasyon Seselwa pe pli per. Lontan Seselwa ti koze. Bann zournalis pou ti war zot vin demann kestyon, ozordi ou pa war, dimoun pe viv dan lafreyer.

E ozordi mon senpatiz avek zabitan Grand Anse Mahe, apre ki zot in tandepoudir i annan sa de prizonnyen ki ti'n ganny met dan prizon aköz zot ti pe al met bonm kot Stasyon Petrol, eski lazistis i pour zot?

E mon panse poudir Onorab Grande Anse, i bezwen tous en pe lo la. Onorab Lepathy, dir ek zabitan Grand Anse donn zot sa senpati, aköz bokou zot mon'n zwenn enn de mwan.

Zot vreman ankoler aköz zot war pou dir zot ti riske perdi zot lavi avek sa aksyon ki ti pe al ganny fer, e ozordi zot war sa de dimoun aköz faver in ganny large.

E ler nou pe get sityasyon drog dan pei Madanm Speaker, i malere ozordi pou dir nou annan en Gouvernman ki zot pa senser dan sa lalit li menm li, aköz nou'n war zis parey bokou dimoun in war i annan en gran *dealer* ki'n ganny fer tournen, in trouv Sesel. E eski Gouvernman i senser ler i dir i pe mont dan milye kannal pour li al aret bann dav deza zot pran zot dir dapre zot, zot

dir zot *destroy* dann milye kannal? Eski bann droger pa monte laba pou al serse? Eski i annan laprev poudir vreman pou dir drog in ganny detri. E ozordi i annan plis drog partou lo bann *ghetto* dan pei, ou war bann zenn pe komans larger ek kanmarad, ti napa i nepli annan en lord Madanm Speaker.

E ler Gouvernman *LDS* ti la ti annan en larger asarnen kont drog, ti annan bokou lord, ou war Madanm Speaker? E kantmenm Onorab Vidot, pe riy mwan zis mont anler Eden Village, zis mont Eden Village al get sityasyon, ou pou war sityasyon drog.

E mon demande enn ler ki direksyon sa pei pe pran li menm li Madanm Speaker. E lo boner mon'n tann Onorab, ki'n koze avan mwan in koz en pti pe lo mon koleg Onorab Denise Clarisse.

Madanm Speaker, mwan mon'n ganny sans pour mwan travay avek Madanm Clarisse, li i ti *DA Perseverance*, mwan mon ti travay *Housing*. Parey mon ti travay avek Onorab Louise, ki ti *DA Plaisance* apre in al *DA Les Mamelles*.

Nou ti annan- sa madanm in travay vreman byen, e dimoun i respekte li dan lakominote e in fer son travay i pa ti get parti politik li. I ti travay dwat, ou war? E

sanmenm sa ozordi ou war pou dir isi in ariv *DG*, e ozordi in ariv *MNA*. War? Akoz *Local Government* ti war pou dir i en madanm ki debouryer, e si yer in koz lo *Perseverance*.

Mon byen avek Onorab, ki'n ganny elekte lo kote *Perseverance* menm lo *social media* ou war tanzantan zabitan *Perseverance* pe demann lasistans, aköz zot dir ou poudir i annan en group zenn laba ki pe teoriz bann zabitan, pe demann lasistans lapolis pour zot met en lord. Sa en pti pe ki Onorab- Onorab Clarisse, in dir yer. In koz en pti pe lo lakominote, aköz nou ti la ler sa *housing estate*, sa distrik ti ganny batir. Nou ti la avek bann zabitan pou koz ek zot ki mannyer pou viv, e *Perseverance* ti en distrik ki sipoze vin modern li menm li. War?

E mwan ozordi mon sagrinen ler mon tann Onorab pour Pointe Larue, ozordi in sey vin abes sa Onorab, kan sa ler i en madanm ki'n vreman donn tou pour lakominote, in travay senserman, e Onorab, mon dir ou mersi pour sa travay ki ou'n fer pou distrik *Perseverance*, e mon konnen pou dir sipoze annan kontinite, e nou kit tou zafer avek *MNA* pour distrik *Perseverance*.

Madanm Speaker, mon a tous en pti pe bann devlopman

ozordi dan mon distrik. Ozordi ler ou get distrik Mont Fleuri in enn parmi bann pli zoli distrik ki annan Sesel.

Ou pou pas dan semen Bois de Rose, ou pou war lagrandisman semen ki'n ganny fer anba Gouvernman LDS. Problem trafik la kot Semen Weeling in agrandi. Redevlopman dan Corgat Estate pour redevelop bann vye lakaz ki ti deza la Madanm Speaker. Travay pe kontinyen.

Mon swete pou dir la avek nouvo Gouvernman sa travay ava kontinyen demare, ou war? Nouvo *daycare*, byento pe al fini pou annan louvertir kontrè nou pou bezwen envit Prezidan Wavel Ramkalawan, akòz zot ki ti met premye pyer ansanm avek ansyen Minis *Local Government* ki ti la, akòz zot in lager pour nou kapab fer sa nouvo *daycare*.

Nouvo Lekol Ners Madanm Speaker, e plizyer bokou lezot proze ki nou'n benefisye anba Gouvernman LDS. E Gouvernman LDS annefe Madanm Speaker, mon konnen ou'n dir poudir pou annan en moman letan kot Bidze pou vini zis anpasan ti met 15milyon kot ti anmenn bokou bann pti proze semen, *footpath* ouswa semen loto ki ti pe benefisye bann lakour, la nou pou gete si Gouvernman i mete la, akòz nou tandè pou

dir zot pe koup plizyer landrwa bokou ban proze.

E annefe la nou annan en zofisye kot Lenfrastriktir ki'n vini, i dir, lenstriksyon ki zot in gannye pou vizit kat proze priyorite. Mon swete pou dir i pa zis sa kat proze ki pe al ganny fer. War?

E byento pou annan *meeting* avek zabitan la pour nou kapab konekte plizyer bann lakour lo sistenm *PUC sewage*. I annan bokou travay ki Gouvernman LDS in fer Madanm Speaker. E ozordi menm ki US pou sey fer nu krwar pou dir anba LDS napa nanryen ki'n arive, Lepep Seselwa i war pour zot menm, i war sa travay ki Gouvernman LDS in fer in war sa senserite.

Nou konnen poudir pa tou keksoz ki'n parfe, be selman Gouvernman in travay, in montre son senserite, in re fer nou lekonomi, in met nou enternasyonal lo bann serten nivo li menm li.

E bokou ozordi bokou bann gran pei ozordi i respe nou pour sa. Menm nou frer Moris i respe nou ozordi Madanm Speaker. E mon swete ozordi ki anba sa Gouvernman ki la ki mon pa tro war menm apre sa 100zour bokou komitman in ganny fer, bokou fo promes Madanm Speaker, ki nou pa pe war, e mon swete pou dir se ki vre zot *trust the process*, akòz sansan

Lepep Seselwa li menm Madanm Speaker, Lepep Seselwa 2030, i pou met zot deor. E mon garanti ki Gouvernman *LDS* pou re pran labar.

Akoz Gouvernman *LDS* toultan li, nou toultan nou vini nou vin re aranze nou, nou re fer lekonomi menm ki zot in mal zer li. Nou war ozordi Madanm Speaker, i annan plizyer SS, ozordi ou al dan en biro Gouvernman i annan SS, i annan *PS, Special Advisor*.

Be sa larzan ki'n ganny mete dan sa bann dan plas pou koup lo larzan Lasanble li menm li ki pe vini, dan plas pou koup lo bann proze dan distrik, nou ti kapab ganny sa larzan pour nou investir dan Lepep Seselwa dan plas nou kre bann plizyer bann gro pozisyon Madanm Speaker.

Ozordi i annan bokou bann lakaz ki Gouvernman *LDS* li menm li ti'n komanse ansanm ek bann fanmir, be la nou tande pou dir laplipar bann proze in ganny dir tenir la.

Laplipar keksoz in ganny dir tenir annefe, menm bann proze later mon krwar zot pe al revwar lalis pou gete lekel bann siporter ki zot pou donner, e nou pe espere pou gete ki mannyer alokasyon lakaz i fer, pou fer sir pou dir tou Seselwa, aköz anba Gouvernman *LDS* Seselwa pa

ti ganny gete ki i siporte tou dimoun ou pe pey ou lakaz ou ganny asiste dapre ou pwen ki ou ti annan Madanm Speaker.

Ozordi anba *US* li menm li, nou war pou dir se ki lekonomi nou pei si pa fer sir nou pou dan en gran problem. Aköz depans ki mannyer pe ganny fer nou dakor nou, zot dir fodre met larzan dan pos Seselwa. Be selman nou bezwen fer li dan en fason responsab.

MADAM SPEAKER

Ankor 2 minit Onorab.

HON MICHEL ROUCOU

Kot pa fer krwar-

MADAM SPEAKER

Ankor 2 minit.

HON MICHEL ROUCOU

Pa fer- *Ok*. Pa fer krwar avek Lepep Seselwa pou dir ki Gouvernman *LDS* pa'n get zot. E Madanm Speaker, mon ozordi mon santi mwan mon *proud* ki mon lo sa kote latab menm si zot pe dir nou en pti group nou dan Lopozisyon.

Be nou, nou sel lespwar pour Seselwa, war? Sel lespwar ki Seselwa i annan pour nou fer zot lavwa tande. E mon konnen pou dir se ki nou, nou pou la pour nou fer sir poudir Gouvernman i fer sir ki Gouvernman i

accountable lo tou sa ki zot fer, e pour nou kontinyen avek sa lalit ki nou'n komanse Madanm Speaker, e pou fer sir pou dir an 2030 *LDS* i retourn *State House*, e nou re met sa pei lo sa nivo ki ti ete 5an pase. Mersi.

(APPLAUSE)

MADAM SPEAKER

Onorab Claudette Louise.

HON CLAUDETTE LOUISE

Mersi Madanm Speaker. Avek ou permisyon Madanm Speaker, mon ti a kontan pas mesaz kondoleans avek 2 defen dan mon distrik, Norville Sinon e avek lafanmir Noris Folette. *Ok*, ki Bondye i donn kouraz lafanmir pou zot fer fas avek sa separasyon.

Bonzour Madanm Speaker. koleg Onorab, frer ek ser Seselwa a lekout, espesyalman bann zabitan Plaisance, Bonzour. Premyerman mon ti a kontan felisit Prezidan Patrick Herminie pou en Diskour Leta Lanasyon, ki'n byen kalkile, byen kler. Non pa enn ki denigre e maltret personn.

En diskour ki anmenn soulazman e lespwar. Enn ki anmenn linisyativ e loportinite pou tou Seselwa, ki a permet nou viv en lavi pli eze e prospere. En diskour ki'n fer nou realize ki nou'n fini bouz

devan sorti lo staz planifikasyon, pou staz aksyon.

E nivo transformasyon dan pei i enn remarkab e vit. Seselwa i kapab zize pou zot menm sa gran diferans dan stil gouvrenans e demokrasi dan nou pei Sesel. Madanm Speaker, lanfaz pe ganny mete lo latransparans e bonn gouvrenans dapre kontra sosyal 100 zour e promes manifesto *US* ki dayer yer le 3 Fevriye ti egzaktman 100 zour.

Prezidan in souliny bann reform ki'n fini aplikab. E lezot ki dan prosedir e ki'n fini pran kont son finansman dan Bidze 2026. I byen fer remarke ki avek larantre sa 14 Minis aprouve par Lasanble, sak Minister in revwar son striktir. Zot pe travay pa an izolasyon. Fason travay in ganny re aziste. Nouvo stratezi travay in ganny met an plas, revwar bann Polisi vize ver modernizasyon e realite.

E zot pe egzekit zot plan aksyon, ki sa i asire ki bann *file* i bouze, travay i ganny delivre byen e dan en kourt dele letan. Servis e enplimantasyon i arive a tou nivo. Madanm Speaker, permet mwan donn en pti legzanp; tou resaman parey nou vwar Minister Gouvrenman Lokal e Zil Pros,

zot in fer zot premye *High Level Forum*.

E sa pou swiv par reentrodiksyon *District Team*, kot lotorite distrik ki asiz akote bann lazans kle pou anmenn bann defi zot distrik. E avek en lapros kordinen ver en azanda komen pou anmenn solisyon lo nivo kominoter.

E en lot legzanp, nouvo ladministrasyon in erit bann *files*, sirtou bann *files* lakaz brile dan enn de distrik. E la mon mazin lafanmir Estico Belveder, ki ti ganny promet pou ganny ede avek rekonstriksyon zot lakaz irzan. Zot in pasyante, me zot ka in sote 5an. A lafen, zot ava ganny lespwar ki tre byento zot a kapab temway rekonstriksyon zot lakaz.

Madanm Speaker, Prezidan in fer resorti fortman ki dan en demokrasi sekirite i bezwen touzour fonde lo Lalwa e lord ek respe pou drwa lezot. Seselwa i santi li pli enformen avek bann desizyon Cabinet. E pli soulaze avek letablisman bann Komisyon Lanket e bann lenvestigasyon dan bann ka a tou nivo ki'n komanse.

Lo kote bann mezir sosyal e ekonomik, reentrodiksyon 13enm Mwan Saler pou tou Seselwa koman en drwa travayer. Apartir Desanm ziska milye Zanyve, tou travayer in resevwar zot 13enm Mwan Saler plen. E

sirman sa in en soulazman, kot zot in kapab eklersi zot bann det. E prevwar pou bann ka depans adisyonnèl.

Reentrodiksyon *long service allowance*, sa *scheme* i parmi enn bann mwayen pou motiv en travayer pou donn plis sinerzi dan son lorganizasyon travay. E an menm tan lorganizasyon e asir lwayote anver son travayer. Bokou nou bann edikater, nou bann ners, bann ki lo *frontline* zot in tenir for depi granmaten tras larout ziska tar. E menm *weekend* ek konze piblik pou donn zot kouraz, kontribye dan lekonomi pei.

Sa bann letan kondisyon, zouti travay, lenfrastruktir pa ti parey ozordi. E nou dir zot mersi pou sa ki nou ete ozordi. Laz pansyon sekirite sosyal pou bann dimoun aze sorti 65an, desann 63an. E i bon fer lapel ki sa R10mil ki nou tann koz bokou lo la, pou ganny pran kont. E sa i pou ganny aziste, in komans avek 800 i pou ale ziske lannen 2029 kot zot pou ganny zot 10mil an plen.

En zes ki zot merite pou nou bann aze. E la mon profite pou salye e remerisi tou nou bann aze, ki ozordi koman sa pilye ki'n form nou fondasyon. E ki ozordi nou pe debout for lo la. Sa benefis i aplik pou mon distrik Plaisance, kot 71 ka nouvo dan kategori targete

in anrezistre. E 38 in fini kalifye, in fini zour zot pti larzan antretan ki lezot pou resevwar sa mwan Fevriye.

E tou sa in fer ki plis larzan ki'n antre dan pos Seselwa. Madanm Speaker, sa slogan pou lamazorite e pas zis pou serten i pa zis en slogan, i en prensip ki nou ladministrasyon nou fer desizyon lo la. E refleksyon i se ki dan lakominote i devret kontinyelman reste enformen e a zour. Reste angaze e santi zot form par dan tou sa ki arive otour zot. E tou benefis i pou ganny partaze.

Se sa ki nou dir pou lamazorite, e pa zis pou serten pa kit personn deryer. Pandan sa dernyen 5an, pep Seselwa in ganny dir a plizyer repriz ki pei ti pe fer byen. Me pou lamazorite fanmir Seselwa sa pa ti antyerman realite. Bokou fanmir i ankor pe ganny difikilte pou fer 2 bout zwenn.

Par egzanp dan sa dernyen 5an, lasistans byennet sosyal ti preski non egzistan. I pa ti en zouti pou soulaz Seselwa. E mon asire ki bokou ti bezwen vin tap laport zot bann Onorab pou ede ekersi bann aryeraz sirtou servis *PUC* eksetera.

Dimoun i ankor pe kalkil retar anfe ki zot in esper promes ki pa'n zanmen ganny delivre. Anba proteksyon sosyal, sipor pou bann fanmir

ki travay i garanti. E pou kontinyen asir sa sipor fodre ki Seselwa ki kapab travay i travay pou sorti lo *welfare* pou al lo *workfare*.

E la mon met lanfaz lo pwen Prezidan ki'n dir ki en nasyon pa pou zanmen progrese si lanmwatye son pep ki travay, e larestan i asize e espere pou sa ki travay pou soutenir zot. Vre Leta nou Nasyon i ganny mezire par ki mannyer sipor i ariv kot sa enn ki pe esper serten lasistans.

E la mon fyer ki Gouvernman in anonse ki in fini garanti larzan pou konstri plis ki 1000 lakaz komansman sa lannen. Plaisance in ganny neglize Madanm Speaker. Mon pou asire ki mon distrik i ganny touse, aköz demann pou lakaz i o, aplikan pe espere pou en bon e lannen.

Nou pa'n ganny bokou nouvo alokasyon apard ki bann proze redevlopman. Avek 188 laplikasyon lakaz ki aktiv sa i ava en gran soulazman. I bon note ki apepre menm kantite sif laplikasyon pou lakaz i pa aktiv, savedir aplikan pa pe onor zot responsabilite pou fer zot kontribisyon *Home Savings Scheme* ki permet zot zwenn kriter pou ganny en lakaz.

Zabitan Plaisance mon lans lapel ki sel mwayen benefisye avek en Lakaz

Gouvernman se par fer zot kontribisyon ki an mwayenn i R150 par mwan. Nou konnen bann lakaz Plaisance osi i byen i aze. E la i annan kontinyasyon dan bann *scheme* renovasyon, ki ava ed zot pou kontinyen zouir en bon lanvironnman en bon lizyenn kot zot reste.

Lo kote teren, avek lanons 150 morso later rezidansyel ki pou ganny distribye i a redwir presyon lo demann. E fer provizyon pou vann plis morso bann lannen ki swiv. Sa osi i ankor en defi kot Plaisance i ankor annan demann laplikasyon aktiv date depi 2002. E mon mazin osi bann later ki lontan ki Gouvernman in met lanmen lo la.

E sa se parey *Ex-Murray Copolia* e *Ex-Jolicoeur Belveder*. Parey nou konnen *Ex-Murray* en parti ti'n ganny dedye pou met en *daycare* lo la. E ki mon swete nou ava pe kapab enplimant sa proze. Madanm Speaker, adisyonnelman apre plizyer lannen ki size lo proze konblaz in ale vini resaman nou'n temway sinyatir dokimantasyon pou komans travay konblaz lo 3 sit.

Ki son lenplimantasyon apartir lafen mwan Mars e sa pou kre bokou plis met kare nouvo later pou proze lakaz, proze endistriyel, lekol ek

devlopman lenfrastruktir. Anvi ki dan mon distrik i annan demann pou later pou devlopman pti biznes, tel ki dan domenn mekaniz i a ede pou sa bann partisipan sorti avek zot biznes lo kote bann teren rezidansyel ki ava redwir bann defayans ki pe arive dan lakominote

E ki zot ava ganny zot prop later pou kapab zouir. E nou pe antisipe ki alokasyon i ava enn ki zis e satisfezan pou nou bann pti Seselwa. E an menm tan bann resipyan i a bezwen devlop sa bann later dapre zot plan. Zot a leve debourye kre lanplwa ki a promot zot lepanouisman e kontribye dan domenn lekonomi pei.

E la osi mon fer remarke ki Plaisance ti deza annan plan devlopman pou en sant lantrepriz, ki ava ede osi pou ed bann pti biznes osi ganny zot landrwa pou kapab manifaktir zot prodwir e osi vann. Avek akse swen lasante ki zis a tan pou nou tou, me non pa zis pou en bann. San lasante napa dinyite, napa prodiktivite, e napa vre loportinite.

Pandan bann dernyen lannen, bann travayer swen lasante ti pe fer fas avek bokou defi par egzantp fasilite ensifizan, mank medikaman, lenfeksyon ti'n ravaz nou lopital. Dimoun ti pe esper tro

bokou letan pou vwar dokter. E san oubliy bann dilenn lapwentman spesyalis.

Fasilite limite pou akse bann lekkipman spesyalize par egzanp *scan*, *MRI*, pou pli bon deteksyon ek diagnosis maladi boner. Bokou dimoun ti pe vwar opsyon sant lasante prive, e byensir sa ti vin avek en kou finansyel.

Reform dan Sekter Lasante i neser pou redinamiz striktir, etabli rezilyans par fer formasyon dan bann domenn kle adres bann mank kapasite. E sa i anmenn plis lefikasite dan prevansyon e lasante primer, pou redwir presyon dan lopital. San bliy bann program spesyalizasyon pou nou bann zenn dokter Seselwa, ki zot ava osi pran kontrol swen pli avanse dan lopital.

Prezidan in anonse ki nou'n fini ganny larzan pou en nouvo lopital modern ki pou komanse pli tar sa lannen. Madanm Speaker, en dimoun i bezwen annan tou son fakilte pou li vi byen dan son vye zour. Laspe Lasante Mantal i enportan, me in ganny inyore ou stigmatize. Nou rekonnet ki lenkyetid, depresyon, adiksyon e troma in vin en gro problem dan nou pei. E i pe afekte bokou dimoun dan lafanmir, dan landrwa travay e dan kominote.

I afekte prodiktivite, nou sekirite, e lavenir nou zanfan. En lazans pou Lasante Mantal in fini pas devan Lasanble pou ganny etabli pou permet pli bon konprenezon lasante mantal. Delivre servis e sipor fer lentervansyon apropiye e a tan.

Letan ki nou pe koz lo lasante, viv an dinyite, drwa pou lezot. I annan serten bann size dan distrik Plaisance ki pa'n ganny gete mon kapab dir. E menm si dimoun in anvoy zot lavwa, me selman in antre en kote zorey, in sorti dan lot kote. E la mon pe mazin bann dimoun ki Fairview La Misère.

E ki menm si i annan en ka ki Ankour, me avek sa bann sityasyon ki zot ladan toulezour i fermal, i vilenn. Zot *call* mwan mon tande, zot anvoy *WhatsApp* mon war. Me selman i bezwen en lager antoure pou nou kapab ariv pli devan lo sa size e ki zot a viv en pti pe lizyenn pli bon, ki zot pa a bezwen santi sa loder malpropte koman zot ouver zot laport ouswa zot lafnet dan La Misère.

E annou pa bliye ki nou Lasante i nou responsabilite. Pri lavi Madanm Speaker i en pli gran konsern. Wi, kou lavi an zeneral i ser sa i pa akseptab. E i merit ganny adrese irzan. Mon aplodi lanons lo lasirans ki bann

komodite esansyèl pou desann konsiderableman pandan sa lannen.

E lo lalis bokou plis komodite STC, bann komodite debaz pou ganny azoute pou stabiliz pri e protez konsonmater. E avek relansman Kart STC, sa i a ed bann lakour avek mwayen pli ba. Osi dan prosedir pou annan bann egzansyon VAT ek rediksyon taks lo bann komodite tou le zour.

Mon e ekspekte osi ki i annan en balans abòdab nou bann lezot prodwir, anvi ki dimoun i swazir pou *shop online* akòz i pli bon marse. Redwir kou lenerzi dan nou pei i osi tre enportan, e nesese lo bann servis par egzansp telekominikasyon e *internet*. Reste azour, akòz an Avril negosyasyon pou finalize avek lakonpannyen *Starlink* pou fer ki telekominikasyon i pli aksesib, pli abòdab e pli vit.

Nou ti ganny dir osi ki apartir le 1 Fevriye pri bis pou desann par R2. E wi, nou'n vwar laprev. E sa rediksyon pou kontinyen R7 lannen prosenn e R6 an 2028. Sa plan se pou retir presyon kotidyen lo bann fanmir, lo bann travayer, etidyan. E asire ki mobilite i reste abòdab pou tou dimoun.

Lentere ki o Madanm Speaker, konmela si en

dimoun pa pran en loan i pou difisil pou li avanse dan son plan e proze. Nou bann dimoun ki'n pran *loan* labank pe sibir presyon ki to lentere i kontinyelman monte, pou soulaz sa bann kategori dimoun Prezidan in anonse ki Labank Komersyal avek *Nouvobanq* pou redwir zot bann to lentere, amelyor konpetisyon, e donn plis akse avek finansman sirtou lo kote lozman abòdab.

Ler Prezidan i met lanfaz lo "*trust the process*" Madanm Speaker, setadir ankouraz pasyans, konfidans ek konprenezon dan bann mezir ki pe ganny met an plas. Se en fason pou reasir piblik ki evantyelman sa bann stratezi pou anmenn bann retonbe pozitiv ki pou met Seselwa o sant devlopman.

Unemployment Relief Scheme URS, pe ganny ranforsi pa zis pou donn sipor reveni. Me pou konekte dimoun avek lanplwa, *training, reskilling*, e an rezilta vwar reentegrasyon dan prodiktivite. Sa *scheme* pou osi benefisye nou bann dimoun Plaisance sirtou bann zenn vilnerab. Bann ki'n viktim, bann *school dropout* ki aprezan zot annan laz travay, me zot ankòr pe serse.

E nou bann zenn osi i bezwen osi profit loportinite, anvi ki reform dan *Scheme My*

First Job pou ranforsi bann program apranti. E asire ki sa konponan Ledikasyon avek Lanplwa i konplimant kanmarad. I pli fasil e pli efektiv, pou note ki bann stil teknik e vokasyonnel pe ganny prioritize.

Nou bann zenn pe grandi dan en lepok ki pli avanse, e pli ris dan teknolozi avek en mobile ou en *laptop*. Sa i ouver laport pou plis konesans, koneksyon, leksperyans, laprantisaz, leksplorasyon e inovasyon global. Revitaliz bann platform e avek letablisman bann konsey sa lannen par Minister Lazenek ek Spor pou anmenn plis emansipasyon bann zenn pou partisip dan bann proses fer desizyon lo nivo nasyonal.

Bann swa ki zot fer ozordi pou definir sa sosyete ki nou vini demen. Revizyon dan lorganigram Minister Lazenek ek Spor pou ede ki atraver SNYC avek NSC bann aktivite pou pli byen ganny enplimante. E Minister li i pou konsantre son bann departman avek plis lanfaz lo kote azanda devlopman bann Polisi pou bann zenn, e sa par bann zenn osi.

Youth Empowerment Council, ki'n formen pou anmenn plis lavwa bann zenn dan devlopman Polisi. E sa pou definitivman dekoulo lo nivo lakominote, kot

langazman partisipasyon e valorizasyon i enportan pou siport lavansman. E la mon lans en lapel avek bann zenn pou vin devan. Montre zot talan, e partisipe.

Ledikasyon nou'n ganny dir ki nou paspor pou prosperite, sa mwayen ki talan i ganny dekouper, potansyel i ganny devlope pou ki nou zanfandan i vin sa ki zot anvi vini. Gouvernman in erit en Sistenn Ledikasyon ki dan kriz. Zanfandan ti annan bann mankman dan lansennymen e laprantisaz.

Bann problem anti-sosyal par egzannp mank disiplin, *bullying* tro bokou, lensilt ek lager. Mank respe ver zot *uniform*. Sa ki ti vin avek plizyer stil seve ki pa dezirab pou sa lanvironnman eksetera. Lekol, bann materyo travay ek lenfrastruktir ti limite. Dan ka mon Lekol Plaisance kot mon partaze ek Roche Caiman e Les Mamelles, i enn parmi lekol pli vye ki devret ganny fer renovasyon.

Ansenyan ti anba presyon, paran ti konsernen. Reform ti evidan e imedya, baze lo levidans, lo meyer pratik e bann vre bezwen nou zanfandan. Konsey Minis in aprouv Lalwa pou refer tournen en lazans ki pou vwar karyer e ledikasyon avanse anba nouvo non *Careers and*

Further Education Agency ki ranplas *ANHRD*.

Lazans i ekspekte asir pli bon kordinasyon dan devlopman letid avanse. Amenazman bann *Schemes Scholarships*, donn gidans lo swa karyer ki pei i annan e blanm bezwen dan bann landrwa travay. I osi annan Lenstitisyon *SIDOL* ki pou kontinyen met an plas son servis ledikasyon kontinyel, kot bann pti kour ki landrwa travay ou endividi kapab demande lo plizyer topik.

Avek laprouvasyon e konsey pou reform dan ledikasyon, sa i a permet pli bon kordinasyon lo bann reform dan plizyer staz dan Sistenm Ledikasyon. Fer rekomandasyon pou sanzman e asir lenplimantasyon. E an rezilta annan bann bon sitwayen byen adapte, e byen fonksyonnen.

Premye faz pou komans avek Pti Anfans, primer e segonder. Ankor lanfaz Madanm Speaker, pou ganny mete lo ledikasyon vokasyonnel e teknikal pou asire ki tou bann *skill* e formasyon i ganny valorize. E ki zot aliny avek bann vre bezwen nou lekonomi. E la i fer mwan mazin lekol *SIT*, ki dan lan letid skoler i pa ase.

Anvi ki pei napa ase zouvriye lokal, dan sa lan ansennyan i vwar zot lo

attachment, zot ganny *release* pou partisip dan aktivite nasyonal, *half term* ladan menm. E sa lan i plizoumwenn en staz adaptasyon. E kot zot fini sa lan san vreman aprann gran keksoz.

Mon'n byen akerir desizyon Gouvernman ki'n asir finansman pou konstriksyon en sant letid vokasyonnel e teknikal modern ki pou ekip bann zenn avek bann *skill* pratik. Anmenn konfidans e konpetans nesesser, pou antre dan lemond travay.

Sa pou fer ki i annan en balans ant ekselans akademik ki enportan e osi byen ki bann *skill* pratik. Dan ledikasyon ankor, *STEM* avek laprouvasyon nouvo Lenstiti *NISTI*. Sa pou anmenn bann konpetans elektronik, lentelizans artifisyel, lasyans ek teknolozi dan domenn enzenyer ek matematik ki esansyel.

Pou siport bann ansennyan ver devlopman personnel e targete, 2000mil *laptop* in ganny dir pou ganny distribye lo nivo primer e segonder. Ledikasyon enkliziv, lentervansyon boner e sipor targete pou asir abilite e loportinite. I osi aplikab avek plan Gouvernman pou konstri en Sant Otizm e en nouvo lekol pou zanfann eksepsyonnel.

Bann program i kontinyen ki pou *focus* lo *internship*. Bann program ki pou travay dan vakans, kot bann zanfan ava ganny loportinite travay boner ek leksperyans karyer. An zeneral, en Sistenn Ledikasyon solid ki tou dimoun i bezwen pran son responsabilite, e zve son rol. Paran, zanfan e lafanmir edikater, lenstitisyon edikasyonnel e sosyal, bann group sipor tel ki *PTA* ek *School Council* dan sa monn ki pe sanze rapidman.

Lasistans pou paran ki annan zanfan dan *daycare* ek *childminding*. Akse *childcare* zanfan i ganny ede ek devlopman e ki paan i kapab al travay. Gouvernman pe deza fer provizyon pou R750 pou *daycare* e *childminder* ki anrezistre anba *IECD*. E nouvo provizyon pou ganny fer pou sipor plis pou paran ki dan bezwen. E sa i pou vin atraver en *means test* ki pou komanse sa mwan Fevriye.

Lantrepriz ek loportinite lokal, en kantite nou bann frer ek ser in leve pou kapab met en biznes debout e soutenir sa biznes. Me souvandfwa zot anpaye dan tro bokou papye, finans i limite, laprouvasyon i trennen, napa later, mank gidans, faver par koneksyon, gous i aplike.

E tou sa bann faktè i perdi letan, e zot osi depanse. Dan sa sekter, osi pou annan bann reform pou retir demokrasi par met an plas sistenn ki senplifye bann prosedir pou ki i vin pli fasil, pli vit, pli kler pou komanse e mentenir en biznes. Protez prodwir lokal ki ava ankouraz...

MR SPEAKER

Onorab, i reste ou ankor 2 minit.

HON CLAUDETTE LOUISE

Konpetisyon pli ekitab. Prewar lafason enterakte avek bann antreprenè ek lenvestiser. Minis Finans pou entrodwir bann mekanizm pli for pou amelyor finansman abordab. En lapel pou sirtou bann madanm ki pe ganny ankouraze pou vin avek bann proze inovativ.

Lo kote lagrikiltir, R76 milyon pou ranforsi lagrikiltir soutenab e anmenn plis inovasyon dan sa sekter. Bann ferme pa'n ganny oubliye. Nou problem ki bezwen ganny adrese se lavant an gro pou zot prodwir, par egzanp lotel ki prefere aste fri ek legim enporte ki pli ser ki donn sipor sa bann pti ferme lokal.

Madanm Speaker, i paret mwan ki pli gro problem Lopoziyon se ki zot in realize ki Gouvernman pe delivre lo sa

ki in promet i pou fer. Lepep i ziz nou par nou aksyon, non pa bann gran, gran koze avek bann gro tonasyon ki pa ariv lwen. E nou ki lavwa nou distrik, dan Lasanble osi byen ki avek volonte lapros lo teren. E entervansyon avek nou piblik i a fer ki nou dimoun i ava apresye nou travay.

E pou deside si pou kit nou lanmenm. Sesel pou kontinyen frot zepol avek bann gran pei pwisan, e sa se gras atraver sa bon direksyon e vizyon Prezidan Herminie pou nou travay ansanm ver plis matirite e vizibilite. Seselwa partou ozordi isi Sesel aletranze ki swa dan travay oubyen dan konfor zot lakour atraver zot radyo ek televizyon, rezo sosyal i kapab swiv sesyon Lasanble Nasyonal avek bokou latansyon e mwens stres.

Pep Seselwa i konnen kot i sorti ver bokou lenzistis lalit ek sakrifis. Nou pe kontinyelman sirmont bann defi avek kouraz, determinasyon ek rezilyans. E en pep ki byen entelizan ki'n fer en bon desizyon lo gouvrenans nou pti pei Sesel. Annou kontinyen *trust the process*, ver en fitir pli briyan. E avek lagras Bondye nou pou vwar en meyer Sesel anba sa nouvo ladministrasyon. Mersi Madanm Speaker.

(APPLAUSE)

MADAM SPEAKER

Bon, nou ava aprezan pran en *break* ziska 11er en kar.

(BREAK)

MADAM SPEAKER

Bon, nou ava repran deba lo Leta la Nasyon, lot Manm i Onorab Colin Tirant.

HON COLIN TIRANT

Mersi Madanm Speaker. Bonzour Madanm Speaker. Bonzour tou bann Manm koleg Onorab. Bonzour tou bann dimoun ki a lekout. E en bonzour spesyal pou tou zabitan Glacis.

Madanm Speaker, koman en nouvo Manm dan Lasanble ki ti pe asiste son premye SONA, mon bezwen dir ki mon ti pe atann en diskour realistik, ki ti pou donn en nouvo lespwar nou pei ek nou pep.

Mon ti ekspekte Prezidan Herminie servi sa moman, son premye SONA pou prezant li koman en vre zonm Deta, parey nou dir an angle, en '*Statesman*'. Malerezman, nou'n war en zonm ki'n vin avek en azanda personnel, ranpli avek vanzans ek laenn pour li senpleman rod enpoz son lekor e fer keksoz "*my way*" konmdir gran santer Frank Sinatra.

Sa diskour, avek son promes lenvestigasyon apre lenvestigasyon ti annan en sel bi. Met lafreder parmi nou pep, azir koman en distraksyon, zis pou kasyet sa mank vizyon ki US ozordi napa pour nou pei. Apre sa diskour ki pe envit Seselwa senpleman pou *trust the process*, mon bann zabitan in demann mwan kwa sa *process* ki zot devret krwar ladan?

Akoz sel keksoz ki zot war, se en mank konfyans ki Sesel pou avans devan, me ki o kontrè nou pou koul dan plis lafreder ek lensertitid. Seselwa la deor pe dir sa diskour in ganny prononse avek labous plen, me zorey ek lespri pe ganny problem pou dize li.

Premye fwa mon antann en Prezidan fer son SONA kot menm son sipòter i demande kwa ki in dir e dimoun ki'n menm donn li en vot peye pe dir zanmen ankò. Alor pour mwan i annan en gro problem e mon santi mwan konsènen, akòz mon zoli pei Sesel ki pandan sa dènye 5an LDS in pran swen pou konstri e pou donn sak Seselwa son dinyite, ozordi i dan problem dan batan laroul.

Sesel pe drive e sel keksoz ki sa administrasyon pe sey fer se pour anpandan lo detwa program ki ti deza

dan plan LDS pour sa peryod 2025/2030. E reklanm sa koman bann gran plan US. Dimoun i konpran e war tou sa ki pe arive.

Madanm Speaker, silans en pep, pa vèdir lenbesilite. O kontrè i devret vin en lavertisman byen for pandan sa premye 100 zour. Pour mwan en pei i annan en sel Gouvènmàn. Me se administrasyon ki sanze. Sa kontinyite i tre enportan akòz se sa ki donn en pei stabilite ek en semen progè.

Malèzman ozordi, i resanble ki Dr Herminie i annan en sel azanda, detri sa ki LDS in fer e esey ranplas li avek US. Me sa i enposib pour li akonpli e se sa ki fer nou pei gaspiy letan lo bann pti keksoz ki pa fer sans. Mon a donn zot detwa legzanp.

Ozordi nou tann dir lenvestigasyon. Akòz? Pour li esey akiz Prezidan Ramkalawan? Me malèzman zafer pa mars dapre son plan. En Gouvènmàn i lager e detri travay bann artis lo 2 Moniman Nasyonal ki tou dimoun ti byen apresye, e an plis napa okenn Lalwa ki'n ganny kase.

Zanfan Praslin ek La Digue, i trouv zot letid *A-Level* ganny arete senpleman akòz ki ti komans LDS ki ti komans sa. En nouvo Polisi *style* seve pou

garson i ganny mete zis akòz sa sanzman ti ariv anba LDS e en Minis i anvi zanfàn i swiv son *hair style*.

Bodyguard Prezidan Ramkalawan in ganny arase zot zarm personnel akòz dapre Dr Herminie, zot en menas e en danze. Me la tou zarm in reganny donnen e keksoz i retourn parey avan.

Madam Speaker, sa detrwà legzanp i senpleman montre nou ki letan enportan pe ganny gaspiye. US ti anvi diriz pei, zot in aste zot eleksyon e se zot ki *State House* avek en mazorite dan Lasanble.

Alor, ozordi Lepep Seselwa pe senpleman ekspekte ki zot delivre. Fer parey LDS pandan sa dernyen 5an. Kot ti bon, zot ti anbelir e kot ti bezwen sanze, LDS ti fer li avek konsiltasyon ek respe, san bezwen met vanzans ek laenn koman bann kriter pli enportan.

Se sa ki pou fer nou mars lo semen linite ek progre. Lafason ki zot pe fer pou senpleman anmenn plis divizyon ek mekontantman parmi nou pep. Finalman se dezord ki pou pran kontrol, parey ki ozordi nou pe war pe arive.

Madam Speaker, sa i anmenn mwan lo en pwen tre enportan lo deteryorasyon nou sosyete li menm. I malere pou dir ki lo sa size labi sibstans,

nou'n retourn an-aryer. Ozordi drog in rebran sa plas ki i ti annan avan 2020.

Mon distrik Glacis pa'n ganny eparnye. Mon war nou bann zenn pe ganny akse avek drog tro fasilman. Sa pe osi arive dan bann lezot distrik lo Mahé, Praslin ek La Digue.

Zenn pe pike dan gran kler e lavant pe arive konmsi lo bazar. Konmsi koze, *back to business as usual under US*. I malere pou dir, me bokou bann zenn fanm ek fiy in pran semen prostitisyon. Lanmor avek drog pe kontinyen tap bann kominote. Nou tou nou'n soke avek sa bann *video* ki montre vyolans, zenn pe lager ek gran kouto pe bles kanmarad. Dimoun i menm pe demande 'Isi Sesel sa?'.

Paran pe viv dan lafreyer ki zot zanfàn i riske tonm dan sa fleo akòz bann ki pe fer sa biznes i vin pli agresiv pou vann zot pwazon. Dan tousala mon war ki lapolis pa pe fer sa travay ki zot sipoze.

Mon note ki Dr Herminie li menm in dir ki lapolis osi i dan sa bann tranzaksyon. Kestyon alor se, eski i pe fer en lenvestigasyon, pou regarde lekel sa bann gard e pou pran aksyon apropiye ? Oubyen eski sa size drog ti osi en promes eleksyon avek bann trafiker ek adikt?

Madam Speaker, ozordi mon osi war ki bokou bann

proze *LDS* ki ti ganny kritike pandan kanpanny eleksyon pe ganny laplodisman bann Minis. Mon pa konnen si zot ganny problemn apre, me pour mwan i en lendikasyon ki sa dernyen kanpanny ti baze zis lo fo promes e mansonz.

Mon rekonforte ler mwan tann bann Minis anba Ladministrasyon *US* ozordi sak fwa ki zot koze zot eksplike ki mannyer keksoz ti pe byen marse. Par egzanp, Minis pou Transpor Ms Veronique Laporte ler i ti al fer son bann vizit, i ti enpresyonnen ek travay ki anba ladministrasyon *LDS* ti'n antreprann tel ki Por, Lasose La Digue, nouvo Terminal Ero Praslin, *VTS*, san oubliy sa gran *West Coast Project* eksetera.

E pourtan Onorab Churchill Gill, dan son kanpanny ti dir i pa'n war nanryen ganny fer Praslin. Minis Pierre ek Minis Desaubin pa'n ezite pou aplodi bann Proze Gouvernman *LDS*. Me malerezman Dr Herminie li i war keksoz diferaman e olye rekonnet, i anons sa bann proze koman proze *US*.

En legzanp se sa size later *landbank*, kot Dr Herminie in anonse avek gran konviksyon ki son Gouvernman pou met a dispozisyon lepep 150 kare later an 2026. Letan mon

antann sa, mon bezwen zis fer en pti sourir, aköz parey nou tou nou konnen, sa bann kare later ti'n fini ganny idantifye par Ladministrasyon *LDS*.

Dan mon travay avan, mon konnen ki ti deza annan plan kot pou met fasilite elekstrisite aköz sa bann proze i fer ankolaborasyon avek *PUC*. Anse Royale, Onorab Lemiel i konn byen ki pou annan plis ki 50 kare e ki semen ek lezot fasilite in byen progrese. North East Point, La Gogue, Beolière ek lezot landrwa ti deza dan plan.

Eski pa ti pou bon si dan son kapasite koman Prezidan i ti osi rekonnet ki *LDS* pa'n zis asize, me ki nou'n travay pour sa pei? Madanm Speaker, lo en lot nivo, nou antann konstriksyon lakaz. Nou ganny dir 1000 lakaz pou ganny konstrir pou sa lannen 2026.

Frer ek ser Seselwa 1000 lakaz i vedir 3 lakaz par zour, ki mannyer sa pou arive? Sa i senpleman en bat latet, fodre mwan fou oubyen latet ki pa bon pou kapab kwar sa kalite mansonz. Wi, mwan mon fyer ki mon Ladministrasyon *LDS* in konstri lakaz partou dan pei. Glacis in ganny li son premye *housing estate* anba *LDS* apre plis ki en kantite letan kot zabitan tya pe ganny sere politikman.

Sa 12 *unit Vista Heights* in permet 12 fanmiy ganny zot prop lakour baze lo en sistenm drwat ki pa pran ankonsiderasyon apartenans politik. Mon espere ki sa prensip ava kontinyen, malgre ki deza nou pe antann en lot zistwar kot zot vye sistenm preferans pe reganny entrodwir.

I annan en keksoz ki Seselwa i bezwen byen konpran. *LDS* in fer laplipar bann proze kapital avek larzan Leta pa'n al dan okenn pos endividi. Apre ki *LDS* in navig byen sa pei pou sorti dan sitiasyon *COVID*, nou'n konnen ki mannyer pou servi byen sa larzan pou anmenn soulazman pour nou pep ek devlopman pour pei.

Gouvernman *UAE* ek Sinwan ti'n fer langazman anba Ladministrasyon *LDS* pou konstri lakaz Barbarons ek Beolière. Sa osi pou ganny azoute dan sa 1000 lakaz. Bann lezot proze ki pe terminen osi pou ganny azoute.

Madanm Speaker, nou bezwen adres larealite. Proze lakaz Amitie, Praslin e en lot lo La Digue, 2 proze ki Prezidan Ramkalawan ti met premye pyer, enn avek Onorab Woodcock e lot avek Onorab Uranie, pou osi ganny azoute.

Alor i pa zis en zefor *US*, me en zefor Gouvernman Sesel

anba diferan ladministrasyon. Koz sa ki vre e byen. Me selman i osi enportan pou note ki sete *US* menm ki ti dir kennsel tou proze kapital aköz *COVID*. E la ozordi se zot menm ki pe kont lakaz ki *LDS* in delivre. Eski en zour zot pou vin serye e koz laverite?

Madanm Speaker, sa i vin menm parey avek proze lopital. Anba Ladministrasyon *LDS*, letan Lopital Mont Fleuri ti selebre son 100 an, *LDS* ti fer sa promes e deklarasyon pou fer en nouvo lopital modern pour Sesel. Dr Herminie ti kritik sa proze e menm dan Deba Prezidansyel i ti koz kont.

Pa oubliye in menm koz kont Lopital *St Mary's*, La Digue. Me la ozordi i dir ki Lenn pou donn en nouvo lopital. Lepep Seselwa i bezwen konnen lo ki kondisyon. Konbyen lili? En kado sa? Kote pou konstri? Kwa ki Sesel pe al vann anretour?

Annou pa oubliye ki *LDS* ti pe deza travay avek en konsiltan pou sa proze. E ki sa Komite *Fundraising* ti'n deza ranmas detrwa milyon pour sa proze. Dr Herminie in dir i pou fer lenvestigasyon dan son fon ki Labank Santral. Eski aprezan i pou rann tou sa bann dimoun ki'n fer en kontribisyon zot larzan? I

enportan sa ki'n kontribye i swiv sa pros de pros.

Madanm Speaker, en size ki bokou Seselwa pe koz lo la i size konpansasyon *TRNUC*. Dr Herminie, in dir ki dan Bidze pou annan en sonm R20milyon pour konpansasyon. I annan konplent lo kote viktim e osi lo kote popilasyon.

Viktim i dir ki sa sonm dapre zot kalkil pa ase pou fer en lenpak. E lot kote sitwayen pe demande aköz ki se nou ki bezwen peye? Pa nou ki ti konmet sa bann atosite e krim. Dimoun pe dir ki se parti *US* ki bezwen peye, aköz tou sa bann atosite tel ki touye, tortir, pran later, anvoy Seselwa ekzile, menm bann ki'n ganny bate e pe viv ek en sikatris ou dezabilite permanan ozordi.

E bokou ankor ki'n arive letan sa parti ti o pouvwar. E sa bann lord ilegal ti ganny donner par zot Prezidan. Dimoun pe dir ki sa ta larzan ki zot in benefisye avek, e la ozordi zot pe menm vann sa bann later pour milyon e milyon, se sa larzan ki devret ganny servi pou pey bann viktim.

Bann zenn profesyonel ki pe travay ozordi pe demande aköz ki se zot ki bezwen pey pour krim ki ti ganny komet avan menm ki zot ti ne? Mwan mon pa krwar lozik ladan, e

mon demande ki nou revwar sa size konpletman.

Parti *US* pa kapab zis benefisye lo sa larzan disan, i bezwen pran responsabilite pour krim e atosite ki son zanset in komet. Sa i apel lazistis e tou Seselwa i siport sa. Pa vin dir nou zot pa ti la, parey Prezidan Faure pe vin bat nou latet avek.

Konbyen pti zanfann ki erit byen zot granpapa ki i ti kree avan ki zot ti ne? Me premye keksoz ki ou bezwen fer avek sa ki ou erite se pou pey tou det ou granpapa. Alor *US* i bezwen pey det *SPUP*, *SPPF*, Parti Lepep avan. Mon pe dir zot ki se sa ki Lepep Seselwa i ekspekte.

Madanm Speaker, i malere pou dir ki dan sa premye 100 zour, Seselwa in war en ta promes kase. Sa, parey mon'n deza dir i reflekte sa kanpanny sal ranpli avek fo promes ek mansonz ki *US* in anmennen pou bat latet Seselwa. Mon anvi fer Seselwa mazin, enn de sa bann fo promes.

Tou pansyonner ti pou'n ganny R10,000 Sekirite Sosyal depi Novanm 2025. Ozordi sa R800 pa tou dimoun ki'n gannnen. E *US* pe anmar zot avek en katnan 3 lakle ki zot apel *triple lock*.

Laz pou ganny pansyon ti pou sorti 65an pou vin 63an. Ziska prezan tou keksoz i ankor parey. E sa i vin aköz ti

en promes fasil, me son realite i diferan. Malerezman serten ti donn vot, e ankor pe espere.

Pri bis ti pou desann par R4. La nou pe tann en lot zistwar i malere pou dir. Me an mezir ki sa lannen i deroule nou pou war ankor plis sa bann promes ki tonm dan delo. Seselwa pou dekouver ki rezon ki zot ti vot pour *US* avek lespwar en nouvo lavi an roz ti zis bann bat latet. Sa *cinema* in fini komanse, e mon krwar nou bezwen zis met nou *popcorn* pare.

Madanm Speaker, mon vreman konsernen avek sa lanons det R59 milyon kot *DBS* ki pou ganny *write-off*. Mon rekonnet ki nenport dimoun ki annan en det tya kontan ki sa i arive aköz ti pou retir en fardo lo zot. Me malerezman sa pa en bon sinny spesyalman ki nou pa'n ganny okenn detay lo ki kriter ki pou ganny servi pour *write-off* sa bann *loans*. Me avan tou nou bezwen mazine ki *DBS* i en labank ki li osi i pran *loan* pou kre son kapital.

Kestyon se ki mannyer li *DBS* pou pey son *loan* ki in pran si sa desizyon pou fer ki son kapital pou redwir? Eski li *DBS* i pa pou anfonse limenm? Annou pa oubliy sa ki'n arive avek *PMC* atraver program eleksyon 'Ou prop Lakaz' kot *loan* lakaz ti ganny *write-off* e ziska ozordi *PMC* i dan

problemm finansyel menm pou fer reparasyon ek mentenens lo bann lakaz.

Dezyennman, eski nou pa pe al dan menm direksyon avan kot *loan* bann dalon i ganny *write-off*? Mon pe ensiste ki Biro Oditer Zeneral i ganny demande pou prepar en rapor konplet ki ava ganny prezante avek Lasanble Nasyonnal avek detay kriter pour en *loan* ganny *write-off*. Lekel bann dimoun ki'n benefisye e konbyen zot ti drwa.

La i en lenstans kot nou annan en lorganizasyon an plas ki kapab fer sa lenvestigasyon byen menm e apre prezant avek Lasanble, ki zisteman i la koman sa lenstitisyon ki fer sa *oversight*. Mon pa tya kontan war en repetisyon *SBFA* kot koripsyon ozordi i devan lakour. Aköz sa *scheme* i enn ki pou vin '*for the few, not the many*'.

Madanm Speaker, avan terminen mwan ti ava kontan dir de pti mo lo mon distrik Glacis. Mon profite pou dir ek tou dimoun Glacis - mon repete, tou dimoun, enkli bann ki pa'n vot pou mwan aköz mon la pou travay pou tou zabitan san leksepsyon.

Mon osi profite pou remersye mon Ladministrasyon *LDS* pou tou sa ki zot in reisi fer sa pti git letan pou mon distrik Glacis.

Mersi pour sa 12 *unit* lakaz *Vista Heights*. Mersi pou nou *gear store* pou peser. Mersi pou reouver nou kordgard. E pou bokou bann lezot pti proze ki'n ganny materyalize.

Pandan sa manda ki mon pou la, mon pou kontiny sa travay ki Onorab Esparon in komanse. Mwan mon anvi war mon distrik devlope e parey zot in war mon'n fini komans sa latas. E avek zot sipor ki mon pou gannyen ek tou zabitan napa naryen ki pou bar nou.

Nou pou debout ansanm dan movetan e osi dan bo tan. Annou viv an solidarite toulezour. Mon konklir Madanm Speaker i kler ki poudir nou pei ti dan bon lanmen avek *LDS*. Sa i evidan pou tou sa ki pe ganny dir ozordi.

Sa ki kler se ki ozordi nou pei pe debout obor en presipis trakasan parey bann legzanp ki mon'n fer resorti dan mon deliberasyon aköz sa bann keksoz ki mon pe war pe arive dan lasyosete i fer mwan trakase e i trouble mwan.

Premyerman, en bann promes ki pa kapab ganny delivre, en lasosyete boulder kot nou zenes pe tonm dan drog ek vyolans ki klerman pe ogmante zour apre zour. Ankor kot en lalit kont drog in malerezman fer de pa annaryer zis apre 3 mwan. Mon war en sosyete kot i

annan plis divizyon, napa linite nasyonal, lafreyer pe ravaz sa pep, e fanmiy pe ganny kase zis aköz pwenvi politik.

Sa zafer ek nou pa ek nou, in fini retourn ankor e sa ankor i detwa pa annaryer pou nou pei zis apre 3 mwan ki zot o pouvwar. Mon konnen ki i ankor boner me sa promes 100 zour in fini pase. Tou Seselwa in war lekel promes ki'n ganny garde me sa i en pti gout dimyel ki zot in pas obor zot lalev.

I pa en bon komansman. I pa pe anmenn lazwa, stabilite e prosperite pou nou pei, e nou zanfandemen, e pou nou zoli pti pei. Mwan, mon pou kontinyen siport mon parti pou travay ki nou'n komanse e akonplir avek lagras Bondye.

Mon reste konvenki ki se *LDS* ki meyer plase pou diriz Sesel, se aköz nou ki Lespwar pep Seselwa. Mwan menm osi respekte ki *US* ki pe dirize ozordi. Mwan mon pou kontinyen lager pou drwa sak Seselwa. Mon pou kontinyen fer zot rapel pou delivre lo zot bann promes. E mon pou kontinyen montre pep Seselwa ki nou pou azir koman en Lopozisyon responsab e serye.

Alor an terminen Madanm Speaker, mon dir ek Lepep Seselwa pa perdi lespwar, nou ki la nou pou debout pour zot, lager pour

zot, debat pour zot e rod zot byennet. Parey nou *motto* i dir “ Nou pa pou zanmen les tonbe!”. Mersi Madanm Speaker.

(APPLAUSE)

MADAM SPEAKER

Onorab Nelsia Lepathy.

HON NELSIA LEPATHY

Mersi Madanm Speaker. Avan mon komanse mon ti a kontan pas mon senpati avek lafanmir Asba ki’n perdi enn zot pros Mrs Ernestina Asba. E mon priye ki Bondye i donn zot kouraz pandan sa moman difisil.

Madanm Speaker ankore enn fwa bonzour. Bonzour tou bann Manm Onorab, e tou dimoun a lekout espesyalman bann zabitan sorti dan mon distrik Grand Anse Mahe.

Madanm Speaker, bomaten avan nou’n komanse ou’n eksplike tre byen ki nou travay Lasanble depi yer, ozordi e demen i pou nou donn repons lo diskour ki Prezidan in fer lo Leta Lanasyon pou lannen 2026.

I domaz ki Onorab Roucou pa la, akòz bomaten in sey vin dir mwan kwa ki mon pou dir, e kan ki mon pou koz lo bonm lo sa lensidan bonm ki ti arive Grand Anse Mahe. Me mwan mon ti oule fer Onorab konpran ki bomaten,

mon’n ganny sans pou mwan ekout li tre byen.

E ler mon asize mon analize, i pou dernyen Onorab la anndan ki’n koze ki pou vin ansenny mwan Onorab Balisa-Lepathy lo kwa ki mon pou vin dir, e kan ki mon pou vin dir.

(APPLAUSE)

HON NELSIA LEPATHY

Madanm Speaker, kontrerman avek Onorab Toussaint ki ti koze yer in dir ki li i soke letan i tann larepons bann Manm Onorab LDS. Me mwan mon ti doute ki zot ti pou napa naryen poudir lo larepons Diskour Prezidan.

Konmdir Dr Gedeon “ler ou napa naryen poudir, plito ou pa dir naryen menm”.

(APPLAUSE)

HON NELSIA LEPATHY

Depi yer mon’n tann zot pe konplent. Akòz? Akòz nou Gouvernman pe met larzan dan pos Seselwa. Ki zot dapre zot i apel ouver tiyo. Nou’n tann koz lo *Villa Eden*, nou’n tann *US* isi, *US* laba, kote pou ganny larzan. E nou’n menm tann en pti lapriyer yer Madanm Speaker.

Yer osi mon’n ekout bokou lentervansyon. E Madanm Speaker, mon’n menm tann Onorab *Leader*

Lopozisyon dan son repons dekrir Gouvernman dizour e Prezidan Herminie. E mwan Madanm Speaker, pandan sa dernyen 5an mon pa ti la anndan mwan. Mon ti en Seselwa ki ti la deor, mon'n ekoute, mon'n obzerve. E mon'n viv avek bann desizyon ki Gouvernman sa letan ti pran.

E Madanm Speaker, sa kalite deskripsyon ki Onorab *Leader* Lopozisyon in donnen lo nou Prezidan i deskripsyon egzakt ansyen Prezidan ek son Gouvernman!

(APPLAUSE)

HON NELSIA LEPATHY

Mon'n tann osi detrwa Manm dekrir ansyen Prezidan. E Madanm Speaker, sa bann zoli deskripsyon ki zot in donnen i deskripsyon egzakt nou Prezidan ozordi Dr Patrick Herminie!

(APPLAUSE)

HON NELSIA LEPATHY

Mon bann koleg Onorab dan *LDS*, i annan zis apepre 3 mwan apre eleksyon. E i annan zot, pe komans demann Seselwa pou mazin lo zot desizyon ki zot in fer.

I menm annan ki pe ekspekte war sa ki sipoze ganny fer dan 5an, ganny fer ozordi menm. Mon bann koleg

larout i ankor long, *sit back, relax and trust the process!*

(APPLAUSE)

HON NELSIA LEPATHY

Madanm Speaker, nou travay ozordi koman bann Manm Lasanble se pou nou donn en repons parey mon'n dir pli boner lo diskour ki nou Prezidan Larepiblik Dr Patrick Herminie ti fer lo Leta Lanasyon pou lannen 2026.

E mwan ki form parti sa nouvo zenerasyon politisyen dan nou pei, i avek lafwa, lafyerte e konfidans ki mon pou sezi sa lokazyon ozordi koman Manm Lasanble Nasyonal pou distrik Grand Anse Mahe pou donn mon reaksyon lo sa diskour.

Madanm Speaker, i pa en kwensidans ki nou Prezidan Patrick Herminie in refer lo nou 50enm laniverser Lendepandans sa lannen. Pou bann ki ti annan laz konesans sa zour nou len depandans, sa poem mon mazine avek tit "*Il est Minuit*" i bezwen ankor pe rezonnen dan zot zorey.

Mesaz kler ti ganny pase par nou 2 Dirizan sa zour, ki nou bezwen inifye nou pep. Nou bezwen travay avek devosyon pou nouvo nasyon prospere. E en lapel ti ganny lanse pou sakenn antre nou kre en sosyete kot sak

sitwayen pou fer son devwar, kot personn pa pou mor lafen.

E en nouvo sosyete kree pou Seselwa e pou nou Kreol Seselwa. E sa lapel Madanm Speaker, ankor enn fwa in rezonnen atraver Diskour Leta Lanasyon ki nou Prezidan Dr Patrick Herminie ti fer. Madanm Speaker, nou Prezidan in fer referans ki nou listwar i pa'n enn ki'n fasil, ki ti ganny karakterize par lenzistis, lalit ek sakrifis.

Me ki ti osi ganny formen par kouraz, rezilyans e krwayans ki tou Seselwa i bezwen annan son dinyite e laliberte. Sa lannen, le 1 Fevriye nou'n selebre ansanm avek nou bann pei vwazen Zournen Labolisman Lesklavaz. E nou ki form parti sa nouvo zenerasyon, nou pe bouz devan avek kouraz, dan linite, gide par bann lesan listwar lepase.

E pli enportan Madanm Speaker, nou konsyan nou responsabilite pou kree en Sesel meyer. E se pous a rezon ki nou sa nouvo zenerasyon ki mwan mon form parti nou pe "*trust the process*". Sa proses is i enn ki mon bann zabitan Grand Anse Mahe in osi deside pou met zot konfyans ladan aköz zot vwar ki i annan lespwar ladan.

Madanm Speaker, nou Prezidan in mansyonnen ki nou egziste dan en monn avek

bokou defi. Sa i en monn kot nou koman en Pti Leta Zil avek en popilasyon apepre 130mil, nou napa bokou kontrol lo la. Me kantmenm sa, nou annan en lavwa dan sa monn konplike e boulderse.

Sa i rezon ankor ki pou nou kapab reziste tou bann presyon lo nivo enternasyonal, nou bezwen plis ki zanmen reste ini koman en pep. Koman en pei, nou'n toultan fer fas avek bann defi. Me nou'n debout ansanm, e nou ankor la koman nasyon Kreol Seselwa.

Me ozordi Madanm Speaker, letan ki nou ankor pe enn fwa rekonnet bann diferan defi ki nou fer fas avek. E a sa moman kot nou pei pe pran en nouvo direksyon anba en nouvo Gouvernman, sa ki nou koman en Manm Lasanble e Lepep Seselwa pe demande se ki nou Gouvernman i toultan vin fran e kler letan i annan bann nouvo defi ki nou pe al fer fas avek.

E ki ansanm koman en pep, nou prepar nou pou kapab fer fas avek sa bann sityasyon. Madanm Speaker, i sagrin mwan letan mon antann en Manm Onorab in dir ki mannyer i pe koz lo Parti *United Seychelles*, ki avan ti apel Parti *SPUP*, *SPPF*, Parti Lepep.

E i menm annan Manm Onorab ki'n dir ki se nou ki ti

fer koudeta. E in menm dir ki se nou ki bezwen pey det. Be Onorab, mon pa konn ou laz, me selman mwan ki siport sa Parti *United Seychelles* mon pa'n fer koudeta mwan. Mon pa pe al pey det mwan.

(APPLAUSE)

HON NELSIA LEPATHY

E si nou pe koz pey det Onorab, tasyon letan lenvestigasyon in fini ganny fer lo leksplozyon kot CCCL, lo lensidan ki ti arive dan prizon, nou demann ou pou pey det.

(APPLAUSE)

HON NELSIA LEPATHY

Madanm Speaker, ozordi nou annan en parti ki mwan parti depi ler mon lanfans ki apel *United Seychelles*, e ki dan Gouvernman. E ki ti fer en deklarasyon ki i pou fer dan son premye 100 zour. Dirizan nou parti Dr Patrick Herminie, ki ozordi i Prezidan nou pei menm si i annan ki pa oule aksepte. Ti reisi, ti reasir nou pandan son konpanyi kwa ki i pou fer, e ki i pou fer sa ki in dir.

Madanm Speaker, 100 zour in pase LDS zot pa pe war kwa ki'n arive. Me Gouvernman Dr Patrick Herminie pa'n vin tir tar, i pa'n ezite, in pran aksyon. E in fer

sa ki in dir i ti pou fer pandan sa premye 100 zour.

(APPLAUSE)

HON NELSIA LEPATHY

Yer Madanm Speaker, en Onorab LDS ki ti koze ti dir ki fodre nou koz laverite. Onorab, mon pe al koz en kou laverite la. Ekout mwan byen silvouple. Nou parti in enn ki'n toultan krwar dan byennet nou bann dimoun aze. E asire ki zot viv dan dinyite.

Aprè 5an ki nou bann dimoun aze ti ganny promet R10mil larzan retret ki zot pa'n zanmen gannye. Ozordi anba en Gouvernman gide par Prezidan Dr Patrick Herminie, nou bann dimoun zot larzan retret pe gradyelman ogmante avek en komansman R800.

(APPLAUSE)

HON NELSIA LEPATHY

Ki avan 2030, pou'n ariv R10mil. Bokou nou bann gran paran ki'n komans travay byen boner dan zot zenn tan, ti'n dezapwente ler laz retret ti mont 65an. Bokou ti pe *look forward* pou pran zot retret apre sitan bokou lannen ki zot in donn tou dan zot lanplwa.

I annan ki'n menm kit sa monn, san ki zot in reisi tous zot pti larzan pansyon. Ozordi Madanm Speaker, nou bann dimoun aze i kapab pran zot

retret a laz 63an. Madanm Speaker, nou bann dimoun aze pe *trust the process*.

(APPLAUSE)

HON NELSIA LEPATHY

Pandan konpanny eleksyon an 2020, nou ti tann bokou koze, bokou zoli parol ki ti pe dir pou met larzan dan pos Seselwa. Me ki aksyon parey Onorab Romain ti dir yer, in dir ti rakont en lot zistwar. Premye lannen nou'n tann kof ti vid, nou bezwen koup isi, nou bezwen koup laba.

Me Madanm Speaker, sizo koupe ti zis koup pou Lepep Seselwa. Zot pa ti mazin Seselwa ti pe obzerve, zot pa ti mazin poudir Seselwa ti pe note. Madanm Speaker, apre 5an ki travayer Seselwa ti pe ganny peye zot 13enm mwan saler dapre zot performans travay, kot ti menm annan landrwa travay sirtou dan sekter prive ki pa ti pe menm konsidere donn en 13enm mwan saler.

Kot Desanm nou ti vwar bann paran bezwen swazir ant fer zot zanfan kontan atraver en pti kado. Oubyen zot ti prefer anmas sa pti larzan lapey Desanm ki laplipar landrwa travay parey nou konnen i pey le 20 pou aste sa pti zartifay pou zanfan al lekòl avek larantre. Ozordi avan 100zour dan lofis Prezidan

Herminie in redonn travayer Seselwa son dinyite.

Depi Zanbye sa lannen travayer Seselwa dan sekter piblik e Prive pe ganny zot 13enm mwan saler plen. Se pou sa rezon ki Desanm pandan letan festivite nou ti war bokou plis lazwa lo figir bann pti zanfan e lafanmir Seselwa. A lannen 2019, anba Ladministrasyon Ansyen Prezidan Faure, *long service allowance* ti ganny entrodwir pou ankouraz travayer sekter piblik reste dan zot profesyon pou plizyer lannen.

Mon rapel sa tre byen Madanm Speaker, akòz sa letan mwan mon ti en ansennyan. E mon ti'n deza annan 8an servis. E ki sa letan mwan osi mon ti benefisyè avek en pti *allowance* R500. E mon osi rapel ki mannyer mon bann koleg ki ti annan plis lannen ki mwan ti ankouraze pou reste plis letan, e donn plis ler zot ti ganny sa *allowance*.

Me i somaz, apre eleksyon 2020 sa *allowance* ti ganny koupe, kot bokou nou travayer ti dekouraze. Madanm Speaker, ozordi fyerman mon kapab dir avek mon bann koleg ansennyan, zot *long service allowance* ki ti koupe. E ki mon konnen ti enn parmi bann *incentive* ki ti donn zot en pti lankourazman

pou reste dan sa profesyon ozordi.

E mon konnen ki depi ki lanons ti'n ganny fer, nou bann teacher's in reganny zot *allowance*. E byensir Madanm Speaker, tousala i vedir plis larzan dan pos Seselwa. Travayer Seselwa se pou se sa rezon ki ozordi zot devret kontinyelman *trust the process*.

(APPLAUSE)

HON NELSIA LEPATHY

Madanm Speaker, pri bis i enn bann fakter ki afekte bokou fanmir Seselwa. Pri bis ti menm vin en fardo lo ledò travayer, sirtou bann ki bezwen servi sa mwayen transpor pou kapab al travay. E ki ti pe bezwen pran plis ki en bis pou ariv zot destinasyon.

Bokou fwa mon'n vwar mwan mon bezwen asiste zabitan dan distrik pou met larzan lo zot pas bis pou kapab al travay oubyen pou zanfàn al lekol. Prezidan ti promet ki pri bis pou desann. Bokou ti menm koman demande lannmen eleksyon. Be la Prezidan in anonse, e pri bis in desann.

Madanm Speaker, i annan pou kontan parey mon tann en pe komans grense. I annan i kapab pa kontan, me

sa i rezon akòz nou bezwen *trust the process*.

(APPLAUSE)

HON NELSIA LEPATHY

Nou parti dan son manifesto, in fer nou rapel ki koman en parti progresis nou la pou travay pou lamazorite fanmir Seselwa. E kree kondisyon pou fer zot mazorite epanouir. Madanm Speaker, fodre pa zanmen nou bliye ki nou en pti pei. Nou bezwen kontinyen annan leker pou nou prosen.

Ler enn nou frer i tonm dan rigol, nou bezwen annan santiman kot nou donn li lanmen e tir li dan sa sityasyon difisil. Nou pa kapab koman en pei nou admir nou kont labank oubyen nou kof ki byen plen. Me ou bliye ki annan nou frer ek nou ser ki pa pe ganny ase manze.

Nou bann zanfàn ki pa pe al lekol, akòz paran menm si pe travay pa pe kapab finansyerman prepar zanfàn pou al lekol. Gouvernman Prezidan Herminie, i en Gouvernman ki pou asire ki i annan plis lazistis sosyal dan ou pei. E ki fri nou progre i ganny distribye parmi nou popilasyon.

Annou pa bliye osi ki menm si i annan nou ozordi pe reste dan nou gro lakaz, antoure par nou 4 miray ki par kont nou pa zalou. Fodre pa ki

zot bliye ki zot konsyans pou sarze letan zot war dimoun pe mandyan an deor zot baro. Se pou sa rezon Madanm Speaker, ki nou Prezidan in osi met bokou lanfaz dan son diskour Leta Lanasyon ki nou bezwen ranforsi nou bann lanfaz.

Kot koman en pei nou bezwen asire ki sa ki kapab travay, i al travay. E kot sa larzan pa ase pou zot bann bezwen debaz, Gouvernman atraver sa nouvo sistenm ava ed li. E byensir reentrodiksyon Kart *STC* ava osi soulaz bokou fanmir ki zot mwayen reveni i osi pli ba.

Lanfaz in osi ganny mete lo nou bann zenn ki pe ganny difikilte lanplwa, kot tre byento atraver sa program *URS* zot ava kapab osi ganny konekte direktteman avek marse lanplwa. Kot zot ava kapab ganny bann *training* ek *reskilling*. E ki sa i ava ed zot osi pou anmenn en pti reveni kot lakour.

Pou nou bann zenn ki'n tonm dan adiksyon drog, nou bezwen sonny zot. E nou Gouvernman pou zot tretman, aköz zot osi zot bezwen retournen pou fer gonfle nou lafors travayer dan nou pei. Nou bann zanfan ki pe al lekòl, nou Gouvernman pou asire ki zot annan sipor nesaser.

Koman en ansyen ansenyan par profesyon,

bokou fwa mon'n vwar bokou zanfan ki antre dan Sistenm Ledikasyon avek diferan kondisyon. E *autism* i enn parmi bann kondisyon ki zanfan e menm adilt i bezwen adapte pou viv avek. Wi, nou tann bokou koze lo inclusivity dan ledikasyon.

Me parfwa bann ansennyan i vwar li difisil, menm si san a okenn resours nesaser pou asire ki sa bann zanfan i ganny swen spesyalize pou kapab ed zot viv en lavi e aprann parey lezot zanfan osi i devlop zot talan. Desizyon pou konstrir en Sant *Autism*, pou bann zanfan *autistic* i enn ki pou soulaz bokou paran ki annan zanfan avek sa kondisyon, kot zot a kapab ganny sipor lo ki mannyer pou siport zot zanfan, e ed li devlop parey lezot zanfan.

Avek sa sant koman en sipor avek nouvo *laptop* ki bann ansennyan pou gannnen. E avek lansman proze *SMART Education*, mon swete ki sa i ava osi ankouraz bokou plis zenn pou zenn sa karyer lansennnyman. E ki ava ed redwir lakantite mankman ansenyan dan nou bann lekòl kot lekòl dan mon distrik pa'n ganny eparnyen.

Madanm Speaker, mon'n kontan tann Prezidan osi anonse ki son Gouvernman pou ranforsi gouvènanans bann

lekol, pou ki nou bann lekol i vin en landrwa laprantisaz. E en landrwa kot pa zis zanfan, me *staff* i osi santi zot an sekirite. E ki zanfan i ava respire pou aprann.

Madanm Speaker, sa pti pei ki nou ete ek sa pti popilasyon nou pa kapab perdi okenn nou bann zanfan. Tou zanfan i annan son kapasite, e son abilite pou li devlope. E nou Sistèm Ledikasyon i la pou fer sir ki zot ganny dirize dan sa profesyon ki zot anvi pran pli tar.

E Madanm Speaker, koman en Gouvernman nou la pou travay pou lamazorite, me pa zis pou en pti minorite. Sa i rezon akòz Madanm Speaker, ki lamazorite Seselwa ozordi pe *trust the process*.

(APPLAUSE)

HON NELSIA LEPATHY

Madanm Speaker, nou Prezidan in masyonn plan anbisye son Gouvernman pou konstrir en pti pe plis ki 2000mil lakaz ziska 2030. Malgre tou zefor ki'n ganny fer bezwen pou lakaz i reste en priyorite pou Gouvernman.

Atraver program lakaz, nou pou asire ki bokou plis fanmir Seselwa enkli zabitan dan mon distrik, pou kapab debout kot lorloz pou en bon rezon. Kot zot ava tap lanmen lo zot lestoman e deklare ki zot

osi zot annan en par ladan, akòz sak lakaz ki nou vann en fanmir ki ti napa nou fer li vin en propriyeter.

Nou fer li annan en *asset*, parey nou dir an Kreol son prop byen. Kot son zeritye ki pou vin apre li i ava osi erite. Alors, mon ava profit sa lokazyon pou mwan koz avek bann ki pa ankor fer zot laplikasyon pou lakaz, pour bann ki'n fini *apply*, me ki pa ankor komans fer zot kontribisyon oubyen ki pa pe fer zot kontribisyon regilyerman pou fer li silvouple.

Madanm Speaker, letan fanmir Seselwa pou ouver Konstitisyon Larepublik e li lo *right of property* i avek en sourir, e en gran lazwa lakonplisman ki i pou santi ki sa Gouvernman Prezidan Herminie pe travay pou fer li realiz son rev. E sa i en lot rezon akòz ozordi nou war bokou plis fanmir Seselwa pe *trust the process*.

Madanm Speaker, mon pou osi sezi sa lokazyon par lefe ki nou pe koz lo devlopman lakaz ki nou pa devret pe negliz bann proze spesyal pou devlopman propriyete endividyel oubyen propriyete Leta. I annan en kantite landrwa dan Sesel, kot i annan zis 1 lakaz lo en bout later. Avek devlopman sistèm desarz modern, nou annan sa

kapasite ozordi e a lavenir atraver bann finansman spesyal pou fer en lakaz vin 2 ek 3 ou menm 4 lakaz lo menm *footprint*.

Sa mon kapab donn en legzanp, dan flat kot lekol Grand Anse Mahe e osi dan bann later Landbank kot i annan zis 1 lakaz ki egziste lo en bout later. Lazenés i pilye nou sosyete, akòz se zot ki pou batir fitir pou nou pei demen. Nou Prezidan i krwar dan lazenés. Se pou sa rezon ki Gouvènmàn in met an plas en nouvo striktir pou amelyor devlopman lazenés dan nou pei.

Sa i kot bann Polisi ava ganny devlope, pou donn sipor nou bann zenn sirtou dan domenn sport ek kiltir. Sa i ava ganny fer atraver en *Youth Empowerment Council*, ki pou atase avek Biro Minis. I ava osi donn zenn sa sans pou kontribye anver zot prop devlopman.

Bokou fwa zenn i santi zot pa pe ganny tandé, e ki zot ganny neglizé dan tou laspe. Madanm Speaker, nou bezwen rod fason pou *empower* nou bann zenn. Nou bezwen rod fason pou ki zenn i kapab deside ki i anvi fer e kontribye pou ki lazenés Seselwa i bouze.

MR SPEAKER

I reste ou ankor 2 minit Onorab.

HON NELSIA LEPATHY

Yes Madanm Speaker. sa i ava osi ede pou war plis zenn motive, bokou fwa zenn i panse ki napa isi, oubyen napa laba pou zot. Me la zenn i ava deside. Ou sa zenn dan mon distrik ki pe mazin komans ou prop biznes oubyen agrandi li.

Ou ki'n dekouraze akòz laplikasyon i pran bokou letan pou approve oubyen pou ou ganny en larepons. Prezidan in anonse ki i pe met an plas bann sistèm laprouvasyon elektronik ki pou senplifye bann prosedir ki i vin pli fasil pou komanse e mentenir en Bidze.

Dan son ladres, Prezidan in lans en lapel avek bann fermye ki R76milyon pou ganny mete dan en fon lagrikiltir pou sa premye kar 2026, pou fasilite akse en laliny kredi. E pou ede pou fer laplikasyon *loan* vin pli vit e pli senp pou zot. Kot i ava osi ede donn zot en lasistans pou fer bann diferan proze lagrikiltir.

Bann fermye Grand Anse Mahe, *trust the process*. Ler mon dir fermye Grand Anse Mahe, mon pe adres ou sa fermye ki prodwir sa bann bon fri pou lakominote, ou sa fermye ki prodwir sa bon

lavyann, dizef pou nour
popilasyon nou distrik.

Mon pe dir ou sa fermye
ki plant gro manze, mon pe osi
mazin ou sa fermye pti
Barbarons ki menm si ou
ganny afekte par diferan
fakter, toulezour ou
kontinyelman persevere pou
prodwir e nour
popilasyon. Mon pa'n oubliy
bann La Misère, ki toultan
asire ki nou annan ase kreson
ek sousout pou ede gard nou
popilasyon an bonn sante.

Ou osi sa zenn ki anvi
antre dan domenn lagrikiltir
loportinite i la, se zi li zis *trust
the process*. I mon rev
Madanm Speaker, pou vwar
mon distrik Grand Anse Mahe
vin en vre distrik lagrikiltir. E
letan mon regard travay ki
Gouvernman *United
Seychelles* pe fer, mon fini war
sa ki pe reve tir Gouvernman
United Seychelles o pouvwar
2030 zot pa pou zanmen leve
dan sa rev!

(APPLAUSE)

HON NELSIA LEPATHY

Madanm Speaker, i annan
nou ki krwar ki pa vo lapenn
ki nou zet en lizye lo lepase.
Me pou nou kapab planifye en
lavenir ansanm i absoliman
neseser ki nou zet en regar lo
serten difikilte e serten defi ki
nou'n fer fas avek.

Nou bezwen toultan reste
konsyan Madanm Speaker, lo
bann prensip ki'n gid nou lo
bann diferan keksoz ki'n
definir nou progre koman en
nasyon kreol Seselwa pandan
50an. Pou terminen i avek fyer
e lantouzyazm e
determinasyon ki mon deklare
devan nou Lasanble ki nou
zabitan Grand Anse Mahe,
nou pe travay dir pou fer sir ki
Prezidan Dr Patrick Herminie
ek son Gouvernman i reisi
enplimant son manifesto.
Akoz Madanm Speaker?

Sa ki kontan i kapab
kontan. Sa ki pa kontan i
kapab pa kontan, *but we trust
the process*. Mersi.

(APPLAUSE)

MADAM SPEAKER

Onorab Valdana Sultan.

HON VALDANA SULTAN

Mersi Madanm Speaker.
Bonzour Madanm Speaker.
Bonzour bann koleg Onorab, e
tou dimoun a lekout. Madanm
Speaker, mon pe seye *sit back
e trust the process* me i paret
mwan *network* pa bon *it is not
processing well*. Alor, mon a
sey pran laparol.

(APPLAUSE)

HON VALDANA SULTAN

Madanm Speaker, Mardi le 27
Zanvyé nou Lasanble ti zenn

pou nou ekout Prezidan Patrick Herminie koz lo Leta nou nasyon. Ki vre letan nou nasyon? En kestyon ki bokou dimoun ankor pe demann zot lekor.

An ekout an Prezidan Herminie eksplik nou ki Leta nou Nasyon i ete ozordi. I osi fer nou demann nou lekor ki letan nou nasyon pou ee 2an di si. Eski nou pou pli meyer? Oubyen pli dan mal? Mwan Madanm Speaker, parey bokou lezot dimoun souvan mon efreye ler mon reflesir profondeman lo sa ki nou'n ganny dir.

Laverite se ki Leta nou nasyon pa bon. E si nou kontiny lo sa menm semen, non selman ki nou lekonmi pou degrengole. Me lo kote sosyal, nou sosyete i riske vin pli vyolan e dezord pou rennyen. Konmdir sa santer "Zafer pa bon". Madanm Speaker, ou konnen letan mon antann Prezidan dir nou ki nou pei in ganny skilpte par lalit lenzistis, sakrifis. Mon kontan ki in omwen rekonnet.

Mon kontan ki in omwen rekonnet ki apre koudeta 1977, kot pei ti pe ganny dirize par en *SPUP*, pli tar *SPPF*, Parti Lepep ki ozordi zot *US*, wi, nou'n ganny skilpte par lenzistis. Lenzistis lo nou bann frer ek ser Seselwa ki pa ti krwar dan zot prensip. Pou bann ki pa'n siport zot parti,

alor zot ti bezwen ganny bate, torture, egzile e menm touye.

Wi, serten zot ti bezwen fer sakrifis. Sakrifis ki ti kout zot pou kit zot fanmir e zot pei *cherie*, e al egzile pou prezerv zot lavi. Ozordi se zot ki pe refer lo la koman bann viktim *TRNUC*. Sanmenm sa bann ki'n soufer anba sa parti, e ozordi sa Gouvernman ki en desandans Parti *SPUP*, *SPPF*, Lepep pe demann zot ek zot bann pti zanfan pou travay e pou kontribye pou pey zot lekor en konpansasyon. Parey Onorab Balisa-Lepathy fek dir nou.

Mon pa konn laz Onorab, me selman li i pa ti fer koudeta. Be sa bann pti zanfan la ki pe kontribye pou pey taks. Eski zot osi zot ti fer en koudeta? Zot pa'n fer koudeta zot e ni mwan mon pa'n fer koudeta.

(APPLAUSE)

HON VALDANA SULTAN

Madanm Speaker, mon pe dir zot pe pey zot lekor aköz zot menm ki'n kontribye atraver taks. Zot menm ki pe anmas larzan ki ozordi nou pe dir pou servi pou pey zot. Eski i byen sa? Eski i normal? Bokou dimoun la deor menm ki zot pa'n en viktim, zot war ki sa i mal.

Prezan Prezidan Herminie i a dir nou pa get

deryer avek regre. Ki mannyer nou fer sa? Ki mannyer nou fer sa ler nou annan nou pros ki'n kit nou aköz zot bann atosite. Ki mannyer nou fer sa, kan nou konn fanmir ki sa boubou pa pou zanmen geri. Sanmenm sa bann dimoun ki en lepok zot ti dir nou zot annan en leker pou tou Seselwa.

Zot ti "Leker dan Leker". Zot ti "*Together*". Me sa fodre nou napa leker pou nou kapab bliy sa soufrans. Madanm Speaker, selman mwan mon a pran konsey Prezidan Herminie, ler i dir mwan bouz devan avek kouraz gide par bann leson lepase, aköz sanmenm sa bann leson ki mon pou bezwen kontinyen les gid mwan, mon zanfán, byento pti zanfán. Sa bann leson lepase ki dir avek mwan mefye ou sezans, zot en bann move dimoun.

Madanm Speaker, Mr Prezidan in koz lo sa ki nou apel lakonplisman son premye 100zour. In fyerman rapel nou ki zot pa'n tarde, zot pa'n ezite. Zot in montre en determinasyon san presedan. Vre zot pa'n tarde. E ni menm ezite pou pous Seselwa dan zot lanplwa, zis aköz zot afilyasyon politik. Zot pa ni ti menm onte pou vin dir lo *social media* lo medya nasyonal osi. E serten zot siporter i war ki sa i byen. I

annan ki menm dir i tre byen. Granmoun i dir "Tour a tour, sakenn i annan son tour."

En Gouvernman ki ganny lazwa lo tir manze lo lasyet son pep, dan lasyet en fanmir apre zot a vin koz nou zot vin met plis larzan dan pos Seselwa. Me kan? Ozordi Lepep Seselwa i bezwen rekonnet ki sa bann aksyon pa ale avek sa ki'n ganny dir dan konpanyi.

Tou dimoun ti sipoze annan en lanplwa. Me i kler ki Gouvernman *US* pa krwar ladan. Dimoun in zis ganny montre laport malgre zot konpetans. Par egzanp Minis Laporte ti dir klerman lo medya, ki zot in termin kontra Mrs Sarah Romain pa aköz i pa konpetan, me aköz i tro pre ek lot kote. Pa onte en, aköz son frer ti *VP* e son msye i en *MNA LDS*. Eski sa i byen menm? Byensir non.

Me lo nou kote, nou kontinyen montre nou solidarite avek Mrs Romain e tou lezot Seselwa ki'n vin viktim ek bann ki pou ganny viktimize dan lavenir par Dr Herminie ek son ladministrasyon. Kouraz, konmdir koze i annan en Bondye ki dormi vant anba. I pa dormi vant anler, i get tou son zanfán. Mon osi mon montre solidarite anver nou koleg Onorab Romain e tou

bann fanmir sa bann viktim sa premye 100zour.

(APPLAUSE)

HON VALDANA SULTAN

Letan ki Prezidan Herminie i dir nou, in reaffirm rol nou larme par dizourd sa lekip travayer sorti dan lapolis ek militer ki li ek son bann lezot dan son tim, dan son parti in deklar koman Tim Ibou, i pa dir nou en keksoz. I pa'n dir nou ki in reorganize, in restriktir Tim Tonton Makout parey sa ki ti egziste.

Gras a Tim Tonton Makout ki ozordi nou annan *TRNUC*. Zot restriktire, zot reorganize, zot re anploy bann Sef Makout ki'n ganny trouve koman bann *perpetrators* dan li menm kont rezolisyon *TRNUC*. Mon ti a kontan konnen ki Prezidan Faure i annan pou dir koman *Chairman* Group Linite, aköz se zot ki spesyalize bann Tim Makout. Pou diriz sa tim ki ti teroriz dimoun, koz tou sa bann atosite.

La ki zot in re anploy zot bann Sef Makout, bann Sef Makout al recruit bann nouvo pti Makout. E byento nou pep pou pe pler menm larm ki zot ti tann zot gran pye plere si i pa pli grav i pli bokou. Madanm Speaker, *US* in menm admet ki zot parti ti annan Tim Tonton Makout. E

ki zot in fer bokou aktivite kriminel. Mon a dir zot aköz mon dir sa. Madanm Speaker, ler en keksoz i fatig ou konsyans parfwa ou koz lo la san ki ou realize. Dan son *speech* Prezidan in dir e mon site "Se pou sa rezon ki investigasyon dan tou sa bann aktivite kriminel par sa group Tonton Makout pou komanse byento". Retir sitasyon.

Zot war? Zot ki'n dir poudir zot ti annan Tonton Makout ki ti responsab kriminel. E sanmenm sa ki mon dir ki zot admet e konsyan ki se Tim Tonton Makout ki responsab bann aktivite kriminel. Parey in ganny dir par enn mon koleg. Prezidan Herminie in decide sot sa bout dan son *speech* ler i ti pe lir.

Me dan versyon ekrir ki Lasanble in donn nou i annan ladan, "*Les paroles s'envolent, l'écriture restent*". Prezidan in koz lo fer desann pri bis par R2. Me avan eleksyon par sa ki i ti promet. Pri bis in sipoze in fini ariv R6, sa en lot bat latet ankor. Seselwa nou pa war menm? Oli logmantasyon saler ki i ti pres lo la dan preske tou son bann *rally*? Zot in prese lo logmantasyon saler.

La ozordi ler i fer son ladres Leta Lanasyon, mon bann frer ek ser nou'n ganny

en logmantasyon R2 dan sa premye 100zour. Sa i zis pou bann ki servi bis. Prezidan in dir zot, in dir avek nou ki mannyer i pou *write-off* serten *loan* spesifik. Kote ou war ou ladan? Eski pe get ou zentere parey ou ti ganny fer krwar?

Loan lekel ki pe al ganny *write-off*? *Loan* serten bann zanmi pros, bann ki'n byen balbis Gouvernman LDS sak fwa ki zot in ganny sans? Bann ki'n siport bann konpany sal, e ki zot in fer gro promes avek? Ou ki'n pran en pti *loan* avek labank ou'n ganny dir ki diskisyon pou fer avek labank pou redwir to lentere.

Ou sa manman, ou sa papa tousel ki pe eskente pou pey ou lakaz e mentenir ou lakour, eski ou war ou ladan? Sirman non. Eski ou osi ou pa ti ava apresye en *write-off* lo ou *loan*? Mon bann ser ek frer nou tonm dan tim *for the many* nou. E sa laranzman ki la, sa zafer *write-off loan* i *for the few only*.

(APPLAUSE)

HON VALDANA SULTAN

Se sa vre Leta nou nasyon. Nou demann ki i annan latransparans dan sa zafer *write-off*, fer li kler pou nou. Akoz nou anvi konnen ki mannyer pei pou abzorb sa det ki zot pe *write-off*. Anfen

larzan i annan, LDS in kit kof plen, donn bal. An pasan mon ti a kontan atraver ou Madam Speaker, si Onorab Lemiel ti a donn nou en detay sa kof plen ki Prezidan Faure ti kite. E osi sa lekonomi solid.

Madanm Speaker, en keksoz ki Gouvernman LDS ti met lanfaz lo la se ankouraz tou dimoun, tou dimoun pou kontribye dan devlopman nou pei. E sa se par antre dan en lanplwa kot pa zis pei ki benefisye me zot osi zot a benefisye. Letan ki nou Gouvernman LDS ti dir sa, letan ki i ti pe ankouraz tou dimoun pou pran en lanplwa formel US ti sot anler zot ti dir'

Nou pa oule okip nou pep, nou pa oule donn dimoun *welfare*. Ki mannyer sa madanm ti dir dan *rally*? I pe esper tiyo ouver. Se travay ki donn nou lavi. Se travay ki donn nou, nou dipen toulezour. Sa depi later i later i la sa, nou Kreater menm ki'n dir nou. Ozordi apre ki zot in fini anbet Seselwa e ganny eleksyon, akoz serten ti krwar ki tiyo pe al ouver gro tiyo.

Prezidan i sanz *tune*, i dir nou fodre nou tou nou travay, fodre pa ki zos lanmwatye ki travay. Sey dir mwan, be pa sanmenm ki Gouvernman LDS ti pe sey enkilke dan nou pep? E ki zot, zot ti konplent?

(APPLAUSE)

HON VALDANA SULTAN

La zis akòz zot in *package* li byen zoli, e zot vin dir nou an servan bann term “ki lobzektif sepa depandans me lentegrasyon dan pozitivite”, zot oule fer nou krwar ki en keksoz nouvo ki zot ki’n anmennen?

Non, sa i sa ki *LDS* ti pe enkilke dan nou pep. E bokou dimoun ti’n rantre dan lanplwa. Malerezman la, nou pe retourn an aryer avek serten desizyon ki zot in pran. E nou war nou pei pe al vin en *welfare state*, kot pli gro parti nou Bidze i al dan sa direksyon.

Zot vin koz ek nou, lo nou pei i bezwen annan stabilite en keksoz ki ni menm zot Gouvernman i napa. Stabilite ki pou Seselwa, i kontinyen travay pou ganny en bouse manze. Selman zot menm ki pe kontinyelman pous dimoun dan travay. Nek zot dir en parol, apre fer en lot. Zot parol pa ale avek zot aksyon, sanmenm ki nou apel move zans. Gran prometer, pti doner!

Madanm Speaker, vre Leta nou Nasyon se ki nou annan e ki nou’n vin en pei lanket. Olye *focus* lo bouz pei pli devan, sa Gouvernman pe rod fer lanket dan tou keksoz. Fer lanket dan bay lo Assomption, lenportasyon

zarm, leksplozyon CCCL. Mon krwar in nonm sepa 5,6 lanket. 8?

Sa i zis bann distraksyon ki zot pe enkapasite pou dimoun pa war zot. Me Seselwa lizye i ouver, zot menm zot fek dir Seselwa lizye i ouver zot nepli dormi boner. Tousala, sa bann Komisyon Lanket ki zot pe fer, tousala i bann form pou zot form bann Komite donn zot bann dalon en larzan.

Selman kantmenm mon’n dir in donn nou sepa 6 ou 7 lanket, i annan ankor lanket ki zot osi zot bezwen fer. Koz ek nou dife *Mission Lodge*. Mon nonm sa enn premye akòz i dan mon distrik. Koz ek nou lo destriksyon stati kot Katedral. Koz ek nou lo sa bann *Syndicate* ki’n disparet apre eleksyon. Tousala ti a bon pou fer lanket lo la. Akòz zot pa fer? Pangar kourpa a kapab dan zot zaviron?

La mon mazine Prezidan Herminie ti osi dir nou dan enn son bann *rally* – “Si nou anvi konnen lekel ki ti deter lekor Takamaka, vot pou li. “Mwan sirman mon pa’n vot pou li mwan. Me bann ki’n met li o pouvwar, mon mazine ki zot osi zot pe esper sa nouvel parey mwan. Nou a espere, sa enn mon krwar pa si zot bezwen al fer en lanket akòz Prezidan i paret i deza annan sa lenformasyon.

Alors, mon mazine tre byento i ava fer en lanons lo *SBC*. Akoz i pa fer en lanons lo *SBC*? Koze, koze, e koze zis pou bat latet serten zot bann siporter. Sa i fer lapenn.

Madanm Speaker, vre Leta nou Nasyon. Ki vre letan nou nasyon? Vre Leta nou Nasyon, se ki ozordi nou annan en Gouvernman krab solda. I napa son prop plan li. Zot in vini e zwenn reform dan ledikasyon ki ti'n deza met ater, Plan pou nouvo lopital. Plan pou plis lakaz, deza e landbank met ater par Gouvernman *LDS*. Zot pran tousala, zot *package* li, anpakte li byen menm zoli riban lo la, zot re vann li avek nou konmsi i en nouvo keksoz. Me nou lo sa kote latab nou konnen, zot a kontinyen anbet lezot dimoun. Se sa ki nou apel en Gouvernman krab solda. Zot zis vini antre dan en zoli lakok zot kanmarad. Madanm Speaker, se zans ou a krwar zot in vini san annan okenn nide ki direksyon zot anv ale. Ki direksyon zot anv anmenn sa pei. Prezan la ki zot o pouvwar, ou a krwar zot pa ni ti asire si zot pe vin la, zot in ariv la. La ki zot o pouvwar prezan zot pe kase aranze konmsi zot pe zwe lego.

Sanmenm ou war nek zot dir en keksoz apre demen zot bezwen retournen, e dir nou pa pou fer prezan. Zis parey in

arive ek sa zafer gard ek aksidan, lanmizik for dan transpor, parey lapwentman Sabry Khan. Fer bann gran seremoni sermantasyon, apre *LDS* i bezwen vin dir zot me pa koumsa ki fer sa. Oli zot bann koneser pou gid zot?

Madanm Speaker, nou'n osi tann koz lo laz Sekirite Sosyal e promes R10mil pou sak nou bann trwazyenm az. Mwan, mon Valdana mon napa okenn problem ki nou bann dimoun aze i ganny plis larzan, akoz zot in travay pou sa pei. Me kestyon nou bezwen demann nou lekor se, eski sistenm i kapab soutenir sa kantite dimoun ki pou benefisye pli boner?

Promes 10mil avan eleksyon. Me la *triple lock* pe fer li ariv 10mil an 2029. Ti'n dir deswit sa pou fe sa 10mil. La zis avan 2029 avan eleksyon. Tousala dan zorey i sonn byen me i reste en promes. I reste en promes akoz nou pa'n ganny prezante avek okenn plan ekonomik solid ki montre nou kote, ki mannyer nou pou ganny sa finansman ki soutenab dan sa manda pou zot fer li.

Ler Prezidan pe dir donn bann dimoun aze zot dinyite par fer zot laz Sekirite Sosyal desann, fer sir apre ou pa pran zot dinyite ler nou pei pa kapab soutenir sa depans. Madanm Speaker, Mr

Prezidan in vin dir nou ki zot pe vin ranforsi proteksyon sosyal pou ki lasistans i ariv a tan.

Gouvernman *LDS* ti asiste dimoun, kantmenm ozordi zot pe fer dimoun krwar ki personn pa'n ganny asiste anba Ladministrasyon *LDS*. Se avek zot bann plan sabotaz ki zot in met retar avek bann *file*. Pa bliye Prezidan Ramkalawan in deza mansyonnen ki plis ki 300 *file* ti ganny dekouver kasyet dan en lofis ki pa'n ganny travay lo la pou plis ki 3 mwan.

Eski nou pa ti anvi asiste dimoun? Oubyen ti annan travay malis e sabotaz ki ti pe deroule zis pou fer sa pep fristre avek Gouvernman *LDS*. Madanm Speaker, kantmenm Prezidan Herminie in dir i pe ranforsi proteksyon sosyal fodre nou osi realize ki in vann zot sa avek en *warning*, ki pa pou al pou lontan.

In dir nou ki nou pa pou zanmen kapab mentenir nou program sosyal si nou lekonmi pa for e krwasans pa ogmante. En *warning* sa. Savedir i ti byen ki *LDS* ti pe osi ranmas larzan pou ki krwasans i ogmante. Me selman lafason ki sa Gouvernman *US* pe depanse, mon pa war lekonmi pe vin for avek zot.

Lo size lasante, Madanm Speaker nou'n tann dir ki zot

in erit en sistenm Lasante ki anba e presyon konsiderab. Zot koz lo la konmsi tou ti parfe, ler nou *LDS* nou ti antre dan lofis. Nou osi nou'n zwenn li avek defi, e nou'n vini nou'n zwe nou rol pou dres bann bout ki nou kapab dan sa 5an ki nou'n dan lofis ki zot pe koz lo la konmsi nou'n fer 50an dan lofis.

Omwen nou, nou'n kit en kof plen ek en lekonmi stab pou zot ki zot Minis Finans ti admet. Zanmen dan sa 5an ladministrasyon *LDS* in demann son pep pou ser sang. Konbyen fwa nou'n bezwen ser sang anba zot ladministrasyon? Anba ladministrasyon zot gran per, e byento nou pou ganny dir ankor aköz *warning* in fini donnen ki pou annan bann moman difisil. Prezidan in dir nou ki pou annan bann moman difisil.

Madanm Speaker, noun tann koz osi lo Lasante Mantal. Wi, napa naryen mal pou pran swen avek lasante mantal ou pep sirtou la kot nou pep pe viv dan lenkyetid, dan lafreyer ki zot kapab perdi zot bouse manze demen bomaten.

Adiksyon ek troma drog in vin an labondans. Partou kote dan Sesel. sa osi parey Prezidan in dir i anmenn lasante mantal. Me sa ki Prezidan pa'n dir nou, se ki

manner nou pou asir bon lenplimantasyon sa lazans. Eski nou annan ase mende kalifye sirtou Seselwa pou mentenir sa program. Oubyen zot pou bezwen al pey plis etranze pou fer li marse.

Mon pa pe dir ki nou pa bezwen etranze. Me si nou pa pe train nou prop Seselwa pou osi pran sa bann pozisyon, nou pei pou toultan pe anvoy nou larzan aletranze.

Letan mon pe koz lo annan plis nou bann profesyonnel Seselwa dan domenn tret maladi mantal, nou bezwen osi mazin zot reminerasyon, en fason ki sa i ava ankouraz zot pou reste dan sa profesyon. La Madanm Speaker, mon mazin osi bann lezot Profesyonnel Lasante, bann *nurse*, *assistant nurse*, bann travayer dan diferans nouvo servis danter, bann swen dirzans e lezot ankor san oubliy lezot nou bann ansennyan. Akoz sa ki nou pa realize se ki sa bann luvraz, sa bann travay i nob e pa fasil.

Mon a esper Bidze pou war ki i annan pou zot ladan, akoz pa oubliye ki letan Mr Sebastien Pillay ti asiz la dan sa sez kot Onorab Georges i ete ozordi, i ti koz lo *scheme* pou tou bann travayer. Tanzantan i ti koz lo *schemes*. *Scheme*, *scheme* pou fer *scheme* travayer. La nou a gete ki nouvo *scheme* ki pou

annan. Nou ki pou demann zot *scheme* prezan. Vey nou.

Prezidan in koz lo sipor pou bann viktim vyolans domestik. Mon i a ekspekte letan i pe koz lo sipor pou bann viktim vyolans domestik ki i ti a osi prezant nou avek plan son Gouvernman pou kre en sant pou abrit bann madanm ek zot zanzan ki soudan i sibir vyolans domestik.

Souvan bokou zot napa swa, zot bezwen retourn dan sa menm lakour e priye ki tanto keksoz a pli kalm. Swa se al abrit kot en Manm fanmir pou detrwa letan. Petet zot a demann mwan bann zonm, me nou konnen i annan en landrwa pou bann zonm ale, akoz i annan bann zonm osi ki pas dan vyolans domestik.

MADAM SPEAKER

Onorab ankor 2 minit.

HON VALDANA SULTAN

Me non Madanm Speaker, Prezidan i dir nou ki i pou reouver demars pou konstri 4 Sant Reabilitasyon pou drog san dir nou kote i pou ganny larzan pou sa 3 lezot, akoz LDS ti'n fini ganny finansman avek UAE pou sa enn ki pou ganny konstri vizavi Klinik English River.

Eski bann ki sibir vyolans domestik pa bezwen ganny reabilite pou ki zot osi

zot kapab get lavi avek nouvo souf. Tousala i vin Lasante Mantal menm. Parey in dir nou, i pou reouver demars savedir en demars ki ti'n deza komanse anba Ladministrasyon LDS.

Ankor Madanm Speaker, se sa Leta nou Nasyon. Nou annan en Gouvernman krab solda. An konklizyon Madanm Speaker, les mwan koman en ansenyan lasyans par profesyon dir ki mon fyer ki LDS ti parey bann *beavers*, akoz rol *beavers* dan ekosistenm i enn tre esansyel.

Zot en bann enzenyer ekosistenm ki kree e ede mentenir en lanvironnman rezilyan. Zot fer danm, zot danm ki zot fer i pas en bann sibstans ki polye delo, redwir lerozyon later e anmas delo pou letan lasesres. Sa i vedir ki LDS in en vre enzenyer pou sa pei!

(APPLAUSE)

HON VALDANA SULTAN

Nou'n mentenir sa pei lo en bon semen. Nou'n evalye e pran bann risk ki ti nesaser. E parey ler bann *beavers* i fer danm pou anmas delo pou letan lasesres, nou'n met larzan 2 kote pou letan dir. E se sanmenm sa ki zot pe rezouir lo la. Mersi Madanm Speaker.

(APPLAUSE)

MADAM SPEAKER

Bon. Nou ava aprezan pran en break ziska 2er.

(BREAK)

MADAM SPEAKER

Bon, nou ava kontinyen avek deba. Onorab Alvin Grandcourt.

HON ALVIN GRANDCOURT

Bonn apre midi Madanm Speaker. Tou Manm Onorab. E mon dir en bonn apre midi tou dimoun ki pe regard ouswa ekout Lasanble isi Sesel atraver SBC e bann lezot *platform* rezo sosyal.

En bonzour spesyal i pour bann zabitan Grand Anse Praslin ki pe ekout nou ozordi. Nou, nou pti zil byeneme. Bann ki dan transpor, zot landrwa travay e lakour, mon swet zot labyenveni.

Madanm Speaker, i fer mwan en gran loner e avek en leker ranpli ek lespwar pou reponn sa *State of the Nation Address* istorik.

Parkont, sa dernyen 24erdtan in vreman enteresan. Mon'n war bokou entervenin. Bokou keksoz ki pe ganny pase. E en keksoz ki mon vreman apresye se byen boner nou'n pas sa *Bill* pour Lasante Mantal.

I annan en term dan lasante mantal ki apel *psychological projection*. Sa i ler en endividi i prozekte bann *insecurities*, bann *failings* ki i annan lo son prosen. I en fe. I en keksoz ki egziste e i kapab ganny trete.

Dir granmersi Prezidan Larepiblik avek tou son *sagesse* in war poudir sa i en keksoz, en lasante mantal. E an fezan sa *Bill* nou kapab ede tret bann endividi ki annan sa bann problem.

Psychological projection i arive ler en dimoun i santi i bezwen fer oubyen dir en keksoz ki lo son prop lekor i pe arive, me i prefere atraver la *jalousie*, eksetera, denigre e abes son prosen.

Nou'n war bokou legzanp e mon priye ki sa bann dimoun zot realize e war poudir zot annan sa problem e zot *seek* en pe *help*, e pa pran profi Lepep Seselwa pour zot denigre zot prosen.

Madanm Speaker, koman Manm Lasanble Nasyonal pour Grand Anse Praslin, i mon devwar pou aport lespwar, konsern ek konsey rezilyan bann zabitan Grand Anse Praslin isi dan Lasanble.

Apre ki mon'n byen abzorb vizyon for ki Prezidan in prezante, mon kapab dir avek en konviksyon ferm, Leta nou pei pa zis stab. I ranpli

avek lenerzi, i annan en direksyon e i pe mars avek konfyans ver en lavenir kot prosperite pou ganny partaze avek tou son pep.

Nou zwenn ansanm sa lannen pou mark 50an depi nou lendepandans. En demi syek pase nou bann zanset ti pran zot drwa dan zot lanmen pou desid zot prop desten.

Ozordi, sa diskour pa zis fer nou rapel viktwar lepase. I osi pran an men gouvrenans nou pei pour lavenir. I donn nou en plan kler, aplikab, moralman drwat ki apel "*for the many, not the few*".

Madanm Speaker, sa i filozofi Gouvrenman ki konn ki Seselwa ti pe espere. E dan sa premye 100 zour Seselwa in temwanny sa filozofi, transformen e vin en realite vivan dan lavi toulezour pour nou pep.

Premyerman, nou ranforsi nou bann fondasyon nou pei. Annou rekonnet vites aksyon e klarite moral sa nouvo direksyon kot nou gouvrenans pe ale.

Gouvrenman *LDS* ti fer gro lanons. *United Seychelles* i plito fer aksyon. Dan zis 3 mwan, Gouvrenman *United Seychelles* anba direksyon Prezidan Dr Patrick Herminie in remet debout bann pilye fondamantal nou demokrasi.

Dezyenman, *United Seychelles* in redonn nou

liberte fondamantal. Abolisyon Tim Ibou pa ti zis en desizyon administratif. I ti osi en liberasyon.

Dan rapor *Human Rights Watch* 2025 lo Sesel ti ganny fer note ki sa bann *unit* paralel ti pe detri konfyans piblik e kree en klima laterer par retir sa *unit* ki senm laterer. Sa *unit* ki ti ganny servi konman larme prive serten pou bat e teroriz nou bann frer ek ser Seselwa.

Gouvernman *US* in fer kler ki dan en demokrasi, sekirite i bezwen baze lo Lalwa. Pa lo lafreyer. Ozordi en zenn Grand Anse Praslin i kapab anvoy en mesaz *WhatsApp* kot i pe eksprim son lopinyon, son lafreyer e san lafreyer.

En travayer lasante dan klinik Grand Anse i kapab eksprim son konsern libremman. Sa se en sosyete lib Madanm Speaker. Sa Madanm Speaker, i rezilta en Gouvernman pour son pep ki kapab aksepte kritik e fer pli byen atraver ekout kritik konstruktiv.

Trwazyenmman Madanm Speaker, Gouvernman in remet dinyite ekonomik drwat dan pos nou pep. Trezyenm mwan saler ek *long service allowance* i nepli zis bann sif dan en Bidze. I aktyelman en realite. En soutyen pour fanmir Seselwa.

IMF Article 4 2025 ti dir ki soutyen finansyel targete pou fanmir i esansyel pou soulaz kou lavi. Sa Gouvernman pa'n zis note. Zot in fer li.

Par egzanp, pour bann travayer kot bann gran lotel, e egalman travayer kot pti ron, sa i transform koman manze, lekipman lekol e en nouvo souf. En sans respire. Sa i apel en Gouvernman ki delivre. Sa en Gouvernman responsab Madanm Speaker. Sa en Gouvernman ki met Seselwa o sant devlopman son pei.

Katriyenmman, Gouvernman in re donn loner nou bann dimoun aze. An fezan laz retret retourn 63an, i avek en plan realis pour ki pansyon i ariv R10mil. I en zes respe e gratitid pour nou bann dimoun aze.

Bann zabitan Grand Anse Praslin, zot ki gardyen nou bann zistwar. Nou bann zistwar lepase. Bann zistwar parey Pti Zan. E osi pa bliy Frer Torti ek sa fame Soungoula. Nou bann ladans kiltirel e lezot ankor. Sa i nou kiltir e nou listwar.

Alors, sa bann aze in kontribye pou batir Sesel. Dan zot moman retret zot plis ki merit sekirite e rekonesans pour en lavi dedye a devlopman sa nasyon.

Madanm Speaker, pli gran kouraz sa Gouvernman

se son sans laverite e rann kont. Zot pa per lalimyer Madanm Speaker. Nou kapab koz lo bann Komisyon Lanket. Me lanket i enportan aköz i form par latransparans. Parey mon'n dir o konmansman, *projection*. Ler ou koz lo en keksoz bokou, petet i en keksoz ki fatig ou.

Komisyon Lanket lo Zil Assomption, i konserne souvrennte ek latransparans. Prezidan ti fer kler. Byen nasyonal i bezwen ganny proteze dan lentere piblik.

Komisyon lo lensidan trazik CCCL Petit Paris i reponn en lapel moral, kan lavi e byen zabitan i ganny detri. Kan moral i tonbe e zot ganny tromatize. Silans en Gouvernman i demontre zot konplisite.

Mon santi zot douler e mon remersye Gouvernman pour sa Komisyon. Mon priye ki laverite i ganny met o kler e ki bann zabitan a kapab ganny soulaze e zot a kapab re batir zot lavi.

Komisyon lo dezord prizon le 5 Desanm. Sa i fer nou rapel ki sak imen, menm an detansyon i annan dinyite e drwa. Fanmir bann ki'n perdi lavi e zot merit laverite. E bann ki responsab, foudre zot reponn pour zot aksyon.

Lanket *Travizory*. En frod R65milyon i sinyal lafen en letan lenpinite. *Transparency*

Initiative Seychelles 2024 ti dir, “*grand corruption drains public resources and destroys faith in institutions.*”

Sa Gouvernman pe met en bouson byen sere lo sa pti trou. Sa Madanm Speaker se vre sans *trust the process*. *For the many, not the few*. Grand Anse Praslin, sa i materyaliz an lakaz, teren e en meyer lavi.

Aprezan nou annan sa vizyon ki nou'n anmennen. En vizyon nasyonal sorti bor lanmer ziska dan leo laplenn *La Plaine Hollandaise* kot Kevy Grand Anse Praslin.

Diskour Prezidan ti ranpli avek promes, transformativ ki viz direktman lo nou bann problem ek lespwar. Drwa pour en lakaz ek teren. En promes finalman, pa en rev vid.

Kriz lozman lo Praslin pa en statistik. I realite lavi. E sa zenn koup ki ankor reste kot son paran ki pe met larzan de kote sanses pou kapab realize zot rev pou annan en lakour pour zot menm.

E sa manman tousel Tamatave Estate dan en pti lasanm ek son fiy. Pandan en kantite lannen nou'n ganny demande e zot in ganny demande pou espere. Bokou in pasyante. Plizyer in dezespere.

Prodiksyon nasyonal, zis 250 lakaz. 250 lakaz pandan

5an ti en dezapwentman. Sa ti traizon konfyans ki sitwayen ti'n donn sa Ladministrasyon presedan.

Me la ozordi, promes in ganny finanse e i konkret. Mil lakaz pou konmanse sa lannen. 2mil lakaz delivre par 2030 pour plis ki 150 fanmir. Lo lalis Grand Anse sa i en nouvo lespwar ki'n leve lo nou distrik.

En promes ferm ki nou lespwar in ganny byen plase. Sa se avek en Gouvernman ki pe vin delivre. Sa en Gouvernman ki'n met Seselwa o sant devlopman son pei.

An plis, desizyon Gouvernman pou fer reklanmasyon later ek devlopman Île Aurore i en *game changer* Madanm Speaker.

Seychelles Spatial Plan 2023 ki ti ganny fer par *Ministry of Lands* ti eksprimen "*Praslin faces acute land scarcity with steep slopes, and this limits development.*"

Mon ganny sans rankontre bann reprezantan sa miz pandan sa bann dernyen mwan. E mon kapab donn lasirans zabitan Grand Anse Praslin ki solisyon pe ganny diskite. Pour nou bann zabitan Mahe, proze Île Aurore i reprezant en solisyon soutenab.

Zis mazine; Nouvo landrwa lozman pou soulaz

presyon lo bann vilaz. Nouvo lekol pou redwir presyon lo bann lezot lekol ki deza egziste. Nouvo koridor lenfrastruktir pou amelyor konektivite ek bann servis itilite.

Zone dezinyen pour bann antreprenner, pour bann *SMEs*, artizan, boulanze, bann pti biznes, pou menm nonm zis en pe. Zot a ganny sa loportinite pou annan e amenn zot prop latelye e biro dan en landrwa apropiye e konfortab.

Plan nasyonal pou delivre 150 parsel later rezidansyel an 2026 pou osi ed nou bann aplikan Praslin.

Mon soulaze e fyer pou war ki zabitan Grand Anse Praslin osi in ganny met o sant devlopman Sesel. Nou pa'n ganny kit deryer. Sa en bon Gouvernman madanm Speaker. Sa en Gouvernman ki serye.

Sistenm welfare; Welfare to workforce i ranforsi sa lespri travay dir Seselwa. Grand Anse Praslin nou pa en distrik ki annan zis dimoun ki demann led. Nou en distrik ki annan bokou travayer.

Bokou dimoun ki travay, me selman avek sa kou lavi zot vwar li difisil pou kapab zwenn tou zot bann *bills*. Tou zot bann keksoz finansyel ki zot bezwen zwenn. E nou annan dimoun dan nou distrik ki mon kapab nonmen.

Nou annan bann fermye, parey Mr Jimmy Serret ki anba sa soley so dan son zarden toulezour. Nou annan Andy avek Rino Athanase 2 zenn peser toulezour lo kannal.

Nou annan artizan parey Ivan Capricieuse dan son latelye Mont Plaisir kot i servi bann keksoz i resikle i fer *bijoux* avek. I annan travayer lotel parey Ms Julianna Volcere. Nou annan sarpantye parey Mr Cibert Jeannevole. Bann dimoun ki travay dir.

Me i annan osi dimoun ki napa lanplwa e sa i kot sa program i antre. Nou pa pe donn *free handouts*, parey i annan serten pe sey fer bann *taxpayers* panse. Sa i en *disservice to the people of Seychelles*.

Sa ki sa program pe dir se ed en zenn, ed en sitwayen pour li enn, annan en komansman e ganny en plas travay. E ler i pe travay, si i pa pe arive zwenn son bann keksoz finansyel, i antre kot *welfare e welfare* i ed li.

This is not a free handout. Non, Madanm Speaker. Sa i pou ed en sitwayen. I pou ed en zannan. Zannan sa dimoun pour li kapab al lekòl. Pour li kapab al lekòl, pa avek en vant vid. Pour li al lekòl avek tou sa ki i annan, ki i bezwen, ki i merite. Akòz sa i son drwa.

Mon ranforsi sa *social safety net* pou sipòrt bann ki'n travay e re donn kapasite bann ki'n tonm deryer pou rezwenn lekonomi prodiktif. Sa i anlany parfetman avek bann linisyativ mon mazinon mon kapab pouse lokalman.

Tel koman; partenarya avek bann lotel pou fer kour formasyon. Bann lotel parey *Raffles, Lemuria, Acajou*. Nou kapab apros zot pour bann kour formasyon pour nou bann zenn dan bann departman, tel ki lakwizin, zardinaz, soutenab, *spa*. E menm zesyon lotel.

Nou sipòrt bann zenn antreprenner agrikol anba "*Seychelles in Your Hands*". En linisyativ kot nou kapab form bann lyen ant marse touris e fermye, pou asire ki zot ganny en pri zis e onnet pour zot prodwi. Sa i a ed zot bouze sorti lo *break even*, pou vin en sikse komersyal.

Devlopman *Blue Economy*. Grand Anse Praslin avek son delo vyerz i kapab vin en distrik pilot dan *aquaculture* dirab lo baz kominoter. Sa i kapab kree nouvo loportinite lanplwa o nivo pour nou bann zenn e konservasyon maritim.

An plis ki sa, relansman Proze *Rehabilitation Village* i en zes konpasyon ki pou ed nou pti nasyon dan son lalit kont fleo labi sibstans par fer

provizyon pour en larout reabilitasyon e gerizon kot nou kapab fer bann pasyan re antre kot zot fanmir e re komans itiliz zot potansyel pou kontribye dan devlopman lekonomi nou pei.

Sa en Gouvernman ki annan en leker pour tou Seselwa. Sa Madanm Speaker, i en Gouvernman ki responsab.

Etablisman konsey ekonomik dirize par sekter prive i en inovasyon pli prometan e for pou kominote biznes Sesel e Grand Anse Praslin. Lavwa koncern e sizesyon *businessman* e lasosyasyon biznes Praslin av ganny tande direkteman lo nivo pli o *planning and economy* dan Gouvernman.

Kestyon lo kou transpor ant zil konektivite *digital* e *green investment* pou aprezan ganny en *platform* formel e plis pouvwar pou fer tande zot lavwa.

Batay sa Gouvernman kont koripsyon e move zwisans in ganny ilistre par demars pou rekipar sa reveni perdi atraver *Travizory*. Desizyon pou retir *Tourism Environmental Sustainability Levy* lo bann pti letablisman touris le 1er Zanvye 2026 i en Polisi *Pro-Business*.

Sa i kree en laplenn nivo pour sa pti *guest house* tel konman Anse Kerlan *Beach*

Chalets ek en gran lotel tel konman *Lemuria*. Pascal e Taciana zot dir mwan zot fyer pour zot *trust the process*, Madanm Speaker.

R20milyon pour viktim *TRNUC*. I osi en lenvestisman dan stabilite sosyal nou sitwayen. *World Bank* ti fer en letid apele "*Pathways to Peace*". E sa letid ti endike ki – e mon site la; "*addressing historical injustices is a prerequisite for long-term social stability which is the foundation for economic growth. A reconciliation is a nation that will prosper, where people can invest, innovate and build for the future without the shadows of the past*". Sa Gouvernman i enn ki pare pou onor Rapor *TRNUC*.

Finalman Madanm Speaker, en Gouvernman ki vreman pou rekonnet e repar bann fot lepase. En Gouvernman ki pa pou pran doulou bann viktim lepase e servi zot soufrans konman zot seval batay.

Me plito, anmenn reparasyon e ferm sa sapit douloure pour bann viktim, tel koman lafanmir Luc e Robert Grandcourt, lafanmir Adeline. E plizyer lezot ankore ki'n vin devan e zot in pare pou eksprim e rakont zot doulou lepase.

Finalman, Gouvernman *United Seychelles* atraver

rapor e – mon site, sizesyon, rekomandasyon *TRNUC* “a kapab repar bann fot lepase.”

Zanmen ankor Madanm Speaker, e zanmen ankor en group dimoun pou kapab vin pran profi lo soufrans e douler Seselwa. En fwa pour tou, Gouvernman *United Seychelles* pou met en lafen avek sa sapit douloure.

Mon konpran akòz sa i kapab pa desann byen dan pale en kantite dimoun. Akòz sa soufrans in ganny servi pou anbet e mal enform pep Seselwa. Sa lanket ti nob me ti ganny *highjacked* e ti ganny servi koman en zouti.

Byen, me selman, rekonpans sa bann dimoun. Georges Orwell, *Animal Farm*, ti annan en seval. Sa seval ti ganny servi. Vre ti en seval batay e ti touzour ganny promet poudir ler i pou *retire* i pou dan en laplenn anba en pye ponm pe manz ponm ziska son dernyen zour. Zour finalman sa malere seval ti nepli kapab. Dan plas donn li sa ki i ti merite, zot ti anvoy li kot *slaughterhouse* pou fer lakol ek manze zannimo avek. E se sa ki nou'n war la ankor.

43an pase pa pou zanmen kapab ganny servi ankor e abize, akòz ozordi nou war kote rezilta koz 43an pase i fer serten nou asize dan sa lasal. E mon ankouraz zot si zot anvi kontinyen koz lo 43an

pase, *feel free*, me selman, *be ready to bear the consequences* e reste laba lo sa kote lasal.

Preparasyon Madanm Speaker; sa i en desizyon en Gouvernman serye. Sa en desizyon en Gouvernman ki annan konpasyon. Sa en Gouvernman ankor en fwa Madanm Speaker, ki met Seselwa o sant devlopman son pei.

Madanm Speaker, konman nou pe batir sa nouvo Sesel, nou bezwen fer li avek en lizye lo leternite. En fondasyon for. Pour Grand Anse Praslin, sa i vedir nou devret pe regard ver serten proze. *A mon avis*, proteksyon lanvironnman.

Nou ki gardyen en *Vallée de Mai*. En sit *UNESCO World Heritage Site*. En bann lot *Park Nasyonal Praslin* e nou devret pilot Praslin *Watershed Management Plan*. Nou protez nou bann sours delo portab. Nou osi annan kapasite pou konmans en proze pilot *solar-microgrid*. Sa i a redwir nou depandans lo zenerater dyezel. Sa ava elev ed nou redwir nou nivo karbonn *footprint* lo nou pti zil.

Nou bezwen pe protez batman leker nou kiltir. Lekonomi Ble tabour moutya Cote d'Or. Bann zistwar sorsye pe danse dan simityer Bel Air. Bann krwayans siperstisye

Madanm Speaker, tel ki mars ek gous lay dan pos, bann vokabiler inik bann Pralinwa.

Madanm Speaker, tousala bann *intangible international treasures*. Mon propoz en Fondasyon Praslin *Cultural Heritage Fund* pou siport artis lokal, dokimant sa bann zistwar ki'n ganny akonte dan leparse. E pour kwa pa *host* bann Praslin *Festival of the Arts* ki kapab transform nou kiltir e fer li vin en aktivite soutenab.

Investir dan pli gran resours nou pei. Nou zenn Madanm Speaker. Sa nouvo *bofler fre ki sa *speech* Prezidan Dr Patrick Herminie in delivre i donn lespwar baze lo fe konkret.

Sa i kree en moman favorab pour Sesel investir dan pli gran resours nou pei - nou zenn. Sa fitir zenerasyon ki pou pran larelev e fer paviyon Sesel flot pli o ankor.

Moman apropiye in arive pour nou konsider the *Praslin Youth Innovation Hub*. En lespas fizik e vertyel ki donn akse avek bann kours *coding, digital market training* e *mentorship* pour bann zenn antreprenner ki anvi komans zot prop biznes.

Dan *ecotourism*, dan lar kreativ oubyen servis teknik. Nou zenn i bezwen vin larsitek Praslin 2030. En keksoz Madanm Speaker, ki zis sa

Gouvernman ki met Seselwa o sant devlopman i kapab delivre. Sa Gouvernman serye. Sa Gouvernman ki pe delivre.

I pa pou byen si mon pa tous en pti gin konman premye Manm bann zil pou koze, lo sa ki mon pe tann deroule la konsernan *Vijay International School* e Polisi Gouvernman ki'n antre, eksetera, eksetera.

MADAM SPEAKER

Onorab ou annan ankor 2 minit.

HON ALVIN GRANDCOURT

I enportan Madanm Speaker ki nou met keksoz azour. Mon ti a kontan dir avek sa Lasanble e osi avek pep Seselwa ki desizyon wi in ganny pran. Nou pa dan en deba bidzeter. E mon ava tous sa bann bout sif pli tar.

Me le 23 Zanbye Minis pour Ledikasyon e bann Manm *Board Vijay International School* zot in ganny en konversasyon e zot ankor *ongoing* dan konversasyon.

I annan bokou keksoz ki'n vin an zwe. Me selman mon ti a zis kontan fer rapel poudir sa Gouvernman is *for the many and not the few*. Tou desizyon ki ganny pran i ganny pran avek konsiltasyon.

Me i osi ganny pran avek sa antet ki nou bezwen mazin

benefits the many and not the few. But however, to the few you will not be left behind. We think about you and we will do our best to also ankadre zot dan nou desizyon.

An konklizyon Madanm Speaker, soley pe lev lo en nouvo Sesel. Onorab Madanm Speaker, e bann Onorab Manm sa 8enm Lasanble, Prezidan in demann nou pou reflesir lo ki kalite pei nou anvi batir.

Sa Ladres SONA i donn nou tou larepons. En Sesel kot progre i ganny resanti dan sa nouvo lakour lapwent. Dan sa nouvo pti bis manze Mr Walter Confiance, e Darius osi byento.

Dan leker sa zenn etidyan lekol segonder ranpli ek lespwar pour en lavenir ki solid. En Sesel kot bann lenstitisyon for e transparan pa ganny toufe dan dout e anba en nyaz nwar. Lanmertim e diskor personnel nepli devret met nou an retar.

En Sesel ki pe ganny re batir avek en lekonomi ki marse pour sa drayver taksi dan laliny *Lemuria*, egalman pour sa peser lo bazar Grand Anse e sa gran lotel.

Sa en Sesel kot dinyite i ganny akorde pour nou pli zenn zanfan, parey Shariff ki fek ne Ros Korbizo. E nou pli ansyen sitwayen parey

Madanm Evangeline Joubert - partou egalman.

Sa pa en Gouvernman zis bann sif ek rapor vid ki pa ganny resanti dan lestoman e dan lavi Seselwa. I ganny resanti dan zot sekirite e lavi toulezour. Nou nasyon Seselwa nou merit sa.

Sa en Gouvernman aksyon. En Gouvernman prensip e en Gouvernman baze lo rezilta ki ganny re santi dan leker e lavi tou Seselwa. Menm si ou siport sa Gouvernman ou non, tou Seselwa i resanti bann bon desizyon sa Gouvernman.

E se sa Madanm Speaker en Gouvernman ki met tou Seselwa o sant devlopman. En Gouvernman pour nou tou, kot menm si ou pa'n siport e ou ankore pe rezouir bann fri grennen partou.

Nou pe donn zot tou sa ki zot merite e personn pa'n dir nou non mersi Madanm Speaker. Tou dimoun i kontan. Menm si zot pa pe *follow the process...*

MADAM SPEAKER

Pou konklir Onorab.

HON ALVIN GRANDCOURT

...zot pe enjoy the benefits of the process and the progress. Sa en vre Gouvernman Madanm Speaker.

MADAM SPEAKER

Fer konklizyon.

HON ALVIN GRANDCOURT

Mersi Madanm Speaker. Mersi tou bann Onorab.

(APPLAUSE)

MADAM SPEAKER

Onorab Sathya Naidu?

HON SATHYA NAIDU

Mersi Madanm Speaker. Madanm Speaker, tou koleg Onorab, zabitan St Louis ki'n elekte mwan e menm bann ki pa'n siport mwan konman zot reprezantan, mon dir bonn apre midi.

Ozordi i fer mon premye diskour SONA konman en Manm dan Lopozisyon, pa en pozisyon ki mon ti a voudre trouv mwan ladan apre ki mon'n travay vreman dir pour Lepep Seselwa akote mon bann koleg ki'n donn tou zot kouraz.

E sa i aplikab pour bann Minis dan Legzekitiv e egalman nou Prezidan Wavel Ramkalawan, kot nou ti pe promouvwar meritokrasi. Kot nou ti le ki tou Seselwa i ganny en loportinite egal. Kot zanfann Sesel ti pou'n trouv zot vre plas dan lasosyete kot nou ti pou non selman pres Sesel pour tou son zanfann, me nou ti pou'n met li an pratik.

Nou ladministrasyon an 2020 ti'n erit en kof ki ti preski

vid. En kriz lasante ek ekonomik. Me atraver disiplin e bon gouvrenans nou ti'n nobou sirmont bann defi. Nou ti'n pran bann desizyon ki ti dir, difisil me brav, e i ti bezwen ganny pran. Nou ti pe pran li a en moman kot i ti nesese dan lentere Lepep Seselwa. Kekfwa abilite pou sanze e adapte in pran plis letan ki nou nou'n kapab mazin.

Ozordi ladministrasyon dizour pe debout lo fondasyon ki LDS in batir an sa ki konsern linisyativ e proze. E kekfwa Dr Herminie konman Prezidan, konman en politisyen pa oule rekonnet sa.

Me mon oule soulinyen poudir ki nou nou'n fer en bon travay. E si mon pou pas mon letan lo travay ki nou'n fer, mon riske pa fini mon diskour ozordi.

Madanm Speaker, pou kit li kourt mon le dir ki Ladministrasyon LDS in kit son mark. E menm si i annan serten mezir ki zot pe adopte pou efas nou travay, i pou zis en gaspiyaz resours, letan e lenerzi.

Alors mon demann Patrick Herminie konman Prezidan, silvouple retrouv ou *focus*. *Focus* pou diriz nou pep ek nou pei, dan plas annmen bann taktik politik pou diviz nou plis.

Si nou ladministrasyon pa'n kapab atenn serten lobzektif dan bann diferan domenn, pou kwa pa vin fer pli byen? Pli byen pour Lepep Seselwa.

Madanm Speaker, atraver son diskour *monotone* avek 4 *teleprompter* kot parti bann Manm dan parti o pouvwar pe dekrir konman vre SONA, mon ti'n bezwen poz kestyon; ki pou arive avek Sesel apre son 50enm lannen lendepandans? Eski nou pou reste en Leta endepandan?

Mon'n bezwen poz bann kestyon avek bokou konsern, akòz nou pei pe pas dan en traze ki kritik e bann desizyon ki ganny pran ozordi i pou enpakte nou fitir demen.

I pou determinen, eski nou konman en pep nou pou debout lo nou 2 lipye avek en sans dinyite, malgre limitasyon konman en pep e konman en pei?

I pou anmenn gran sagrinasyon si i annan lerozyon dan nou souvrennte baze lo desizyon popilis ki ganny pran a en pri kot nou pou les en lot pei vin domin nou.

Regard sityasyon zeopolitik o monn ozordi. Sesel i reste en pwen stratezik. I en pwen kot Lenn, Lasin ek Larisi i annan lentere enorm. E zisteman Dr Herminie dan son diskour in dir nouvo lopital.

Sa menm Dr Herminie konman kandida US ti'n dir ki "nouvo lopital pa neserman en bon linisyativ. I en nide ki nou pe perdi nou letan ladan!" Me ozordi i enteresan pou war sa menm Dokter vin devan dan sa Lasanble pou pronons li lo sa size.

Wi en lopital i neser. I dwatet ganny enplimante. Me a ki pri? Lekel ki pou finans sa? Menm kestyon i kapab ganny demande lo 2mil lakaz. Pa bliye Lepep Seselwa, ti'n dir 3mil, apre in fer desann pou ariv 2mil.

Lo size lakaz mon le fer kler parey mon'n fer dan mon premye manda, napa personn ki dwatet ganny konsiderasyon baze lo afilyasyon politik.

E dan konteks St Louis, mon pou fer en rankont piblik e mon pou asire ki VP Sebastien Pillay i deservi son rol, vi ki i pe tenir portfolyo Lozman ek Later, pou vin zwenn zabitan St Louis kot nou ava ganny en rankont kot tou bann aplikan - si i annan 1 ziska 65, zot a konnen kot zot debout.

Mon pou fer parey egalman avek sityasyon kot i annan bann dimoun ki pe atann pour zot ganny zot morso teren pour zot kapab batir zot fondasyon pour zot kapab bouz de lavan an sa ki konsern zot lavi. Me deza i

annan bokou zot ki pe eksprim zot konsern aköz zot in ganny dir zot laplikasyon in ganny met *on hold*.

Si sa pa apel lenterferans politik, kwa ki ou pou apel li? Mon a les Lepep Seselwa ziz sa pour zot menm. Me mwan konman zot Manm Elekte mon pou fer tou pour tou pou pouse pou asire ki napa okenn manipilasyon an sa ki konsern alokasyon later avek lozman tan ki mon annan lenformasyon ki mwan mon pou itilize dan zot lavantaz.

2mil lakaz; 3 Sant Reabilitasyon adisyonnel e bann gro, gro proze. Me ankor enn fwa, nou pa'n vreman ganny en leklersisman lo lekel sa pei ki pou siport nou.

Annou pa bliye Lepep Seselwa. Bokou proze ki ti'n ganny fer par Ladministrasyon *LDS was locally funded*. Nou'n servi zot larzan *taxpayer* pou asire ki tou sa bann proze i ganny finanse. Annou pa regard pli lwen ki lekol La Rosière par legzanp.

En nasyon ki pe vin ed nou pei pou byensir annan lekspektasyon an retour. Napa naryen ki pou ganny donner lo en baz gratwit. Alors i enportan pour Ladministrasyon Dr Herminie pou vin devan avek senserite, dan plas kasyet par deryer mansonz e fo propagann.

Madanm Speaker, kekfw serten dimoun ki pe ekout mwan pou kestyonn nou relasyon avek *UAE* par legzanp.

Mon le fer resorti poudir wi, *UAE* in reste en *partner* kle pour plizyer deseni, kot zot in siport devlopman lenfrastruktir. E sa i aköz zot annan bann diferan letablisman touristik dan pei e i annan en lentegrasyon ki byen armonize ki asire ki devlopman nou pep ek nou pei pe ganny konsidere. Vi ki tourizm i reste pilye nimero enn nou lekonomi.

Alors, la ou annan Lenn. La ou annan lenn pe antre, nou bezwen poz kestyon. Wi, mwan menm ki pe demann sa kestyon. Ler lanmwatye *Cabinet* tre byento pe al deplase pou al zwenn Narendra Modi avek son lantouraz, ou bezwen poz kestyon; *what is the end game?*

E annou pa bliye, i annan sa viris *Nipah - Nipah Virus*, ki annan en to mortalite 75poursan. E deza nou pe ganny pa mal problem pou dil avek tikoungounya. Alors mon demann mon lekor, ki stati Minister Lasante vizavi *Nipah Virus*. I enportan pou enform Lepep Seselwa pou elimin okenn form konfizyon lo sa size pou elimin okenn lafreyer ki kapab ganny kree.

Lo size korperasyon militer mon le fer kler poudir ki nou pou dir non! Nou pou dir non dan en lenstans kot nou lendepandans pe ganny souzestimen konman en pei. Nou konman en pep ki kontan nou pei - nou, nou pou proteste si zanmen i pou ariv en moman kot nou pou bezwen debout pour sa ki zis.

Mon pa pe kree panik, me selman i enportan pour nou enform Lepep Seselwa. Wi, ozordi se nou ki pe enform Lepep Seselwa aköz medya avek bann diferan parti prenan dousman, dousman pe perdi zot liberte ek zot abilite pou egzers zot fonksyon, vi ki *big brother* kot *State House* ansanm avek son klik pe kontrol tou keksoz.

Annou zis regard serten desizyon ki ou kapab dir ki *ridiculous*, ki ganny pran lo guise "*trust the process*". Eski nou pa pe vwar en manipilasyon bann brans - diferan brans dan Gouvernman, kot zot pa pe ganny sa abilite pou egzers zot fonksyon endepandaman, kot i annan bann limitasyon kler?

Madanm Speaker an sa ki konsern separasyon pouvwar, S.I. 103 "*of*" 2025 *Defence Board of Enquiry* lo lenportasyon zarm, Prezidan Herminie konman Komandan an Sef ti'n taye le 31 Desanm 2025 pou pas sa S.I.

13 zour avan ki ka zarm ti pe al ganny ekoute Ankour, kwa ki ti'n provok Mr Herminie pou pran en tel desizyon pou enplimant en tel mekanizm? Ki bi en tel *enquiry*? Eski aköz i pe vin avek en lobzektif pou les en personnalite prominan ganny trouve non koupab konman en faver politik? Nou koman en Lopozisyon serye nou pou obzekte pou dir tel kalite lenterferans pa pou kapab ganny tolere. *Rule of law must be respected at all times!*

Konman en Lopozisyon serye nou pou anmenn en Mosyon pou *quash S.I. 103* e nou lekip pou donn tou zistifikasyon neser pou edifye nou pep. Ler sa moman pou arive, nou a regarde si bann *MNA United Seychelles* pou debout pour sa ki byen e sa ki zis.

Madanm Speaker, les mwan tous lo bann pardon prezidansyel, Ler nou pe regard 2 endividi ki ti pe al plant leksploziv lo Stasyon Petrol Grand, Anse Mahe ki ti'n ganny trouve koupab anba Lalwa Terorizm, ganny large, eski nou pe mazin ki ti pou arive si zot ti'n kapab kontinyen avek zot plan pou plant sa bann bonm e i ti pou annan en leksplozyon?

Mazin lenpak ki ti pou annan lo lavi inosan e propriyete dan vizinite Grand

Anse, Mahe. E ladan menm Dr Herminie ti dir *it's a miscarriage of justice*. Sa dan li menm i montre ki i annan en mankman respe pour travay ki Zidisyer in fer.

Lo size bann eskobar, i annan detrwa ki'n deza ganny pardon prezidansyel. E sa osi i fer mwan poz serten kestyon lo lentegrite bann endividi lo Komite Pardon. Eski zot egziste zis lo en bout papye? Kote eski zot ete?

Dan sa loptik, mwan konman en Lezislater mon pou regard dan mwayen legal pou *amend* bann lamannman nesaser pou asire ki tou bann *findings* ki sak fwa en Komite Pardon i zwenn, i vin dan domenn piblik pou asire ki i annan latransparans.

Sa largiman kondisyon lasante ler ti'n ganny site - non selman mon'n bezwen riye, mon'n osi bezwen pran en laraz. Akoz si nou al dapre sa standar...

MADAM SPEAKER

Onorab! Onorab!

HON SATHYA NAIDU

Mon'n pran en lakoler.

MADAM SPEAKER

Onorab, *retract*.

HON SATHYA NAIDU

Ok, mon pa pou servi "laraz." Mon bezwen eksprim mon

mekontantman konman en sitwayen ler ou tande poudir i annan rezon lasante ki ganny site pou larg serten eskobar.

Mon bezwen demande, be ki nou pou fer avek lanmwatye bann prizonnyen kot Montanny Poze? Ou pou larg zot? Kwa ki bann byeneme ki annan bann prizonnyen Montanny Poze pou annan pou dir? Kwa ki viktim bann fanmir ki pe ganny afekte par trafiker drog, *dealer* drog ki pe ravaz nou zenn zenerasyon?

Mr Prezidan in menm anonse poudir i pou enplimant son Polisi *Search and Destroy*. Eski nou pa pe vwar i annan lerer dan en tel desizyon? Deza i annan en lenpak vizavi nou lanvironnman. Plito zot ti'n sezi sa bann bato, met lo en lavant e apre bann lenvestiser Seselwa ki enterese ti pou kapab aste.

Ouswa sa sistenm "*Search and Destroy*" i en sistenm pou les drog antre lo nou teritwar, lo nou later pou les bann *dealer* drog fer zot ta milyon pou eksplwat nou bann zenn *homme* ek fanm ki pe viv en moman ki difisil dan zot lavi. En moman ki zot pe sey zot mye pou sorti dan sa adiksyon, en serk ki visye kot zot a pe sibir kou bann eskobar ki pe byen pase. Bann sant rezyonal pour mwan i zis en *smoke screen*.

Rezon mon pe dir sa se akoz ler Dr Herminie ti'n dir i pou annan bann Sant Reabilitasyon, mon'n bezwen poz kestyon lo kote eski nou pou ganny mendev spesyalize pou fer marse sa bann batiman? Eski drog i form parti en stratezi politik pou reste o pouvwar?

Pouvwar Madanm Speaker i dwatet ganny servi dan en fason ki responsab. Bann viktim *TRNUC* i dwatet resevwar zot konpansasyon. Me selman pou al pran R20milyon dan labsans konsiltasyon avek Lepep Seselwa pou itiliz larzan *taxpayer* pou pey bann viktim, i pa rezonnab. I pa mon zenerasyon ki napa naryen pou fer avek atosite lepase ki bezwen pey le konsekans ozordi.

United Seychelles atraver son manifesto i rekonnet zot lekore konman sel zeritye pour *SPUP/SPPF/Parti* Lepep. Alors, kwa ki pe koz sa lenkonvenyans pour zot pran zot byen malaki e transfer dan kof Leta pou pey bann viktim *TRNUC*?

Dan bann moman koumsa i demande ki nou konman en Lopozisyon serye nou regard dan mwayen legal pou anmenn en *case* Ankour pou kestyon desizyon Prezidan Herminie. Wi nou

pou kestyonnen. Wi nou pou pran aksyon.

Madanm Speaker, konman en Lopozisyon serye nou pou fer sir ki nou asire ki parti o pouvwar i reste *accountable*. E i nou rol fondamantal dan sa demokrasi e *Leader* Zafer Gouvernman pa bezwen vin donn nou okenn leson.

Ler nou pe koz lo deklarasyon bann byen par lenstans, ankor en fwa zot ti kapab pran plis letan pou prodwir en morso lezisasyon ki'n byen rafinen e ki pe zwenn realite dizour. Eski i pe zwenn bezwen pei?

Mon antyerman dakor avek mon koleg Onorab Bernard Georges ki'n souliny rasyonel par deryer *Private Members Bill* ki modern, ki pou asire ki tou personnaz piblik ouswa bann lapwentman Konstitisyonnel ki pe viv an menaz avek zot *partner* i ava ganny kouver atraver bann provizyon legal.

Annou pa bliye poudir depi ler Kod Sivil in sanze, sityasyon egalman dan sa loptik i bezwen ganny pran an konsiderasyon.

E zisteman dan sa menm laliny, si Dr Herminie i krwar dan rann kont, i krwar dan latransparans, annou fer deklarasyon bann byen vin piblik. Dan sa menm loptik lo sa kote latab nou pou pran

latransparans lo en lot letap.

Alors ler nou pou ariv sa staz, ler *LOTO* pou soumet son *Private Members Bill*, nou a regarde kwa ki pou pozisyon *United Seychelles* e eski zot pou debout akote zot slogan “Fer li vin en vre Lasanble!” Kestyon pour en Sanpyon.

Madanm Speaker, Prezidan ti'n koz lo pri lavi. Pour bann telespektater ki pe swiv mon diskour ki pe ekout mwan, mon le dir ki zis al lo *Le Seychellois Hebdo* lo *Facebook* e ou pou war en seri mezir ki nou ladministrasyon ti'n pran dan bann moman pli difisil pour nou kapab adres pri lavi. Mon pa pou bezwen al an detay. Tou detay i laba.

An relasyon avek *Starlink*, in ganny propoze konman en alternativ pou redwir kou *internet* pou fer li vin pli abordab.

Dan 7enm Lasanble ler Onorab Waven William ti anmenn en Mosyon lo pri lavi, se pa lot ki mwan ki ti'n sizer *Starlink*. E wi, mon ti'n dir avek menm lentansyon pou redwir kou *internet*. Me selman pli tar mon ti'n realize ki sa i kapab koz en lemorazi sever dan nou Lendistri Telekom.

Bann lakonpannyen tel ki *Airtel* ek *Cable & Wireless* in sey zot mye pou donn bann pri konpetitiv si nou fran avek nou lekor. Alors zot riske fer

fas avek bann moman ranpli avek lensertid.

Mon dir sa aköz par legzanp menm *SRC* i riske perdi en bilyon Roupï an term koleksyon reveni baze lo taks ki sa 2 lakonpannyen i peye.

Alors ki pou arive an sa ki konsern fitir bann travayer dan 2 lakonpannyen Telekom pli gran dan pei? Ki pou arive avek bann lenvestisman ki'n ganny fer pou mentenir lenfrastruktir? Wi *Starlink* i kapab paret konman en bon propozisyon. Me selman i kapab annan en konsekans negativ lo nou sekter, prenan kont frazilite nou lekonomi.

Annou pa oubliye, *Cable & Wireless* i napa *shares* dan Fon Pansyon li? Be ki pou arive avek *Cable & Wireless* dan en tel lenstans? Bann desizyon san okenn zistifikasyon i fer ki bann travayer dan sekter Telekom i kapab annan rezon pou annan bokou mefyans vizavi en tel desizyon.

Bann lakonpannyen Telekom dan Sesel zot bezwen tonm anba prerogativ *Telecom Regulatory Authority*. Me *Starlink*, anba ki i tonbe li?

Si en zour Elon Musk i leve e i deside pou *wipeout* sa servis, ki pou arive? Ler mon pe fer en referans avek servis, i anmenn mwan lo servis sivil.

En ta dimoun in ganny tire dan zot plas travay san okenn zistifikasyon, senpleman akòz dapre parti o pouvwar zot, zot pou travay kont nou, san realize poudir zot pe deza met zot lekò an retar akòz en ta zenn profesyonnel ki'n ganny tire dan bann diferan landrwa travay ti'n kapab ede pou nou kapab bouz Sesel de lavan.

Ler zot kòz lo linite, zis regard zot aksyon. I annan bokou dimoun ki tou resaman in ganny apwente. Bokou sa bann dimoun i bann figir familye. *Same old, same old*, napa nouvo lenerzi.

E ler mon'n konmans mon dezyenm manda mon'n temwanny en latitud, en sanzman latitud dan serten travayer dan Gouvènmàn. I montre klerman ki zot pa oule korpore e mon bezwen demande, akòz? Mon pa pe demann ou okenn faver. Mon pe demande ki ou konman en zofisye dan Gouvènmàn ou fer ou louvraz. Naryen an plis, naryen an mwens.

Si sa tretman pou kontinyen akòz mon asiz dan Lopozisyon, les mwan fer li absoliman kler. Ou konman en travayer dan Gouvènmàn ou la pou travay pour Lepep Seselwa. Pa pou okenn parti politik. Mon bann zabitan i merit ganny menm kourtwazi

nenport ki dimoun ki pe vin akse en servis.

Si en tel kondwit pou kontinyen, mon pou ekspoz zot. Mon pou mansyonn zot non, zot sinyatir, zot limero kontak. Mon pou montre mon *email*. Mon pou montre bann mesaz *WhatsApp*. Mon pou fer tou sa ki posib pou asire ki zot rann kont san okenn ezitasyon. Mon pa la pou vin *micromanage*. Zot resevwar en saler, fer zot louvraz.

Madanm Speaker, mon pa pou les mon bann zabitan ganny pini pour desizyon ki zot in pran atraver bwat vote.

En dimoun ti pou krwar avek 9 Sekreterdeta, en 12zenn *special advisor*, bann sekreter prensipal ki pe ganny byen reminere. Annefe plis ki Deputy Speaker Lasanble Nasyonal. E ou ti pou ekspekte ki nou ti pou annan en *civil service* ki efikas. Be kote?

Pa tro bokou letan pase – e mon annan bann temwen tel ki Onorab Colin Tirant, Onorab Valdana, kot nou ti'n al asiste en *High Level Forum*. *High-Level Inter-Agency Forum* kot bann teknisyen e bann diferan MDAs ti prezan.

E ou konnen ki zot ti fer? Dan lespas 20minit zot in prezant zot *TOR* kot zot pe zis entrodwir *District Team*. E apre zot ti'n dir mersi bann Onorab, zot kapab eskiz zot lekòr.

Be ou ti pou ekspekte bann teknisyen normalman zot pou diskite *the same old topics*. Ou ti pe ekspekte ki nou konman bann Manm Elekte i ti pou pridan pou ekout nou bann konsern pou asire ki nou amelyor *service delivery*. Sa lespri travay dan silos i ankor ek zot.

Madanm Speaker, mon demande, be ki mannyer eski nou pou amelyor *ease of doing business* avek en tel mantalite?

I fer mwan rapel lanons Prezidan pou donn en *write-off* pour lavalier 50milyon pour bann pti e mwayen lantrepriz ki'n pran en *loan* avek DBS ki pe trouv zot dan en moman difisil pou fer en repeyman ouswa zot pe *default*.

Alors mon demande, eski bann mezir ki pe ganny entrodwir pou vin en lot *FA4JR 2.0*? Bann endividi ki pou benefisye avek en tel *scheme* ouswa lanons, eski zot non pa devret ganny pibliye?

Akoz nou pa pe koz 59 sou. Nou pe koz R59milyon e i enportan pour Lepep Seselwa konnen lekel sa bann lakonpannyen. Lekel bann dimoun ki pou benefisye.

E ler i annan en biznes ki pe resevwar en tel rekour, zot bezwen asire ki zot reste an operasyon. Ki zot model biznes i *then* enn ki soutenab. Enn ki rantab.

Si non, en lot 5an apre nou pou trouv en serten politisyen pe al lo teren pe fer bann promes pou dir *vote* pour mwan, mon a *write-off* ou *loan*. Bann prensip koumsa pa pou anmenn nou okenn par.

E i enportan - i enportan ki rol FPAC ki primordyal i ganny respekte. E ler Onorab Bernard Georges i konmans kler son tors, pa bezwen sot anler, pa bezwen kriye, pa bezwen konplent. Zis respekte travay ki pe ganny fer lo lapar Lepep Seselwa.

Atraver sa menm komite, i pou enteresan pou konnen ki kantite biznes in benefisye avek lasistans trezyenm mwan saler.

Wi, deza dapre konpran zot in sot sa *threshold* R5milyon ki zot ti pe al donn bann pti e mwayen antrepriz. E i annan biznesmenn St Louis ki pe tap mon laport e zot oule konnen ki ladministrasyon dizour ki pe ganny dirize par Prezidan Herminie i anvizaze fer lo sa size ki la.

Ler mon pe koz lo travayer, i anmenn mwan lo size URS - *Unemployment Relief Scheme*. Eski i en *platform* pou asire ki bann resipyan i trouv zot dan lanplwa? Ouswa i en *scheme* pou promouvwar en latitid parese? Travay, pa travay ou pou lo en *scheme*.

Gouvernman pou dir nou, nou pe pran swen avek ou.

Dan plas ede pou fer nou bann zenn debout lo zot 2 lipye, zot pou promouvwar en fason pou fer zot vin depandan lo sistenm. Eski se sa bi sa *scheme*?

Zisteman a en moman apropiye, ler Prozedlwa pou aparet devan sa Lasanble nou ava debat pour nou kapab eklersi bann dout.

Wi, se atraver sa Lasanble ki nou konman reprezantan nou pou egzers nou fonksyon, pou poz kestyon, pou anmenn Mosyon, pou prezant lezislasyon, pou pas Bidze pou debat lo lapar nou bann zabitan pou reprezant zot aspirasyon. E si i annan okenn mannev pou souzestim nou rol konman Lopozisyon, nou, nou pa pou tolere.

Sa bann *sitting* en zour mon pa krwar ladan, aköz LDS i sel lespwar pour Lepep Seselwa.

(APPLAUSE)

HON SATHYA NAIDU

Nou pou debout akote Lepep. Nou pou itiliz nou lavwa. Nou pou dir Legzekitiv dan en fason konstriktiv ki pou fer aköz nou pou pran nou louveraz koman en Lopozisyon serye. Nou pa pou vin *mislead* personn. Nou pa pou itiliz nou

pouvwar pou konfiz Lepep avek bi pou anbet zot. Nou pa pou *walk out* lo zot. Nou pou debout pour bann prensip ki zis e ekitab. Enn kot nou annan pep Seselwa aker.

Zabitan St Louis mon misyon pou deservi zot i ti'n konmanse depi a laz 16an. 17an pli tar mon misyon i reste pou fer le nesesser kot mon asire ki mon deservi tou dimoun, irespektiv zot afilyasyon politik. Aköz pour mwan atraver sa pozisyon ki mon annan, mon annan en abilite pou anmenn lazwa dan lavi dimoun pou amelyor zot lavi pou fer sir ki zot a pe zourir bann benefis ki vin avek sa travay ki zot, zot in anvoy mwan pou fer.

E ler mon pas lo teren, baze lo travay ki mon'n fer pandan sa premye 5an kot Prezidan Ramkalawan ti pe diriz *State House*, dan tou kwen dan mon distrik nou'n nobou kapab fer bann devlopman. Laprev i la.

Alors ozordi anba en lot ladministrasyon, mon lobzektif pa pou sanze. Mon pou met presyon lo zot. Mon pou demande ki Legzekitiv i delivre ver lekspektasyon mon bann zabitan pour zot delivre lo zot promes ki zot in fer dan zot manifesto e dan bann lanons ki swiv.

Wi, Dr Herminie menm depi zour inogirasyon in koz lo

linite. Me selman son bann aksyon ziska prezan i fer mwan demann en kantite keston.

Eski linite i en parol ki zis ganny servi me selman i pa ganny pratike? Annou konmans vreman viv vre definisyon linite. Annou servi linite konman sa pon ki kapab konekte nou pour nou kapab pli byen deservi nou pep.

E tou resaman lo size ADV, mwan konman en Manm Elekte pour zabitan St Louis mon le met sa devan lo rikord. In annan en posibilite pour nou kapab konman 8 distrik lo Lasosyasyon *Districts of Victoria* tonm lo en konpromi kot ti pou annan en konsansis bi partizan pour nou selekte en Mer Laval.

E le 7 Zanvye atraver *State House* dan piblikasyon in ganny fer pou dir *nominate* en kandida atraver ADV. E dezyenm kominikasyon. Sekreter *Cabinet* Margaret Moumou in fer resorti poudir en kandida. Me selman le 23 Zanvye in annan en *updated communication* ki pa'n direktman sorti lo lofis...

MADAM SPEAKER

2 minit Onorab.

HON SATHYA NAIDU

...Madanm Margaret Moumou pou dir ki zot dwatet aprouv – non selman aprouv enn. Me

selman zot in bouze pou fer li vin 3.

Be respekte nou lendepandans konman bann Manm dan Lasanble. Les nou fer nou travay. Les nou kapab demontre ki ozordi 2026 nou annan en matirite politik pou kapab tonm lo en konsansis bipartizan pour nou apwent en Mer Laval. Me ou konnen ki'n arive? Zot oule ki nou *shortlist* 3 e Dr Herminie i pou selekte enn dan 3.

Be zisteman dan sa menm laliny, Chair ADV baze lo komite *meeting* ki'n ganny fer in dir ki in vin avek en *metric system* e nou pou klasifye zot enn ziska 3, e Lepep Seselwa i ava regarde. I ava regarde si Dr Herminie i pou respekte desizyon ADV. I pou respekte brans lezislatif dan Gouvernman.

Madanm Speaker, pou konklir. E wi mon pa pou pran 5 minit pour mwan konklir aköz bokou lenstans in annan en bann ki pran plis ki 5 minit pou konklir.

Me selman, pour mon konklir les mwan dir sa. Mon le pran sa loportinite pou remersye tou dimoun pour zot lankourazman, pour zot lapriyer, pour zot benediksyon, pour zot lanmour.

Ek zot lanmour napa naryen ki pou detrir Sathya Naidu. Ek zot lanmour napa

naryen ki pou detri *LDS*. Lalit i long. Lalit i kontinyen e nou lo sa kote latab nou pou travay dir, nou pou double nou zefor. *We are ready. Bring it on!* Nou pa pou zanmen les tonbe!

(APPLAUSE)

MADAM SPEAKER

Onorab Robert David.

MADAM SPEAKER

Onorab Robert David.

HON ROBERT DAVID

Mersi Madanm Speaker. Bonn apre midi Madanm Speaker. Bonn apre midi tou Manm Onorab, osi tou bann dimoun ki pe swiv nou travay Lasanble Nasyonal apre midi. En bonn apre midi spesyal pou tou bann zabitan Mont Buxton. Mon swete ki zot lannen in byen komanse. E pou zot mon swet zot tou le meyer.

Madanm Speaker, swivan eleksyon Lasanble Nasyonal ki ti fer ant le 22 ek le 24 Oktob 2020 mazorite Lepep Seselwa ti fer en swa enportan letan zot ti swazir *LDS* koman sa parti ki pou diriz Sesel pou sa prosen 5an. Lepep ti desid koumsa Madanm Speaker. Pou Lezislatif *LDS* ti ganny en mazorite absoli dan Lasanble Nasyonal avek 20 syez direkteman elekte.

E pou Egzekitiv, Kandida Prezidansyel *LDS* ti sorti viktorye. En desizyon ki ti byen ganny respekte parmi lapopilasyon. E boner an 2022 Madanm Speaker, dan laplipar konversasyon ki ou ti fer avek bann sitwayen Seselwa zot ti pe kriye avek en lavwa byen for ki zot ti'n ganny ase.

Zot in ganny ase avek en sistenm kot lamazorite dimoun ti pe ganny difikilte pou fer 2 bout zwenn. Seselwa ti'n fatige dormi vant vid. Si ou ti dezennen, ou pa ti dinen. Pri komodite ti pe kontinyelman monte, nou ti'n konpran ki savedir ler ou napa naryen dan ou pos. Fristrasyon ti partou.

Sitwayen ti bezwen andet zot lekor pou kapab satisfere zot bezwen debaz. E dousman, dousman, *LDS* ti pe *work zot way out*. A lafen lazenes ti kriye anvoy le 27. Le 27 ti vini Madanm Speaker, e en lot le 27 ti arive. Mardi le 27 Zanvyè 2026 5er apre midi nou'n ganny sans ekout Prezidan Larepiblik Dr Patrick Herminie koz lo Leta Lanasyon Sesel.

En diskour ki'n pran latansyon mazorite dimoun isi Sesel. Prezidan Dr Patrick Herminie ti raport 2enm *round* eleksyon Prezidansyel ki ti fer an Oktob 2025 avek 52.7 pousan vot. Koman Manm Elekte pou distrik Mont

Buxton, mon santi mwan privezye pou ganny loportinite pou donn mon larepons lo diskour Leta nou Nasyon.

En Diskour lo Leta nou Nasyon Sesel tre presye kler e byen prepare. Dan son diskour, dan son lentrodiksyon i ti fer resorti ki sa lannen i mark 502 lendependans nou nasyon Madanm Speaker. E minwi le 29 Zen 1976, *Union jack* ti desann pou dernyen fwa lo later Sesel. Sesel ti vin endependan.

Lalit pou laliberte sepandan pa ti'n vremen akonplir. Nou ti rekonnet ki lalit pou laliberte pa ti zis Sesel. Bann dirizan parti ti bezwen *attend* bokou konferans konstitisyonnel ki ti fer aletranze. Sa letan plis dimoun ti kontinyen ralye deryer demann pou lendependans.

Sepandan Madanm Speaker, leksplwatasyon spekilasyon ek koripsyon ek bann mannev kolonyal ti kontinyen. An 1973, *OAU* ti rekonnet nou parti koman en mouvman liberasyon. Sesel ti ganny son paviyon ek son prop Lim Nasyonal. Ozordi nou pe viv dan en nouvo letan.

Prezidan Larepublik in fer kler ki sak sitwayen i bezwen pran son responsabilite anver lavenir. Anver son lavenir,

anver lavenir son zanf anver lavenir son pei. Sesel i nou pei, alors i nou devwar pou travay pou li. Nou viv dan en pei ki parfetman sitye dan lemonn. Nou pa ganny ni lafreser ekstrenm, ni lasaler ekstrenm. Nou letan i zis bon Madanm Speaker.

Nou nasyon i ankor zenn, se pandan bann ki'n pas avan nou in fer bokou ki ozordi nou pe benefisye e ki zanmen nou devret oubliy kontribisyon ki zot in fer anver nou sosyete. E sosyete i merit toultan rekonnet son sitwayen aze. Zot in travay dir, zot in mank sonmey pou nou. Zot ki pandan letan ki zot ti pe batir nou sosyete pa'n zanmen ganny sans probableman benefisye rezilta zot sakrifis.

I annan bokou ki'n kit nou. E i annan ki ankor parmi nou. Zot merit en plas toultan dan nou panse. Se pou sa rezon Madanm Speaker, ki Prezidan Larepublik Dr Patrick Herminie in pran en seri mezir pou ki direktman soulaz kondisyon nou bann dimoun aze.

In fer laz retret redwir sorti 65an pou vin 63an. E in fer sa atraver *S.I 96 of 2025 Social Security (Amendment) No.2 Regulations 2025*. Dan mon distrik Madanm Speaker, bokou dimoun pe benefisye avek sa desizyon. Bokou zot ti komans travay zenn, e plizyer

ti bezwen aret lekol boner pou al travay lavi pa ti fasil pou zot sa letan.

Prezidan Larepiblik, in atas bokou lenportans anver nou sitwayen aze. E i pe fer bokou pou asire ki dan zot vye zour zot viv dan tou konfor e dinyite posib. In dir ki an 2029, tou bann ki ariv laz retret pou tous R10mil koman zot pansyon retret. E dapre son program 100zour, en kontra sosyal avek lepep.

Depi Zanbye 2026, Sekirite Sosyal in fini ogmante par R800. Pou bann ki dan lakaz bann dimoun aze, zot nepli bezwen pey serten depans ki ti'n ganny en poze lo zot ki ti afekte zot kapasite pou soutenir zot depans personnel. Zot merite Madanm Speaker, zot in travay dir pou konstri nou sosyete e zot in kontribye.

Ozordi nou pa oule kit personn deryer. Me nou ki nou letan pa ankor arive, annou pa get deryer avek regre. Me plito pran tou sityasyon lavi koman en lesen. Nou kontinyen aprann pou vin meyer pou fer pli byen ki yer. Madanm Speaker, i annan bokou fakter dan en sosyete ki neseler pou kree byennet e progre en pep.

Sakenn i zwe son rol. Parmi tou sa bann fakter, ki kontribye pou lepanouisman en nasyon i annan enn ki annan en gran sinifikasyon e plis lefe. E sa i en bon Sistenm

Ledikasyon. Dan son diskour Prezidan Larepiblik in dir ki ledikasyon i fondasyon loportinite. Ofet i nou *passport* pou prosperite, sa mwayen ki talan i ganny dekouver ki potansyel i ganny devlope.

E fason ki en nasyon i prepar son pep pou lavenir. Sa deklarasyon Madanm Speaker, i anliny avek bann valer partaze par lorganizasyon UNESCO. Ki promosyon ledikasyon, lasyans kiltir, ek kominikasyon. E ler lepep i koze Madanm Speaker, ou ekoute, nou analize e nou pran aksyon neseler.

Madanm Speaker, plizyer paran dan mon distrik Mont Buxton in konplent an relasyon avek zot zanfan ki dan laklas P3 ek P4 Lekol La Rosière. Zot in demande kan eski zot zanfan pou retourn kot zot lekol. Zot konsern pe finalman ganny adrese. Ler pe arive kan zot zanfan pou arete fer sa traze bomaten ek apre midi.

Nou pou retourn kot nou, mon konnen ki kantite lenkonvenyans sa sityasyon pe koze pou zot. Mon ti promet bann paran ki nou pou fer li e nou pou delivre. Sa ki nou dir Madanm Speaker, nou fer. Apre konversasyon avek direksyon Minister Ledikasyon, dezyenm trimes

zot zanfan pou retourn kot lekòl La Rosière.

Laranzman nesese in ganny fer ki tou i pare a tan parey nou ti'n edike. Mon pe swiv progre tre pres. Sanmenm mon pe dir ki nou bezwen *trust the process*. Bann zanfan fodre fer pli byen lekòl, travay dir, aprann nou bezwen en pli bon rezilta sa lannen. Fer zot paran ek zot ansennyan fyer, vin osi zanmi avek zot kaye, zot bolpenn, zot kreyon, zot lareg.

Ekout byen zot ansennyan, e fer tou zot bann travay lakour. Ledikasyon i bezwen prepar bann zenn. Pa zis pou pas legzanmen, me osi pou viv. Travay e kontribye pozitivman dan lasosyete pou al pli lwen. Ledikasyon i bezwen simil en fason panse kritik, disiplin e enkilke bann valer ek responsabilite.

Ou lavenir i depan lo ou. Fer li parey Stepahanie Bonte i fer, ekout ou paran, fer byen ou legzanmen e konplet ou letid avanse. Sikse i posib, me i demann sakrifis. Prezidan Larepiblik in dir nou ki personn pa pou ganny kit deryer. I mon swe ki okenn nou dimoun pa mank bann loportinite ki pei i ofer.

Sa i fer mwan mazin ankor bezwen zabitan mon distrik Mon Buxton. Mon konnen ki nou zabitan pe vyei. Bokou nou pa kapab mont

peron. Fer bann pti santye parey nou ti abitye. I fatigan, i fermal, e difisil. Mon konpran sa kalite soufrans, alor mon oule dir zot annan lespwar, nou pou arive.

Tou keksoz i annan son letan e zot letan pe arive. Nou rekonnet dilenn bann motoris ki servi semen prensipal Mont Buxton tou le zour. I annan bokou defi pou sirkile. Me lanmen proteksyon Bondye i ankor lo nou. Apre konversasyon ki nou'n fer avek direksyon en, zot in eksprim konsern lo size sirkilasyon lo semen. Sirtou lo serten seksyon semen dan nou distrik.

Me mwan koman lotorite dan distrik, nou'n annan responsabilite pou propoz solisyon efikas pou redres bann tel sityasyon. Solisyon nesese i bezwen konpreansiv e entegral. Nou definitivman bezwen plis debousman atraver bann semen segonder e fasilite *parking* ki pa koz okenn lenkonvenyans pou lezot.

Nou popilasyon Madanm Speaker, pe devlope lo en nivo endividyel. E sak fanmir i annan son prop bezwen. Nou nepli dan en letan kot en transpor i en keksoz *deluxe*, me plito en nesese ki ede fasilite depasman dimoun ek komers eskize.

Alors, i enportan ki nou rekonnet krwasans e legzizans sa letan ki nou pe viv sirtou pou bann zabitan Mont Buxton. Me staz ki nou'n arive, nou pe kontinyen travay lo prosen letap devlopman nou distrik. Son bann bezwen imedyat, mwayen term avek lonterm in deza ganny idantifye.

Ozordi mon koz pou lafanmir Gonthier, Hoareau, Loizeau, Sultan, Algae, Nicette, Toussaint, Fostel, Farabeau, Esparon parmi lezot fanmir ki dan zanmirant ankor. Pou plis ki 10an napa okenn semen nouvo ki'n ganny fer dan mon distrik. Dimoun Mont Buxton, i merit pli meyer ki sa.

Konversasyon ki nou'n fer kot ou lakour i reste parey. Sityasyon pou amelyore byento, nou bann lenfrastriktir i bezwen latansyon. En lot pwen for dan diskour Leta Lanasyon Sesel, Prezidan Larepublik in dir nou ki nou'n finalman etabli sa Konsey Ekonomik ki pou konpri prensipalman sektor prive pou ed nou batir en lekonomi for e rezilyan.

Sa i a permet annan plis konsiltasyon e permet ki meyer desizyon i ganny egzekite e pran konsernan fitir lekonomi nou pei. Seselwa i bezwen debout e pran kontrol nou lekonomi. Bi prensipal sa

Konsey se anmenn tou dimoun, tou sektor e tou konesans ansanm pou pran desizyon ki bon e byen reserse.

Annefe sa Konsey i pou kre en platform kot Gouvernman, sektor prive, travayer ek lezot sektor i kapab partaz nide. Sa i asire ki lavwa dimoun ki partisip dan aktivite ekonomik i ganny konsidere.

Sa konsey i pou etidye bann tandans ekonomik, konsider defi, loportinite pou pei e akte lo sa bann lenformasyon.

Osi i pou konsey e gid bann plan stratezik long-term ki asir progre pou tou dimoun, non pa zis en pti group. En lot rol enportan sa konsey ekonomik se pou donn sipor bann lantreprenner ek biznes Seselwa ki pou kapab partisip pli aktiv dan devlopman pei. Konsey pou kontinyen rod pou senplifye bann regilasyon e retir bann baryer.

Konsey pou ankouraz inovasyon ek rezilyans, par idantifikasyon nouvo potansyel dan lendistri, aplik nouvo teknolozi ek nouvo fason fer pou fer lekonomi vin pli slid e rezilyan. Propoz mezir pou diversifye lekonomi. E met li pare pou fer fas avek nenport kriz ki kapab prezante. E finalman konsey pou osi annan responsabilite pou asire ki Polisi Ekonomik pei i

kler responsab e dan lentere pei.

Konsekaman promouvwar latransparans. Dan manifesto *United Seychelles* Madanm Speaker, anba term “Sel opsyon pou Sesel” i fer resorti ki nou pa devret les desten nou nasyon ganny dikte par zentere etranze oubyen move ladministrasyon dan pei. Nou bezwen lev ansanm koman enn sel.

E avek kouraz reaffirm kontrol lo nou lekonomi. Nou bann lenstitisyon e nou lidantite. Se pou sa rezon mon bann frer ek ser Seselwa nou bezwen pran en desizyon serye, pou partisip aktivman dan aktivite ekonomik nou pei. E deside ki lanmen nou bezwen met kontrol. Nou bezwen reste ini, aköz linite i sel lafors pou progre.

Mon apel zot frer ek ser aköz mon konn zot e zot konn mwan. Annan lanvi pou dekouver ou potansyel. Kit bann lenfliyans negativ ater drog ek lalkol pa solisyon pou ou problem. Ou kapab fer plis ki sa. Pa kestyonn ou potansyel. Mazinen si ou pa fer li, lekel ki pou fer pou nou? Parti *United Seychelles* i krwar dan lazenes ek son potansyel.

Prezidan Dr Patrick Herminie, in asir nou an 2026 Minister Lazenés ek Spor pou etabli en Konsey pou

emansipasyon bann zenn. Pou formaliz partisipasyon bann zenn dan proses e desizyon o nivo nasyonal. Alors, lantrepriz mon bann frer ek ser i sa mwayen ki fer talan vin reveni.

Ki fer nide vin ganny pen, Prezidan Larepublik ki’n dir nou i al pli lwen i en mwayen fer krwayans ekonomik ariv kot bann kominote. Non pa zis ganny reflekte lo bann sif. Ou annan ou par ladan dan sa program. I enportan ki nou reflesir tre profon lo la. Madanm Speaker, si nou *fail* dan sa lalit nou zanfann pou grandi dan en pei pli pir ki dan letan lesklavaz.

Nou lavi pou ganny dominan par en minorite ki pou ranpli zot pos avek tou nou resours. Annou leve e pran nou souvrennte ek nou lafyerte nasyonal. Annou dirize avek kouraz ek konviksyon, nou kapab fer li. Disiplin ki nou bezwen i avek nou. Fer sikse e fer pli byen ankor. En zour ou pou arive pa zanmen doute. In ler pou ou komans ekrir ou prop poem, parey Stepanie Joubert. Lezot i ava ekout ou poem. Lezot ava lir ou poem, i ava en sours reveni pou ou en zour.

In ler pou ou komans ekrir ou prop sanson, lezot ava ekout ou sanson. Lezot ava zwe ou sanson. Ou kapab fer li. Swiv legzanp Mervin

Etienne, kre ou prop *design*, kre pou prop bizou, kre ou prop mark. E lezot ava enterese avek ou prodwir. I ava koz pou ou avanse, devlop sa ki ou kontan fer. Devlop ou pasyon, i annan lavi ladan loportinite i la.

United Seychelles i en parti ki met dimoun o sant devlopman. Madanm Speaker, progre ekonomik Sesel i devret amelyor lavi mazorite Seselwa. I pa sifi poudir ki lekonmi pe fer byen. Me ler ou pep pe dormi vant vid, sanmenm ki nou pe promot sa prensip legalite dan loportinite.

Alors, i osi enportan ki nou devlopman i konsantre lo kreasyon lanplwa, protez bann dimoun ki pli vilnerab. E promouvwar loportinite egal pou tou dimoun, san okenn diskriminasyon.

Sa Gouvernman i krwar ki bann lantrepriz lokal i bezwen debourye. Nou pe agrandi bann sant pou sipor bann lantrepriz. Ranforsi bann servis pou konsey biznes.

E protez prodwir lokal pou bann biznes ki kapab antre dan konpetisyon pli lib e ekitab. Nou bezwen form parti *workforce* e pa welfare Madanm Speaker. Diskisyon in deza komanse pou idantifye en landrwa dan distrik pou fer en sant lantrepriz. Sa landrwa i ava ganny servi pou ed bann

ki annan lentere serye e pe debite dan biznes.

I pou en lespas pou promouvwar e ankouraz e ede fer biznes agrandi. Plis dimoun i bezwen angaze dan travay. Se sa ki pou ede ogmant krwasans. Ler plis dimoun i angaze dan serten aktivite lekonmi, lekonmi pe i benefisyé. Ler mon'n ekout Prezidan Dr Patrick Herminie, mon ankouraze pou motiv lezot zenn dan mon distrik.

I annan ki deza pe progrese e fer byen. Kontinyen, i annan ki bezwen led. Komanse, en zour zot a fer Mont Buxton fyer. Lo sa pwen mon note ki i annan ankor defi pou nou sirmonte. I annan nesosite pou seryezman konsider labolisman bann kondisyon dekourazan ki ganny mete lo bann lantreprenner dan mon distrik.

Sa i konsern prensipalman *high density residential zoning*. Sa sityasyon i ankor en defi ki pe anmar lanmen bann dimoun ki pe fini fer bann prosedir, ouswa annan lide pou antre dan biznes touris. Mont Buxton i en distrik ki erit bann *view* siperb, merveye, e spektakiler. Depi Roche-Bois, Greenwich, Dan Lenn, e Mont signal.

Osi i ofer bann kwen trankil ki sifi pou repoze e

vakans. Pa oubliy bann sit ki demann eksplere pou servi zot potansyel pou benefisye nou zabitan ek pei. Partou i bon. Prezidan larepiblik i fortman fer kler ki pou bann biznes i pe retir bann birokasi, met an plas bann sistenm laprouvasyon elektronik senplifye bann prosedir pou ki i vin pli fasil pou komans e mentenir en biznes.

Semenn pase Madanm Speaker, mon ti ganny sans asiste en forum byen organize par Minister Gouvernman lokal e zil pros. Sa forum ti anba tit *High-Level Inter-Agency*. E i ti ganny dirize par Onorab Minis Eveline Rose. Minis ti fer resorti avek tou bann delege prezan ki nou annan en manda, e nou annan en lanvi la nou annan en platform.

Sa *forum* ti annan bi pou regroup tou bann responsab dan loperasyon Gouvernman ansanm pou pli byen fer marse e senkoniz travay. En nasyon Madanm Speaker, parey Dr Patrick Herminie in fer resorti dan son lentervansyon pa kapab bouz devan si napa konfyans dan Gouvernman, konfyans dan lenstitisyon e konfyans e bann desizyon ki ganny pran avek lazistis.

Dapre Lalwa e dan lentere piblik. Lentegrite dan lavi piblik i pa opsyonnel. E fondasyon son Servis Piblik e

resours piblik i bezwen servi byennet piblik. Sakenn i bezwen pran son responsabilite e delivre. Ler lotorite distrik i aranz en lapwentman avek en serten Lazans Leta, i ekspekte ler, zour ek dat i ganny respekte.

Pa bezwen ki Lotorite Distrik i telefonn 30 minit pli tar pou gete si pe vini ouswa non. Nou tou nou bezwen pran nou responsabilite e travay ansanm pou delivre sa pli meyer servis. Prezidan Larepiblik, in konfirman ki Gouvernman in fini garanti larzan pou konstrir plis ki 1000mil lakaz komansman sa lannen.

E nou reste konvenki ki par 2030, nou pou lo larout pou fini 2000 lakaz. An plis preparasyon proze Ile Aurore pou fer ankor lenfrastruktir ek plis lakaz. A lafen Madanm Speaker, bann proze lakaz i ava sorti lo *file*, i ava sorti lo *computer* e vin en realite. Nou annan konfyans ki plizyer zabitan Mont Buxton pou form parti bann ki pou benefisye avek sa bann program.

Demann pou lakaz i kontinyen ogmante zour an zour. Me parey Prezidan in dir ozordi nou pe swazir responsabilite. Pou bann ki'n benefisye annou kontinyen pey nou lakaz, viv an bon vwazinaz e respekte lezot. I enportan ki sak dimoun ki

annan en laplikasyon ki pe esper en lakaz i bezwen fer son kontribisyon.

Sa size lakaz i reste en priyorite, se pou sa rezon ki demars pe kontinyen pou idantifye bann teren potansyel dan distrik pou fer plis lakaz. Ankor Madanm Speaker, 150 morso later rezidansyel pou ganny fer disponib pou distribye. Ankor dimoun dan mon distrik ki pe esper en morso later a kapab benefisye, e konstrir zot prop lakaz.

Bann paran ki annan zanfan dan *daycare*, Prezidan Patrick Herminie in osi konsider zot bezwen. Pou bann ki pe ganny difikilte finansyel pou zwenn zot depans *daycare*, a lasistans nesesser in ganny met a zot dispozisyon. En sonm R750 ki zot ava kapab ganny akse avek pou pey zot *daycare* pou zot zanfan.

Me prosedir *means testing* i bezwen aplike. E sa Madanm Speaker, i an plis ki sa premye R750 ki sak paran i gannyen e ki ti fer laplikasyon depi Avril 2020. Tousala pou ede soulaz bann paran, en parti ki toulta pe rod fason pou ed son Seselwa ki dan bezwen.

Nou pa pou kit personn deryer. Nou bann fanmir pa devret oblize pou swazir ant manze, transpor, ek elektrisite ouswa lakaz. *United*

Seychelles atraver son bann prensip nob, parey distribisyon larises ekitab pou toulta asire ki son pep pa dormi vant vid. E ki sak zanfan i kapab benefisye avek en bon sistenm ledikasyon.

Madanm Speaker, koman Manm Elekte pou distrik Mont Buxton sak zabitan i enportan pou mwan. Ozordi annou swazir responsabilite. Servi byen bann loportinite ki prezant devan nou. Annou annan konfyans, annou met nou pei avan tou. Mon remerci zot pou tou zot sipor ki zot pe kontinyen donn mwan san kondisyon. Ansanm annou fer Mont Buxton fyer. Mersi Madanm Speaker.

(APPLAUSE)

MADAM SPEAKER

Bon, nou ava aprezan pran en break ziska 4er.

(BREAK)

MADAM SPEAKER

Bon, nou ava kontinyen avek deba. Onorab Larsen.

HON CECILE LARSEN

Mersi Madanm Speaker. Bonn apre midi a tous, spesyalman zabitan Au Cap ki a lekout. Mon ti a kontan pas mon senser kondoleans avek Lucie, Marie-Neige e lafanmir e osi

tou bann fanmir Au Cap ki'n perdi enn zot pros pandan sa 2 dernyen mwan.

Madanm Speaker, sa ki ti anba in monte, sa ki ti anler in desann e i pa pou zanmen remonte. E parey zot dir, Seselwa lizye in ouver, be sanmenm, aköz Seselwa lizye in ouver menm ki *LDS* i dan Lopozisyon ozordi.

Atraver ou Madanm Speaker, mon ti a kontan ed Onorab Roucou pou konpran aköz i paret i pa'n konpran ditou ki'n ganny dir, sa R750 *IECD* ki ti vin an aplikasyon an Avril 2020 pe reste lanmenm, o kontrer en lot R750 pe ganny azoute me lo en baz *means testing* selman pou bann paran ki lo en saler minim.

Aprè osi pa bliye ki *breakfast* pou manrmay lekol ti deza la anba ladministrasyon ansyen Prezidan Faure anba *Dedicated Fund*, pa zot ki ti entrodwir o konter nou Gouvernman pe vin *do better*.

Madanm Speaker, *trust the process* i pa zis en fraz ki'n ganny dir dan vid, me i en fraz avek en kantite sinifikasyon ki'n komans ganny met an pratik e ki benefisye tou Seselwa. I pa ti zis en slogan politik me promes en Prezidan e aksyon ki'n swiv pa lwen apre.

Pou en distrik parey Au Cap, i en promes ki zabitan ti

pe esper pou bokou letan, enn ki redonn nou lespwar pou en lavenir pli briyan. Sa *speech* i en leklersisman pou zabitan Au Cap, ki donn nou sa vre leta nou nasyon, nou vre sityasyon aktyel, in koz lo nou lekonomi, nou lanvironnman, nou sistenm lasante lo nou ledikasyon, lo nou lazenes e osi nou dimoun aze.

In donn sa Lepep lespwar pou demen, i pa'n koz lo lepase me ki pa vèdir ki sa pa'n ganny pran an kont me plito in koz fortman lo larealite ozordi. Direksyon ki nou pei pe pran lo program e plan nou Gouvernman e ki i annan dan sa bann plan e program pou byennet Lepep Seselwa.

Pou tro lontan bokou fanmir e sa mon pe koz pou zabitan mon distrik Au Cap, in santi ki progre nasyonal pa ti ariv kot zot. Pandan ki bann sif ti parey byen lo papye, fanmir ti pe soufer avek pri komodite egzorbitan, kou transpor piblik eleve, ensekirite lo lakaz, akse limite lo later, lenfrastriktir par egzanp sportif ki siport byennet lazenes ki'n ganny negligize. E osi lenkyetid lo lavenir zot zanfan.

Ler nou pe get aktivite ekonomik, o nivo nou distrik ki viz bokou ver lagrikiltir e tourizm sipor pou ankouraz devlopman a sa 2 nivo i manke. Par egzanp, nou vwar

nou bann fermye e peser ki pe vann zot prodwi obor semen, nou vwar en vilaz artizanal ki'n mor me selman moutya i ganny rekonnet o nivo enternasyonal par *UNESCO*.

Nou Gouvernman aktyel atraver *SONA*, nou Prezidan in donn nou lespwar ki devlopman pou siport nou aktivite ekonomik dan distrik Au Cap i pa pou zis en rev dan lenzirditan me plito en komitman ki pou swiv par aksyon konkret. E mwan koman sa Manm Elekte pou distrik Au Cap mon pe pouse ki sa i vin *sooner than later*.

Zabitan Au Cap, zot in fer mon konfyans dan sa dernyen eleksyon e diskour nou Prezidan i aforsi mon dezir e mon langazman pou kontinyen pouse pou zot e mon promet zot ki mon fer mon mye posibilite ki zot laspirasyon i vin en realite an servan tou bann mekanizm ki a nou dispozisyon.

Diskour Prezidan Herminie in rekonnet sa diferans ant statistik e realite. E pli enportan in angaz pou ferm sa lekar, statistik i pe finalman vin la realite. Prosperite partaze i vadir ki ler lekonomi i grandi Au Cap e Sesel antye osi in bezwen santi sa lefe. Dan saler, dan loportinite travay, dan transpor abordable, dan akse

kot i konsern later ek lakaz e en meyer swen lasante primer.

Prezidan Herminie ti annan en *manifesto* ki i ti prezant ek Lepep Seselwa. Sa *manifesto* enn ki'n koman ganny mete n pratik, i kler ki nou Gouvernman pe kapab delivre e i pou kontinyen delivre sa ki in ganny promet. Vre leta nou nasyon pa ti zis dan sa diskour, me i osi dan bann mezir konkret ki nou Gouvernman in komans met an aksyon.

Madanm Speaker, lakaz i reste enn parmi bann konsern pli gro dan mon distrik, bokou zenn Au Cap zot travay dir, zot responsab e zot pare pou konstrir zot lavenir, etabli zot fanmir me zot in ganny bloke par mank akse lo later ek lakaz abordable.

E mon'n kontan tann langazman Gouvernman lo lapar zabitan Au Cap ki plis ki mil lakaz pou ganny konstri apartir sa lannen e sa sif i osi enkli konstriksyon dan distrik Au Cap. Sa sif ki pou ariv 2mil lakaz par 2030 i fer tou byen e sa i komitman en Gouvernman serye pa en Gouvernman *wishful thinking* ki zis koze me aksyon zero.

Akoz sa ki nou pe vwar pandan sa 100 zour se ki sa Gouvernman pe delivre lo son promes. Sa pa setou, mon kapab mon osi mansyonn sa 150 *plot* rezidansyel ki pou

ganny *allocate* an 2026 e osi rekomans proze later e prepar bann nouvo *land development zone*. Sa i reprezant en vre lespwar pou Lepep Seselwa e pour zabitan Au Cap.

Met byen fondasyon dan tou kwen Sesel an bonnavini i pa vedir konstriksyon, parey mon'n dir o komansman statistik i pa relite, konstriksyon i vedir en blok flat konplet. En fetakonpli kot fanmir i kapab antre san ki i bezwen alim labouzi, san anvoy delo e espere kan sa bann *basic utilities* i ganny konekte.

Ankor enn fwa prononsman nou Prezidan Herminie dan sa kote i ganny byen akeyir parmi bann zabitan Au Cap. Sa bann linisyativ i ouver loportinite pou zenn komans zot fanmir. Travayer kalifye e bann zenn profesyonnel investir, bann kontrakter ki nou vwar detrwa dan Au Cap benefisye dan konstriksyon.

E dan bokou domenn nou distrik, agrandi dan en fason pli planifye, dignifye e soutenab. An tan ki Manm Elekte pou nou zoli distrik Au Cap, mon pe travay pros avek bann Minister konsernen pou asire ki Au Cap i ganny reprezante dan bann program lakaz ek later.

Dan sa langazman Gouvernman ki person pa

ganny kit dryer dan devlopman sosyal, nou bezwen osi vwar nou pe epanouir o nivo devlopman kiltirel. Permet mwan pou pran legzanp lo Lenstiti Kreol ki akont bokou zistwar nou leritaz me pour le moman i zis en *sight for sore eyes* o sant nou distrik.

Nou krwar fermeman ki i annan en gran nesesite ozordi pou revitaliz e valoriz Lenstiti Kreol. Sa menm lenstiti ki reprezant leker e nanm nou kiltir. Nou devret donn li en nouvo souf, rann li son zoli rob ki i merite pour ki i kapab rebran son plas dan devlopman kiltirel nou pei parey ti ete dan leparse.

Lenstiti Kreol pa zis en moniman, i en senbol nou lidantite, nou lalang e nou tradisyon. Malerezman nou vwar ki bokou parmi nou zenn pe perdi sa koneksyon profon avek nou leritaz, zot pe grandi dan en lemonn modern kot lenfliyans etranze i for e parfwa zot pa trouv valer ki sorti dan zot prop rasin, si nou kontinyen les sa dekoneksyon grandi nou riske perdi bokou plis ki zis en bout nou listwar, nou riske perdi nou lidantite.

Nou pou vin en nasyon oublie san nou kiltir, san nou leritaz e san nou patrimwann kot nou fitir zenerasyon pa pou konn vre zistwar nou zanset kot tou ti komanse. E

se sa rezon prensipal akòz ki nou devret azir konmela menm, pou asire ki listwar nou zanset, listwar kot tou ti komanse i reste vivan dan leker sak Seselwa.

Madanm Speaker, nou kominote i form par peser e propriyeter bato, artizan, profeser, ners, drayver travayer servis piblik e prive. Antreprenner ki fer pti biznes san oubliy biznes touristik.

Zot pa demann *handouts*, zot demann lazistis, loportinite e sipor ler letan i difisil, sa tranzisyon sorti *welfare* pou *workfare* i al dan laliny aspirasyon bokou fanmir Au Cap ki anvi loportinite *training* pou bann zenn, en laport ouver pou bann ki sorti dan lekol pou al dan lanplwa, sipor pou *retrain* e adapte dan en lekonmi ki pe sanze, zour an zour.

E dan sa laliny mon krwar Gouvènmman i bezwen sonn sa lenstitisyon ki devlop kapasite Sekter Piblik zesyon lenstiti Guy Morel *TGMI* plis lankourazman pou ankadre nou bann zenn pou en meyer demen.

Koman en endividi ki konn bokou lo program *TGMI*, mon krwar ki kapasite pou sa lenstitisyon antreprann bann tel linisativ i la, me sipor ki manke. Alors, Gouvènmman i devret antre an diskisyon avek

ladministrasyon *TGMI* pou rod en fason pou ankadre zenn dan benn program aprantisaz lo nivo distrik, ankor pou nou pep sorti dan sa sistenm *welfare*, e antre dan en sistenm *workfare*.

Alors, mon akey ranforsman *Scheme Lanplwa Apprenticeship e Vocational Pathway* parski dinyite pa sorti dan depandans me dan travay ki annan sans o sant devlopman, ekonomik nou distrik e dan s fason kontribye anver devlopman nou pei.

Sa i ava permet tou bann ki antre lo sa program pou vin pli prodiktiv e dan en fason ou en lot kontribye anver lepanouisman nou lekonmi. En pep avek en bagaz devlope e pli ekipe i en pep ki pli devoue e sa i aport bokou fri kot i konsern progre e prosperite pou nou pei.

Konesans i konstri rezilyans, konesans i ouver lespri, konesans i donn konfyans pou pran bann desizyon byen enformen. Konesans i ranforsi kominote e kre en lantouraz pli solid e pli rezilyan.

Madanm Speaker, Au Cap i en distrik ki annan bokou zenn avek potansyel, nou zenn i kreatif, i annan lenerzi e i anvi kontribye, me zot bezwen loportinite pre kot lakaz. Lanfaz Gouvènmman lo ledikasyon teknik ek

vokasyonnel konpetans *digital* ek inovasyon lantreprenarya, ek *startup* partisipasyon zenn dan desizyon tousala i pou definitivman ouver nouvo laport pou distrik.

Avek bon lenvestisman e planifikasyon, Au Cap i kapab vin en sant pou pti lantreprenarya, valorizasyon dan sekter lapès, lagrikiltir, touris, spor, kiltir e lendistri. Mon akey sa lespri etabli bann mekanizm ki donn zenn en lavwa dan politik nasyonal. Pou asire ki bann desizyon lo zot lavenir i baze lo zot leksperyans vivan

Nou tro souvan koman bann adilt, bann politisyen bann ki pran desizyon o nivo nasyonal taye pran bann desizyon ki konsern e afekte bann zenn san pran kont zot laspirasyon. Mon pa pe dir i mal, akòz sa i form parti nou lenstan maternel e paternel.

Me nou bezwen pran kont ki kontribisyon bann zenn ki nou fitir zenerasyon i enportan kler nou fer demars ki tous zot profonnman. Nou koman bann adilt, bann politisyen, bann ki pran destinasyon o nivo nasyonal nou parfwà dekonèkte avek la realite ki bann zenn pe fer fas avek.

Alors, avek bann mekanizm ki donn zenn en lavwa dan politik nasyonal, i ava etabli en laport ouver kot

zot kontribisyon i ganny pran an konsiderasyon, kot zot lopinyon i ganny valorize, kot zot aspirasyon i ganny konsidere, parey sa proverb Afriken i dir ki i bezwen en vilaz antye pou elve en zanfan, etabli sa dialog avek bann zenn. I pa zis en desizyon politik me i enn ki primordyal dan en sosyete modern e demokratik.

Madanm Speaker, keksoz ki pli afekte fanmir Au Cap se kou lavi ki kontinyen ogmante, fanmir pe fer fas avek en realite kot saler pa pe mont osi vit ki pri komodite dan bann magazen. E sa i fer li fermal kot nou vwar fanmir pa pe kapab fer 2 bout zwenn.

En manman pe war li difisil pou donn son zanfan 2 repa par zour, me mon'n tande gran soupier letan mon tann nou Prezidan donn son langazman pou redwir pri bann komodite esansyel. Agrandi *STC basket*, re entrodwi *STC kart* pou bann fanmir vilnerab, redwir *VAT* e taks lo bann komodite toulezour, desann pri bis sorti R10 pou R8, e pli bokou rediksyon planifye pou donn soulazman reel bann fanmir Seselwa.

Kou lavi i kontinyelman ogmante e sa i vin enn parmi bann pli gro fardo ki pe afekte fanmir dan Au Cap. Toulezour dimoun pe trouv zot dan en

sitasyon kot pri manze, kou lavi, transpor ek lezot nesesite de baz pe vin pli ser. Sa diferans ant larzan ki antre dan en lakour ek larzan ki bezwen ganny depanse i vin en sours tansyon, sirtou pou bann fanmir ki lo *minimum wage*.

Dan laplipar lakaz bokou kalkil i bezwen ganny fer pou vwar ki mannyer pou fer 2 bout zwenn. Me en keksoz ki reste enportan se lefe ki bann desizyon ki nou Gouvernman i pran ki kapab ede redwir kou lavi par egzantp anmenn plis kontrol lo pri komodite esansyel, agrandi bann program sosyal pou ed fanmir ki mwen fortinen oubyen rod nouvo fason pou rann nesesite pli abordab.

I vin en sours soulazman pou dimoun dan nou distrik e o nivo nasyonal. Zis mazine ki sa pri transpor pli ba tousel pou fer en gran diferans pou bann travayer ki pran plis ki en bis pou ariv travay toulezour e osi byen bann ki pe viv lo en reveni fiks.

Ler Lopoziyon i demande kote pou ganny larzan, nou Gouvernman in demontre tre klerman ki sa pa ti en promet dan vid me en lasirans lo sa tiket 100 zour, parey nou koze Seselwa i dir, en promet set en det.

Madanm Speaker, en pti remark, la zot pe rode kot pou

ganny larzan, me sa pa ti en konsern pou zot letan zot ti pe *write-off* taks en gro msye e pe dezennen ek en lot gro msye ki drwa plis ki R200milyon taks.

Madanm Speaker, lasante pa en privez i en drwa. Alors, mon pou felisit mon Gouvernman pou sa pa ki in met lasante primer koman en priyorite, investir dan en nouvo lopital modern, san bezwen demann Seselwa pou kontribye, letan nou pe pey taks tou le mwan koman mem kontribisyon.

Amelyor kondisyon ou bann travayer lasante zot formasyon pou fer zot vin pli ekipe e profesyonnel. Annan en nouvo lopital i pa ase letan nou pe revwar la realite nou bezwen pran kont bann servis ki alaoter e lekspektasyon pep Seselwa.

Madanm Speaker, nou bezwen admet ki nou servis lasante in regrese olye progresse, kantite letan ki en pasyan i espere avan ki i war dokter i pa akseptab. Nou servis lanbilans i fer nou demann bokou kestyon sirtou letan ki enn nou frer ek nou ser i ant lavi e lanmor.

Dokter ki sipoze *on-call* sirtou apre ler par egzantp dan plizyer lenstans lopital Anse Royale nou vwar ki pasyan i esper plis ki 2erdtan avan ki i kapab vwar dokter. En lot pwenn se letan ki pasyan i

espere pou ganny en apwentman pou bann servis spesyalize, 6mwan apre i zis pa akseptab.

Nou bezwen osi revwar kondisyon ki bann pasyan ki admit i ladan, avek sa mon enplor Minister Lasante pou fer en odit konplet sorti *a to z* lo tou Departman e Servis Lasante. Mon pou osi felisit nou Gouvernman lo lenportans rekonnet lasante mantal koman en priyorite nasyonal, nou'n realize ki lasante mantal pa swazir ni ras, ni kalite.

Letan nou pe gete, i annan ki kapab pe viv pli konfortab ki bokou lezot me ki pa ganny eparnye par lasante mantal. Lasante mantal i afekte bokou fanmir an silans, dan lakaz, dan lekol, dan kominote e dan landrwa travay.

Nou bezwen osi met lanfaz lo sa enn ki refize pou aksepte led, eski i fini la? Eski sa dimoun i vreman dan son bon leta lespri pou pran en desizyon ki dan son benefis? Dan sa sans ki nou fer? Eski nou pa bezwen etabli en mekanizm ki pou permet fanmir sa endividi pran en desizyon baze lo ekspertiz profesyonnel?

Madanm Speaker, mon konvenki ki sa i en lapros ki nou bezwen pran an konsiderasyon. Mon pou osi

koz en pe lo bann zanfan ki bokou in ne avek *ASD, Autism Spectrum Disorder*. Nou'n vwar bann paran ki annan zanfan avek *ASD* ki pe lite pou ki sa bann zanfan i ganny aksepte, nou'n vwar sa bann paran ki'n atann an dezespar pou zot zanfan ganny en *diagnostic* formel e pou ganny akse avek bann lentervansyon neseler.

Bokou sa bann lentervansyon pa disponib Sesel e alors, nou vwar bann paran mwen fortinen ki napa akse ek resours pe bezwen kit zot lanplwa pou siport zot zanfan. Bann paran ti pe lit bokou pou sa bann servis e pou zot zanfan ganny aksepte.

E avek Prezidan Hermine koman nou dirizan e nou Gouvernman, paran pe vwar en laklerte. Paran i annan lespwar letan ki in ganny anonse ki en sant otizm e en nouvo lekol kot zanfan eksepsyonnel pou ganny konstrir o pli vit posib.

Nou bezwen osi mazin bann zanfan e adolesan ki pe pas atraver bann difikilte. Koman en Gouvernman nou bezwen rod en solisyon pou bann ki pa pe kapab konport zot parey lezot, bann ki annan difikilte sa i vedir ki zot bezwen led.

Nou sistenm Zidisyer e sosyal i rekonnet ki reabilitasyon i enn parmi bann pli gran zouti ki en sosyete i

kapab servi pou protez nou zenn redres zot direksyon e donn zot en dezyenm sans. Me pou kapab fer sa, nou bezwen en sant ki konpetan, byen ranforsi e adapte avek realite ki bann zenn pe fer fas avek ozordi.

Nou bezwen en landrwa pa pou pinisyon, me koman en sant reform ki redonn nou zenn lespwar e okip zot avek bann bon valer ki kapab fer zot vin bann sitwayen responsab e entegre byen dan lasosyete.

Les mwan pran legzanp lo bann *video* zanfankon lekòl ki pe lager, premye aksyon se annou tir telefòn nou a filmen, dezyenm reaksyon se sirkil sa bann *video* lo rezo sosyal, e trwazyenm reaksyon e konsekans se annou sispann zot. Eksi sispann i en solisyon lonterm oubyen i enn ki tanporer?

Nou pa kapab zis koze, nou bezwen azir. Mon pe demann Minister konsènen ed Gouvènman pou fer en odit konplet lo sityasyon aktyel, ranforsi Bidze pou resous imen e formasyon profesyonnel ki pou travay dan sa sant ek bann zenn ki pe pas dan sa bann tel difikilte avek bann konpòrtman ki pa akseptab dan en sosyete modern.

Madanm Speaker, en zenn ki'n ganny sa sans reabilitasyon i pa zis en lavi

ki'n ganny sove, me en kontribisyon direk dan sekirite, lapè e devlopman dan nou sosyete.

Madanm Speaker, les mwan fer en pti pwen lo sa bann edikater primer e segonder ki pe al resevwar en *laptop*, mon ti a kontan demann Prezidan Herminie e enplor Minister Ledikasyon pou osi enkli enstriktè bann sant profesyonnel.

Ler en etidyan in ariv sa nivo dan zot ledikasyon en kantite plis teknoloji modern i ganny servi pou laprantisaz e menm parfwà i annan bann laklas *online* ki ganny fer e sa i vèdir bann enstriktè dan bann sant profesyonnel zot osi annan en gran bezwen pou en *laptop*.

Annou osi mazin bann *support staff*, parey bann travayer bibliotek, bann *counsellors* e menm bann *lab technicians* ki zot pa ganny kit deryer lo kote zot benefis e bann *schemes* ki ganny entrodwir.

Madanm Speaker, Au Cap i annan en gran lyen avek lanmer ek lanvironnman, bokou lavi dan nou distrik i depan lo lapès. Resous maren ek en lakot ki an bonn sante, e ankò mon felisit Gouvènman lo sa langazman zesyon soutènab resous maren.

Soutyen pou bann pti peser, promouvwar *Blue*

Economy dan en fason responsab e investir dan lagrikiltir soutenab. Sa pou kre loportinite pou bokou zabitan Au Cap. Proteksyon lanvironnman i en nesesite pou nou sirviv, nou idantite ek nou prosperite e mon bezwen ozordi lans en lapel ki sakenn de nou i vwar li e priyorite pou ede protez nou lanvironnman.

Sa ki mon swete pou nou distrik Au Cap se ki en lyen etrwat i ganny etabli ant bann ferme, peser e letablisman touristik. Nou 2 sekter ekonomik kot nou vwar enn i soutenir lot, kot prodwir lokal o nivo distrik i vin enn ki ganny servi dan lakwizin sa bann letablisman touristik.

Sa i ava ankouraz tou bann dan sekter lagrikiltir e lapas pou kontinyen prodwi dan en fason ki sa i vin rantab pou sa 2 sekter ekonomik o nivo nou distrik. Parey nou dir en *win-win situation* pou tou.

Madanm Speaker, konfyans dan bann lenstitisyon i baz demokrasi.

MADAM SPEAKER

Ou annan ankor 2 minit Onorab.

HON CECILE LARSEN

Pozisyon nou Prezidan lo latransparans, lanket endepandan e responsabilite i en mesaz ki nou tou nou'n akey avek lazwa.

En Gouvernman ki pa per *scrutiny* e en Gouvernman ki annan konfyans dan son bi pou re etabli integrite dan lavi piblik e sa i vdir re etabli lespwar parmi sitwayen e sa konfyans i esansyel pou linyon nasyonal.

Nou bann lenstitisyon o nivo distrik sosyal i merit vin pli for e pli striktire, ki a donn nou pep konfyans kot zot ganny trete avek egalite. Nou bann lenstitisyon avek bann SOPs byen detaye i a permet ki i annan kontinyasyon dan nou demars pou elev nou demokrasi mem si enn de nou ek enn de son travayer i decide kit zot pozisyon.

Madanm Speaker, Diskour Leta Lanasyon Prezidan i en lapel pou aksyon, pa zis pou Gouvernman me pou nou tou dan sa Lasanble. Antan ki Manm Elekte pou Au Cap mon re afirm mon sipor total pou vizyon ki'n ganny prezante dan sa diskour. Mon angaz pou travay konstruktivman avek Gouvernman pou asire ki sa bann promes i tradwir dan bann rezilta reel pou mon distrik.

Au Cap nou'n pare pou kontribye dan devlopman nasyonal, akey reform ek loportinite, soutenir linyon olye divizyon e konstrir en lavenir baze lo dinyite, lazistis e prosperite partaze.

Madanm Speaker, mon felisit Prezidan Herminie ek nou nouvo Gouvernman pou sa lanvi travay dir ek sa determinasyon, sa vizyon e sa langazman ou delivre sa ki'n ganny ekrir dan nou *manifesto*. Ankor denn fwa i pa ti zis en rev ni *wishful thinking* me plito en kondisyon ki nou en Gouvernman par Lepep e pour Lepep - *for the many and not the few*.

Mon siport sa diskour an antye e mon konnen ki parey in komanse nou pou vwar tou bann promes vin en realite pou Sesel e pour zabitan Au Cap e mon moto pou Au Cap se "tousel nou en bout me ansanm nou en losean" alors, annou travay ansanm, *trust the process* e met Seselwa o sant devlopman. Mersi Madanm Speaker.

MADAM SPEAKER

Onorab Dominic Savy.

HON DOMINIC SAVY

Mersi Madanm Speaker. Bonn apre midi Madanm Speaker. Bonn apre midi tou Manm Lasanble e en bonn apre midi tou dimoun a lekout espesyalman tou dimoun Takamaka.

I en privelez e en gran plezir pou mon ganny sa premye loportinite pou fer en lentervansyon lo en Diskour Leta Lanasyon. En Diskour

Leta Lanasyon i en ladres enportan par Prezidan Larepiblik pou enform Lasanble e Lepep an zeneral enkli la komite enternasyonal lo kote nou ti ete, kote nou ete e kote nou anvi arive dan en dele letan.

Malgre kot nou ti ete e kot nou ete i reste enportan, kote nou pe ale i pli enportan pou nou pou nou pep. E lemonn eksteryer parski se sa ki pou desid standar lavi sak endividi pou sa peryod letan an kestyon.

Madanm Speaker, dan en fason zeneral, pou mwan sa Ladres Leta Lanasyon i enn ki pa balanse, mon dir sa aköz wi mon vwar zefor pou amelyor lavi nou pep ki byen e i priyorite tou Gouvernman, me dan lot kote i pa montre nou zefor e sours si an ka i annan bann resours nesaser pou alimant bann depans.

I toutafe normal e nesaser ki si nou depanse ki nou osi fer sir ki sa ki pe antre dan kof i balanse ek depans pour ki lasante ekonomik pei i reste soutenab. En Gouvernman responsab i bezwen get keksoz a lonterm e asire ki son aksyon ozordi pa vin en lobstak pou li e son pepe demen.

Parfwa, bann gran promes popiler pandan eleksyon i fors en Gouvernman pran sa bann tel

desizyon ki in promet ki pa neseserman soutenab pou pei. I kler alor Madanm Speaker, ki nou bezwen fer atansyon a bann desizyon pou asire ki zot lefe lonterm i pozitiv e progresiv.

La Madanm Speaker, mon anvi fer referans avek en morso ladres ki Prezidan in dir dan son ladres: -

“Ozordi listwar pe lans en lapel avek nou zenerasyon pou pa get deryer ek regre me plito bouz devan dan linite avek kouraz ek en bi gide par bann leson lepase e responsabilite ki nou annan anver lavenir”

Pou mwan sa i bann tre zoli parol ki si nou tou nou ti kapab adopte ti pou sertenman anmenn nou pei ver prosperite. Me i malere ki sa bann parol pa pe ganny met an aksyon, e nou les nou ganny gide par vanzans ek laenn.

Ler ozordi nou pe ouver plizyer lanket tel ki lo Assomption, *Cold Store STC*, tim ibou parey zot apel li, e lezot ankor ki vize ver rod fason pou denigre Mr Ramkalawan, me pa koz ditou lezot atosite ki'n tourmant nou pep pandan ki LDS ti o pouvwar tel ki lekor ganny dekouver dan simityer Takamaka e ki pep Takamaka pe demann en larepons lo la.

Syndicate ki li osi in servis Takamaka pou fer son

bann aksyon negativ, vandalizm dan vann landrwa relizye enkli Katedral eski nou pe onor s aba zoli parol? Pou mwan larepons i senpleman non, e plito nou pe get lepase avek vanzans ek laenn.

Madanm Speaker, ler en Gouvernman i sorti e en lot i antre, se en Gouvernman Seselwa ki sorti e se en Gouvernman Seselwa ki antre. Gouvernman sortan i kapab in fer keksoz ki pa'n satisfere pep me pou dir ki i pa'n fer naryen e fer tou zefor pou efase tou travay ki in fer avan, san get lentere pei e pep i malere.

Si nou pe koz linite, nou pe koz progres, nou pe koz lavenir, nou pe koz travay ansanm, nou bezwen kapab apresye kot i byen, kritike kot i mal me pa denigre sa ki dan lentere pei e son pep. Ler nou refize aksepte ki Gouvernman LDS dan sa dernyen 3an ki in gannnen pou travay, in met en rikord lo la kantite devlopman enfrastriktir nou pe senpleman fer zefor pou nou pa ini.

Letan nou pe met zefor pou efase menm sa ki byen olye servi sa zefor pou travay ansanm, e anmenn plis prosperite pou nou pei e nou pep, nou zefor pou efase sa bann keksoz pou met nou retar. I annan keksoz nou pa pou zanmen kapab efase.

Semen Maravi nou pa pou kapab fer li tourn etrwat ankor, plito alor apresye ki zot pa tri zanmen ase anbisye e determinen pou fer li ler zot ti la, *LDS* in fer li ozordi, la kantite aksidan lo sa morso semen in redwir, piblik Takamaka pe menm servi sa semen pou zot fer zot legzersis aköz zot santi zot byen an sekirite.

Madanm Speaker, eski nou pe promot sa bann zoli parol dan sa fraz ki mon ti lir boner, ler nou inyor nou konstitisyon e refize- e refiz en ansyen Prezidan sa ki i merite par malis, si nou kapab fer sa avek en ansyen Prezidan eski napa pou fer?

Alor, ler sa pep la deor i koze e dir ki zot santi zot dan lafreder, i en realite, ler zot temwanny dimoun pe ganny pouse aköz son afilyasyon politik, ler zot temwanny lezot pe ganny persekute aköz son afilyasyon politik, ler zot tande ki demars pe ganny fer pou *monitor* zot ek plis efikasite eski sa pep i napa rezon pou viv dan lafreder?

Madanm Speaker, parey partou dan pei, mon distrik pa'n ganny eparnye avek sa fleo drog, malgre zefor entans Gouvernman *LDS* nou bann zenn in vreman ganny afekte. E nou'n vwar bokou fanmir soufer, soufrans zot zanfan pe reste dan semen, manman pa

konnen si son zanfan in ganny en pe manze ozordi, ni konnen kote i pe dormi.

Zefor sa bann paran pou re atrap zot zanfan dan zot lavi i vin anven e souvandfwa i fini par perdi zot an permanans. Pa aköz mon ti annan lentansyon pou met kandidatur dan dernyen eleksyon me mon ti fer li e mon ou toultan fer li mon devwar pou ed sa bann dimoun dan sa soufrans e sa i fer mwan pli konpran zot soufrans ler en zanfan i kit zot aköz adiksyon.

Alors Madanm Speaker, mon osi santi pou sa bann ki ankor pe lite pou re ganny zot zanfan dan zot lakour, bann ki zot zefor in ganny afekte par mank responsabilite serten endividi pandan eleksyon kot febles sa bann adikt in ganny servi koman en lavantaz elektoral.

Promes ki ganny fer avek bann *dealers* ki nou ti'n fini met zot anba kontrol e ozordi zot pe ganny re entrodwir dan nou sosyete, pandan sa bann dernyen moman in kler ki komers e konsonmasyon drog dan mon distrik in pran en lot lanpler.

Mon lans en lapel avek lotorite pou silvouple anplifye zefor pou kontrol komers ek konsonmasyon drog. Mon pe akeyir sa program *community policing* par nou lafors lapolis avek nou lekspektasyon, mon

swete ki sa i ava en pa dan sa demars pou fer annan en kominote ki an sekirite e an pe pou nou sitwayen kontinyen zot lavi toulezour.

Madanm Speaker, sa i anmenn mwan lo mon lot pwen, e sa i lenterferans en brans Gouvernman dan travay en lot. Dan son ladres Prezidan in met lanfaz lo en Gouvernman ki diriz *by the rule of law*. E sa mon apresye aköz i enn bann bon pratik ki en Gouvernman in merit adopte, me ler ou tann Prezidan dir ki in donn gras 2 prizonnyen aköz ti annan en gran fot dan lafason ki lazistis in ganny fer, mwan mon demann en kantite keştyon;-

Eski nou pe govern *by the rule of law*? Eski nou dir sa me nou, nou pa fer sanmenm? Eski sa bann dimoun konsernen i annan keksoz pou fer avek Gouvernman dizour? Eski sa bann dimoun ti pe akt lo zot prop desizyon? Eski sa ki ti *plan* sa ti mazin rezidan Grand Anse Mahe ki reste obor stasyon petrol? Eski ler sa 2 dimoun ti pled koupab zot ti vreman koupab?

Mon konnen ki pep Seselwa pa pou ganny en larepons pou sa, aköz napa *Board of Inquiry* pou sa enn. Me mon a les sa bann keştyon avek pep Seselwa pou zot zize zot menm. Me sa ki kler se ki i

annan plizyer prizonnyen ki zot, zot ka pa pe ganny ekoute.

A sa pwen Madanm Speaker, mon oule koz lo lentansyon *LDS* e son Polisi vizavi lekonomi, bon gouvrenans, responsabilite, vizyon lonterm e bon pratik. Mr Ramkalawan ler i ti o pouvwar i ti dir sa mesaz swivan dan enn son rankont, i ti dir:-

“Mon pou fer serten sanzman pou benefis Sesel, me ki pa pou benefisye mwan politikman, aköz i pa bann desizyon popilis, me mon pou fer li aköz mon en Prezidan responsab ki met mon pei premye.”

Sa *statement* pou mwan i dir en kantite keksoz, i fer mon konpran petet aköz *LDS* pa o pouvwar ozordi, me pli enportan i fer mon apresye ki mannyer *LDS* ti pe get lavenir e mwan mon konpar li koumsa. Ler en fanmir kot en papa in en drayver taksi e pou en rezon ou en lot taksi pa'n ganny *maintain*, e i pa pe kapab ganny servi me zanfann pe demann papa en bisiklet lot pe demann en *laptop* e manman pe demann en nouvo *washing machine*.

Eski i ekonomikman normal pou sa papa pran tou larzan ki i annan e satisfer son madanm ek son zanfann oubyen i repar son taksi pou li kapab al travay e komans

ganny reveni ki apre i a servi pou satisfè son fanmir.

Madanm Speaker, i enportan pou note ki pandan letan ki Gouvènman LDS in dan ladministrasyon pei in fer sirplis bidzeter, sirplis bidzeter i permet en pei fer *savings*, e pey son bann det. Nou det domestik in redwir par 1.01bilyon e det eksteryer in redwir par 189milyon ki fer ant en total ant 1.2bilon ant lannen 2020 a 2025, mon repete, 2020 a 2025.

Eski ler en Gouvènman i pey det, eski pa i en fason partaz larises dan en fason disiplinè? Pey nou det i vèdir pey *loan* pep Seselwa ki Gouvènman i pran lo son non, i enteresan pou fer remarque ki ler en Gouvènman i pran en *loan* lo non Seselwa i sipoze ki tou Seselwa i benefisye avek sa *loan*. Me parkont selman *taxpayers* ki peye pou sa *loan*.

Pli enteresan ankò i se ki Gouvènman LDS ki'n travay pou pey det ki ti'n akimile par ladministrasyon avan li. Me ozordi ou tande ki Gouvènman LDS pa ti responsab, eski sa i vre? Ler ou mazine ki Gouvènman LDS pa'n pran okenn *loan* ek Labank Santral eksepte dan letan COVID.

Eski en Gouvènman responsab i sa enn ki akimil det? Eski en Gouvènman

responsab i enn ki depans plis ki son reveni? Eski en Gouvènman responsab i enn ki mal zer lekonomi ziska IMF i bezwen pran kontrol? I vo lapenn note ki Gouvènman LDS li in toultan satisfè IMF, menm ozordi Seselwa in bliye si ti annan IMF, nou nepli tann nonm li e fotespere i pa vin topik konvèsasyon ankò.

Madanm Speaker, Prezidan in anonse ki byento *Starlink* pou ganny laprouvasyon pou *operate* dan Sesel. Sa i en devlopman, parey nou toultan konnen ki pei i bezwen avanse e servi teknoloji pli modern e efikas. Be mon lenkyetid i vir lo bann lakonpannyen telekominikasyon e zot fason fer zot loperasyon.

Eski sa pa pou vèdir ki sa bann lakonpannyen pou vwar zot pe fer rediksyon lo zot lafors travayer e an konsekans nou bann Seselwa ki travay dan sa bann lakonpannyen perdi zot travay.

Mon zis espere ki sa pa vin leka, e fanmir Seselwa pa ganny afekte. An menm tan Madanm Speaker, mon konpran ki pei i bezwen atrakte lenvestisman sorti aletranze pou agrandi nou lekonomi, sirtou la ki nou kapasite pou atir lenvestisman etranze pe ganny afekte avek sa sityasyon Proze Assomption.

Ladres Leta Lanasyon pa'n koz lo lenvestisman etranze, in plito koz lo bann don ki nou gannye avek bann pei etranze. Mon swe se fotespere napa okenn kondisyon avek sa bann don ki pa dan lentere nasyonal pei.

Pou konklir Madanm Speaker, parey mon dir lo komansman, sa ladres Leta Lanasyon i reflekte promes eleksyon e pe fer bokou depans, me i mank responsabilite pou egzize ki sa ki nou depanse i osi antre koman reveni.

Menm sa, mon demann tou Seselwa espesyalman dimoun Takamaka pou byen servi tou loportinite ki vin a zot dispozisyon pou zot progresse.

Pou terminen mon oule zis fer remarke ki sa Gouvernman LDS ki'n ganny dekrir koman koronpi ti pran son responsabilite e travay pou ranpli rezervwar, sanmenm sa rezervwar ki pou ganny servi ozordi. Me kestyon ni akòz ler zot ti la rezervwar pa ti zanmen parey.

Madanm Speaker, mon pou aret avek sa refleksyon. Mersi Madanm Speaker.

MADAM SPEAKER

Onorab Rocky Uranie.

HON ROCKY URANIE

Mersi Madanm Speaker. Madanm Speaker, bomaten

ou'n donn en gidans ki i pa normal pou nou la anndan koz lo fanmir dimoun eksetera, me selman mwan mon pa pou koz lo fanmir Mr Onorab Georges Romain.

Me selman toudmenm mon pou bezwen zis dir li en pti keksoz... poudir nou tou nou konnen pa li ki zonm kot lakaz. Madanm Speaker...

(comments off-mic)

MADAM SPEAKER

Onorab! Onorab Uranie!

HON ROCKY URANIE

Madanm Speaker, mersi pou donn mwan laparol.

(comments off-mic)

MADAM SPEAKER

Onorab Uranie! En moman Onorab Uranie. *Retract* silvouple.

HON ROCKY URANIE

Ok Madanm Speaker, mon a *retract* ki mon'n dir ki Onorab...

MADAM SPEAKER

Retract pa bezwen repete zis *retract*. Mersi.

HON ROCKY URANIE

Ok mon pe *retract*, ok *retract* ki mon dir sa ki mon'n dir. Selman veye ki ou dir *next time*

akoz mon annan ankor pou ou.

Madanm Speaker, ankor enn fwa bonn apre midi tou koleg Onorab, bonn apre midi tou zabitan La Digue e Zil Pros ki a lekout. Madanm Speaker, i pa fer premye SONA ki mon vin ekoute isi anndan, mon pe dir avek konviksyon i sa i en SONA pli meyer, pli fer sans, pli responsab e ki tous tou pep Seselwa konpare avek sa bann ki mon'n tande dan sa dernyen 5an.

Napa keksoz ki pli gou ler ou war en zonm ki ranpli avek konpasyon e lakour pou son pep e vin delivre en Diskour Leta Lanasyon pou son pep san maltret personn, san entimid personn me plito i pran tou responsabilite ki pep Seselwa ki'n met li o pouvwar pou li delivre en diskour ki eksepsyonnèl, alaoter ki tou Seselwa ti pe espekte - en zonm ki avan ler i koze i byen reflesir e son parol i swiv par aksyon konkret.

Prezidan Hermine i vremen diferan i pa parey Prezidan sortan ki koz en ta *all over the place* me pa dir naryen e apre li menm zanmen i aksepte sa ki in dir menm ler son *recording* i pas lo medya nasyonal. Son prop siporter i konfize avek li *comme* dir sanson - i pa fou me latet ki pa bon.

Pandan sa dernyen 5an nou'n antann bokou parol, wi Madanm Speaker, bokou parol me aksyon tre limite, ou kapab konte lo ou ledwa Madanm Speaker, sel keksoz ki sa ladministrasyon avan ti fer tre byen sirtou zot Prezidan sortan se *travel* Madanm Speaker. Nou tou nou'n perdi kont ki kantite in *travel*. Mon demann mon lekor oli tou sa fre *travel*.

Ozordi nou Prezidan in akonpli son bann promes 100zour ki i ti'n fer, sa wi en vre Prezidan ki Sesel i bezwen e sa se pa lot ki Prezidan Dr Patrick Herminie. Alors, mon bann frer ek ser Seselwa annou *trust the process*.

Madanm Speaker, Lepep Seselwa, annou gete kwa ki'n ganny fer, kwa ki'n ganny akonplir dan sa 100zour. Premyerman, pou re etabli kord ek lape dan pei e pou fer sir ki personn pa par lao Lalwa e kre dezord e enstabilite nou'n vwar sa fame Tim Ibou in ganny dizourd.

En tim ki ti pas partou pou entimid e teoriz dimoun ki ziska ozordi i annan zanfàn, manman, bann fanmir la kominote ki ganny tromatize e ki ankor pe viv dan lafreier. Dan Leta Lanasyon nou Prezidan in anonse ki en lenvestigasyon dan aktivite kriminel e labi pou ganny fer e

sa pou redonn konfyans nou pep dan nou lafors.

Ozordi nou ladministrasyon pe asir Lepep Seselwa ki zot lib pou eksprim zot lopinyon lo nenport size lo medya sosyal e me an personn san ki zot ganny anmase, viktimize oubyen zot konversasyon i ganny ekoute. Dimoun pa bezwen per pou koze, e nou santi sa sans liberte- laliberte dan dimoun ler ou fer konversasyon avek zot.

En pwa in sorti lo nou bann dimoun, en gro nyaz nwar in ale e ou ganny lenpresyon ki tou dimoun in vot *US*.

Ler mon'n antann Onorab Georges koze atraver ou Madanm Speaker, dir ki kantmenm *US* in ganny plis vot *LDS* in annan plis siporter. Be sa ki kalite? Mon krwar son lespri e son labous pa'n konekte i komans vin parey son *party leader*, dir nenport kwa san byen reflesir.

Onorab Georges in vin koz lo Leta Wavel olye lo Leta Lanasyon Seselwa, *speech* Prezidan Patrick Herminie in tro for pou li. Dan son leker senserman i pe *trust the process* pe dir ki Prezidan Herminie en vre *leader*, en vre zonm Deta pa parey sa enn avan. *Keep trusting the process* Onorab Georges, swiv legzanp Rolly Marengo.

Bann siporter *LDS* i dir zot santi zot lib, zis get Rolly Marengo i dir si zot ti'n ekout li ozordi zot pa ti pou dan Lopoziyon, i lib pou dir sa ki i anvi lo medya sosyal, ki si zot ti pran son konsey zot Prezidan sortan Wavel pa ti pou'n ganny saboule avek ros pandan kanpanny dan Mont Plaisir Grand Anse Praslin. Rolly parey bokou la deor pe *trust the process. Keep it up!*

Madanm Speaker, nou lafors travayer pa'n ganny oubliye, nou lafors travayer i vreman enportan pou devlopman nou pei e osi nou pa bliy bann dimoun aze ki'n lite pou fer nou pei ariv kot i ete ozordi. Alors, nou bezwen osi onor zot dinyite, annou vwar kwa ki'n ganny fer pou lafors travayer.

Premyerman, trezyenm mwan saler in ganny donner, dezyenmman *long service* in ganny re entrodwir, Prezidan Patrick Herminie e son tim *United Seychelles* i valoriz travayer, pa bliye tousala ti'n ganny retire par Gouvernman *LDS*.

Pou nou dimoun aze laz sekirite in retourn 63an e zot in osi ganny zot logmantasyon dan zot pansyon ki par 2029 pou'n ariv R10mil. La ankor, pa bliye nou bann dimoun aze, *LDS* ti fer laz pansyon mont 65an e i ti promet zit R10mil pou ganny zot vot me apre zot

pa'n delivre. Bann move dimoun!

Madanm Speaker, sa zonm ki apel Prezidan Patrick Herminie i en zonm ki fer aksyon konkret. Nou'n remet larzan dan pos Seselwa, sa in ariv dan premye 100zour kontrerman avek ladministrasyon presedan kot zot premye 100zour zot ti koup tou larzan pou travayer e sipor sosyal, me donn zot lekor gro, gro alawenns.

Madanm Speaker, dan tousala nou pa'n swazir pou fer zis pou siporter US, me pou tou Seselwa benefisye pe nenport zot apartenans politik. Alors, mon demann nou lafors travayer ek bann dimoun aze pou kontinyen *trust the process*.

Nou souvrennte e sekirite pei i enportan, nou pei i nou pti Sesel i en zoli pei kot bokou viziter i pey gro larzan pou vizite e anmenn larzan pou ede devlop e agrandi nou lekonomi. Nou lanvironnman i enn parmi nou bann byen ki nou vann avek viziter e alors nou bezwen fer sir ki prezervasyon ek devlopman soutenab i mars lanmen dan lanmen.

An vi ki nou en Leta Zil eparpiye dan en gran siperfisi lanmer dan Losean Endyen, sekirite nou bann zil i enportan pou protez souvrennte, devlopman i

enportan, wi nou annan zil i nou bezwen devlope, me nou bezwen veye ki mannyer sa i ganny fer.

An vi ki i annan sa devlopman lo Assumption ki ana keksoz ki pa kler, ki mank latransparans e ki posib i annan ka koripsyon, Prezidan ek son lasazes e lentegrite pou fer ki i annan latransparans dan devlopman nou zil in kre en Komisyon ki pe fer lanket endependan lo sa devlopman lo Assumption. Seselwa i ava konn laverite.

Laverite e rann kont i vreman enportan pou nou dimoun. Madanm Speaker, Sesel i en pti pei kot nou annan valer moral, nenport ki Gouvernman ki vin o pouwar bezwen pe donn son pep laverite e osi bezwen pe rann kont avek son pep.

Sa lensidan CCCL leksplozyon CCCL le 7 Desanm 2023 i enn ki'n mark tou Seselwa, e menm pei dan larezyon. Sa ki'n pli ganny afekte se bann rezidan Cascade e son bann sou distrik ziska la i annan plizyer lakaz ki pa ankor fini repare ouswa pa ankor ganny fer e ki ankor pe viv lo promes.

Annou pa bliy osi bann biznes dan rezyon Providence ki ti'n ganny bokou afekte me ki pa'n ganny ede. Seselwa ti pe ganny demande pou kontribye mannyer zot kapab

pou ed bann zabitan ki'n ganny afekte. Me ler Seselwa i komans rod lakoz sa leksplozyon e mon parti ki ti dan Lopozisyon sa letan *United Seychelles* in touzour lager pou en lenvestigasyon endepandan me Parti *LDS* ki ti o pouvwar sa letan pa'n zanmen oule Seselwa i konn laverite.

Me nou Prezidan Patrick Herminie ti donn son langazman zabitan Cascade e pei an antye ki nou pou konnen ki'n ariv sa zour swar, pou fer sa nou'n vwar en Komisyon Lanket pe ganny formen pou fer lenvestigasyon e pou donn Seselwa en finalite lo sa ki'n arive.

Lenvestigasyon fodre ganny fer, ki zot per si napa naryen pou kasyet? Napa person ki pe *target* Wavel, i nepli enportan in vin irelevan. In fer pli gro gaspiyaz dan sa pei, gaspiyaz pouvwar pou bouz Sesel devan avek en mazorite absolli.

Comme dir zot bann prop siporter, Wavel pou travay pli byen letan i dan Lopozisyon. I annan in dir in ler pou li *retire*, les plas pou en lot. Be mwan mon dir demerd zot!

Madanm Speaker, letan mon ti tann Onorab Georges dan son *speech* Maison Du Peuple ti dir 2027, la mon'n ganny en konpran, mon krwar 2027 zot pou tir Wavel.

Madanm Speaker, tou lavi i enportan, Sesel i en pti pei kot nou tou nou konn kanmarad, ler nou perdi enn nou frer e ser Seselwa i toultan tous nou o profon.

Me la Madanm Speaker, mon oule senpatiz avek lafanmir Terence Bijoux byen koni koman *Smash Kid*, i zanmi mon garson, so alor lafanmir mon senser kondoleans.

Letan en sitwayen i an detansyon i perdi son laliberte me i pa perdi son drwa a lavi. Parey nou tou nou okouran ti annan en rayot dan prizon le 5 Desanm 2024 kot 2 deteni ti perdi zot lavi dan fason kriyel. Fanmir dan zot douler ti demen en lanket ouswa leksplikasyon pou sa ki'n arive ek zot pros me zot in ganny refize.

Annou pa bliye ki ler en dimoun i kondannen oubyen an detansyon i responsabilite konsernen pou asir son sekirite. Pou anmenn laverite e rann kont dan sa lensidan, nou Prezidan Dr Patrick Herminie ki annan lanmour pou to son prosen in donn son langazman ki en komisyon lanket dan sa lensidan prizon Montagne Posée pe ganny etablir pou fanmir- pou fanmir ki'n ganny afekte, ganny laverite.

Ankor en fwa nou war en zonm ki pa zis koze me

kontinyen fer aksyon, i oule latransparans, alors, mon demann Seselwa pou *trust the process*.

Madanm Speaker, ler mon lo sa size rann kont i enportan ki mon pa bliy *Travizory*, i enportan pou nou ladministrasyon anba gidans nou Prezidan Dr Partick Herminie pou komans sa lenvestigasyon dan *Travizory* i ganny dir son kontra i deza en frod e ki zot drwa nou pei Sesel R65milyon.

Zis parey sa pres R80milyon larzan COVID ki tousala in disparet anba sa ansyen ladministrasyon. Ou a dir mon lekel ki'n ganny larzan? Sa larzan ti'n kapab fer lakaz e lezot proze pou benefis nou dimoun menm. La i annan *bodyguard* ki mon tandé in fer kit Sesel al reste *Abu Dhabi*, zafer pa bon.

Linite e Rekonsilyasyon Madanm Speaker, parey non mon parti *United Seychelles* i vedir parti ki pou inifye Sesel kantmenm i annan pe fer tou fason pou sa pa arive. I enportan ki nou an linite e rekonsilyasyon nasyonal dan nou pei sa i a fer ki leker Seselwa a soulaze e viv pli byen avek kanmarad koman frer ek ser dan linite e lanmour.

Nou tou nou konnen ki *TRNUC* ti ganny servi par *LDS* koman en seval batay pou vin

o pouvwar an 2020, me apre viktim in ganny zete akote parey pake lenz sal ler zot pe demann ladministrasyon avan pou onor promes ki zot ti'n fer bannla i sourd lo zot.

5an in pase, kantmenm rekomandasyon ti la, sa Gouvernman *LDS* pa'n oule fer naryen pou zot, ti *ok* pou servi troma sa bann dimoun pe pa *ok* pou swiv rekomandasyon ki Komisyon ti donn zot.

Madanm Speaker, ou pa war sa bann dimoun pa ti zanmen serye e zot ti zis la pou servi dimoun - bann move dimoun. Vreman zot *logo* i dir dezespwar pou Seselwa, ozordi nou war en Komite Linite pou enplimant an rekomandasyon *TRNUC* mersi *United Seychelles*, mersi Prezidan Herminie.

LDS in pas sa dernyen 5an pas disel dan boubou bann viktim, pou rekonpans bann viktim mon Gouvernman in met akote R20milyon pou ed zot. Sa i en Gouvernman ki serye, sa i en bon Gouvernman, en Gouvernman ki fer aksyon ki pa zis koze, alors annou *trust the process*.

For the many not the few, lamazorite non pa zis pou serten. Madanm Speaker, mon Gouvernman i fer sir ki tou keksoz i pou merit tou dimoun e pa zis minorite parey Gouvernman *LDS* ti fer avan. Nou'n vwar sa dernyen 5an ki

Gouvernman LDS ti pe get zis en pti group dimoun, dalon, dalon biznes, sirtou bann ki zot annan gran relasyon avek.

Mon Gouvernman anba gidans Prezidan Dr Patrick Herminie dan zis 100zour in fer plis ki sa ki Gouvernman LDS in fer dan 5an. Mon Gouvernman i asir tou Seselwa ki nou tou nou pou annan menm sans pou ganny loportinite devlopman personnel e prosperite ki pou anmenn rezilta pou en meyer Sesel.

A plizyer repriz, pandan sa 5an nou'n ganny dir par Gouvernman LDS ki pei pe fer byen, lekonomi pe fer byen, larzan i annan e zot ti nonm bann gro, gro sif a plizyer repriz isi anndan menm dan Lasanble. Me kantmenm zot ti pe dir tousala Seselwa sirtou bann pli vilnerab ti pe soufer terribleman avek sityasyon aktyel e la realite lavi.

Klerman sa Gouvernman LDS pa ti konekte avek son pep pou konn vre sityasyon Seselwa. E sa i enn bann rezon ki Seselwa ti dir avek Wavel ki pa pou vwar *State House* ankor. E zot in fou li deor. *pack and go!*

Nou konnen dan lakoler ler i ti pe ale, zot ti pran tou depi lisyen, torti, tou bann ki zot ti kapab, nou konnen ziske la i ankor dan *denial* e manke i *depress*. In pli move ki en pti

zanfan lakres in ganny arase son draze, nenk i gele, plere sanses. Mon ti oule S6, mon pa oule *Rav4*, i oule draze rouz i pa oule draze ver, get sa, pa ou ki pou dir pran ou draze.

Madanm Speaker a plizyer repriz mon ti anmenn bann sityasyon konsernan Zil Pros e bann Manm LDS i toultan pe gognarde pe donn lenpresyon ki sa ki mon pe dir pa vre, aköz zot ti anvi anbet dimoun e fer krwar ki tou bann Manm *MNA US* ti vin tir li dan sa setyenm Lasanble pa ti realite.

Sa labwet pouri Seselwa nepli anvale, Seselwa nepli dormi boner, eleksyon ti vini, Seselwa ti zet diktater, zet larogans, zet lenkonpetans ater, Seselwa pe *trust the process*.

Madanm Speaker, tou Seselwa i annan en drwa a lozman, me drwa pa reste zis lo papye oubyen lo *computer*, alors mon Gouvernman ki konpetan ki fer aksyon e ki annan en rikord pou konstrir lakaz in fini garanti finans pou konstriksyon mil lakaz komansman sa lannen e ki par lafen 2030 nou ava lo semen konplet 2mil lakaz. Sa en Gouvernman ki travay.

Gouvernman LDS dan 5an in konplet apepre zis 250 lakaz, 5an retar total pou pep seselwa, La Digue tou le lannen ou tande lakaz pou

ganny fer lakaz pe ganny fer me 5an in fini koumsanmenm zero.

Wi zot in fer lopital, me ziska ozordi,- mon pa konnen si zot ti fer li an tayan ziska ozordi ni *network* ou pa gannyen anndan e lopital lalimyer i bezwen reste alimen 24 lo 24 aköz ler i midi si ou tenny lalimyer, i parey minwi. E sa in met en gro kou elektrisite lo pei, pre 5milyon par lannen.

En semenn avan eleksyon- en semen avan eleksyon lannen pase 2025 pou zwe lo moral Digwa pou ganny vot, en seremoni met blok dan en laliny kot plan pa ni ti ankor ganny demarke kot pou fer lakaz, sa ti deroule La Digue. Mon ti ganny envite pou tenir en blok e byensir mon ti tenir menm blok rous.

Mon ti war poudir sa ti zis en fars, en taktik politik ki Digwa in war byen e mwan osi mon ti pe zwe lenbesil, e apre lenbesil ti donn malen lafyev dan eleksyon.

E la Madanm Speaker, vi ki Departman Lakaz e Later i tonm anba portfolyo Vis-Prezidan Sebastien Pillay, en zonm serye, en zonm ki ler i ti lot kote laba i ti dir li i pe mont *State House*, zot ti riye. Zot ti riye.

E Madanm Speaker, ler mon dir sa mon retourn- atraver ou mon retourn lo

parol ki Onorab Valdana Sultan in dir pli boner, i dir ki nou pa ti asire si nou ti anvi vin o pouvwar, la ler nou'n vini prezan nou pa konnen ki pou fer.

Mwan mon rapel byen Madanm Speaker, se nou ki toultan nou'n dir zot nou pe mont *State House*, sete zot ki ti toultan pou dir nou zanmen, zanmen zot pou disparet, la mon krwar sa mon pa konnen ki mannyer mon pou dir zot mwan. Zot ankor dan sok, i pa'n ganny *network* pou *trust the process* li.

Parey mon'n dir, an vi ki la nou Vis-Prezidan ki'n ansarz sa portfolyo en zonm serye mon kapab garanti Digwa ki netwayaz landrwa in fini koman se e ki lakaz pe al ganny konstrir sa lannen La Digue. Digwa *trust the process*.

Madanm Speaker, i osi enportan ler nou pe koz lo lozman ki nou met an antet ki drwa i mars ansanm ek responsabilite alors mon pou demann bann Digwa Lepep Seselwa pou kontinyen fer zot kontribisyon lakaz atraver bann *scheme* ki an plas. La mon oule lans en lapel ek bann zenn ki pe ekoute pou komans zot kontribisyon boner ki a fer ki zour zot bezwen sa lozman zot kontribisyon in matir e zot lenvestisman ni ava raport fri.

Madanm Speaker, topografik nou pei i fer li *challenging* pou ganny bann kare later rezidansyel pou vann avek dimoun ki kapab *afford*. Mon Gouvernman anba direksyon e gidans nou Prezidan Dr Patrick Herminie e nou Vis-Prezidan Sebastien Pillay sa 50bout later pou sa 50 aplikan pou ganny donnen sa lannen, sa wi en Prezidan ki pe travay.

United Seychelles, pe travay, *trust the process*. Get kontrent later Madanm Speaker, byensir nou bezwen konble. Madanm Speaker, letan nou pe koz lo kontrent later, les mon fer zot rapel mon Gouvernman i le sel Gouvernman ki'n kapab fer konblaz e ki kapab fer konblaz. E ki nou pou konble.

LDS i koz konblaz me pa'n fini kapa met ni en bout ek en bout pou konble, o kontrer fer voras avek later *coralfill* ki zot in fouye dan basen lasose La Digue e partaz antre dalon. La mon oule asire Digwa ki nou pe met en lord en fwa pour tou dan sa bann dezord ki zot in kree La Digue e nou a konnen lekel ki responsab sa later *coralfill* Anse Kalis ki zis serten ki ti gannyen.

Madanm Speaker, levidans konblaz i kler, annou komans par distrik kot mon Depite *Whip* i la Onorab

Audrey Vidot Roche Caiman lekel ki ti konble? Si pa lot- si pa nou lekel?

Perseverance, nou menm, Ile Du Port kot nou ete nou menm, Ile Aurore nou menm, Ile De Romain Ville nou menm, Providence nou menm, Ile Eve Praslin nou menm e La Digue osi i annan 2 pti zil obor La Digue ki ti ganny konble par nou menm. E la lo la ler mon dir sa enn sa zil La Digue dan goulo in fini ganny *allocate* ek en biznesmenn e i in komans son biznes lo la.

Madanm Speaker, zot ti pe koz konble, les nou, nou a montre zot ki mannyer i konble, annou pa bliye osi ki *UO*, *SNP*, *LDS* ti touzour kont konblaz aköz zot ti napa vizyon. Kantmenm ozordi se laplipar zot menm ki pe rezouir later konble pou zot biznes les li, nou la pou tou Seselwa, nou konble pou tou Seselwa.

LDS dan 5an in la in fer miting tou le semenn pou fer konblaz be ni en bouret later pa'n kapab ganny mete pou konble. Kirmol imaziner in fer konblaz imaziner ki Minis ex-Minis Devika toultan i vin la i dir nou.

100zour pa ti ankor fini, Gouvernman *United Seychelles* in fini siny lagreman pou premye faz proze konblaz ki pou komanse an Mars. Sa wi en

Gouvernman ki serye Madanm Speaker, *trust the process*.

Madanm Speaker, pa nou tou ki annan mwayen parey, alors lasistans sosyal i enportan. Seselwa i en pep ki travay dir, me parkont ek bann defi lavi i annan ki pa arive fer 2 bout zwenn.

From welfare to workforce i en moto ki asire ki nou pa pou soutir parese, parey nou Prezidan Dr Patrick Herminie in dir, en pei pa pou avanse si lanmwatye dimoun i travay e lot lanmwatye i viv lo *welfare* e pe esper lot lanmwatye pou soutenir li. Koman en Gouvernman responsab sipor sosyal i pou sa fanmir ki pe travay, me ki zot pa pe kapab arive fer 2 bout zwenn, pou napa labi.

Pou bann lafanmir ki pe soufer aköz enn zot pros i dan sibstans e i pa konnen kot i pou ale pou ganny led, nou asir zot ki mon Gouvernman i konpran i konpran zot sor e leokri e 4 sant reabilitasyon pe al ganny konstrir pou ed sa bann zenn ki'n tonm dan ladisyon.

Pa bliye ki si pa ti desizyon iresponsab sa Gouvernman ansyen LDS ozordi nou ti pou annan bann sant reabilitasyon e nou pei ti pou lwen. Madanm Speaker, pa bliye ki lannen pase mon ti osi anmenn Mosyon pou etabli en sant konpreansif

pou ede tir nou zenn dan adiksyon e souldaz fanmir Seselwa.

Bann Manm LDS isi dan sa Lasanble ti vot kont kantmenm mon Mosyon ti enn ki bon, i annan- e ti annan sa vre lenportans, vre sans en Gouvernman pa'n zanmen kapab abord e dres sa problemin e aksyon lo la. Zot pa'n war pli lwen ki zot bout nennen Madanm Speaker.

MADAM SPEAKER

Onorab i reste ou 2minit.

HON ROCKY URANIE

Mersi Madanm Speaker. Madanm Speaker, pri lavi, mon Prezidan Dr Patrick Herminie in konekte ek Digwa, Digwa i vreman kontan li, Digwa i partaz souffrans avek li. Kou lavi lo Zil Pros i tre o, manze koman materyo konstriksyon tousala i ser.

Gouvernman i re entrodwir kart STC pou ede souldaz fanmir ki pe travay me ki zot mwayen i pli ba. Adisyonnelman, 12 nouvo prodwi pou ganny azoute lo lalis komodite de baz pou stabiliz pri e protez konsonmater.

Mon Gouvernman i konekte- i dekonekte- i konekte ki napa en fanmir-

-(*sorry* eskize)- mon Gouvernman i rekonnet ki napa en fanmir ki devret oblize

swazir ant manze, transpor, delo ek elektrisite ouswa lakaz, tou i enportan e nesaser. Alor, fanmir pa kapab sakrifye enn pou en lot, mon Gouvernman i enn ki vreman pe get dimoun pa parey sa enn avan kot bef dan disab sakenn vey son lizye.

En keksoz ki mon bezwen met Lepep Seselwa okouran sete Prezidan sortan Wavel Ramkalawan ki ti frenm laboutik *retail* STC La Digue pou donn enn serten madanm ki ti annan gran relasyon avek loportinite pou fer son biznes. Prezan Digwa ti ganny kart-prezan Digwa ki ganny kart STC pou bezwen vwar zot pe al Praslin, pou la laboutik *retail* STC gras a move desizyon Gouvernman LDS.

Mon swete tre byento ki nou osi nou ava ganny nou STC. Madanm Speaker, ankor pou soulaz fanmir Digwa zabitan Zil Pros Prezidan pe donn tou zanfani ki pe komans lekol pos-segonder Mahe R2mil adisyonnel pou ede soulaz depans ki paran i fer lo komansman larantr lekol pos-segonder. Zil Pros i *trust the process*.

Prezidan i fer resorti ki lapros son Gouvernman i kler ki sipor i sipoze en pon e non pa en destinasyon, re entrodwir sa program URS sa program pou donn sipor reveni tanporer e konekte dimoun

direkteman avek marse lanplwa, *training e reskilling*.

Program URS e *My First Job* i annan an *success story*, La Digue menm i annan plizyer zenn ki antre lo program URS, mete koman *helper, assistant teacher* dan lekol. Apre zot in swiv bann program entrodwir par Minister Ledikasyon an kolaborasyon avek lanplwa kot zot in fer nivo sertifika dan lansennyman e zot pe kontinyen pou fer zot diplom dan ledikasyon pou vin en *qualified teacher*.

Sa i montre ki URS i annan son lenportans, sa SONA in donn lespwar, kouraz pep Seselwa.

Madanm Speaker, promes kontra 100zour i en realite Gouvernman *United Seychelles* in fini komans demontre son konpetans, zis mazin dan 100zour ki in fer, prezan mazin 1an, 2an e 5an ki kantite nou pou akonplir?

Seselwa in fer en bon swa, mersi Prezidan Patrick Herminie e Vis-Prezidan Pillay pou sa bon travay ki zot in komanse. Mon swet zot bon kouraz. Mon bann Minis nou'n sorti dan Lopozisyon e nou retourn dan Gouvernman, travay *SMART* ansanm avek zot bann *staff*, tret travayer byen ki pou fer zot kontan pou vin travay e delivre plis pou Sesel.

Kouraz e lafors pou nou bann Minis e kouraz e lankourazman pou nou bann travayer. *United Seychelles* i touzour sa meyer parti e pli gran lafors politik dan Sesel. Klerman nou lavi pou pli meyer ki sa dernyen 5an. Sesel, Seselwa annou kontinyen *trust the process*. Mersi Madanm Speaker.

MADAM SPEAKER

Nou'n ariv a lafen nou sesyon pou ozordi, nou ava *adjourn* ziska demen bomaten 9er.

(ADJOURNMENT)